



欽定唐書

卷一百二十八之一百四十

土岐文庫
文庫17
W202
22

三十三



文庫 17
W202
22

昭宗六年二月一日
宋 邵 撰

010185193727

唐書卷一百二十八

宋 端 明 殿 學 士 宋 邵 撰

列傳第五十三

蘇尹畢李鄭王許潘倪席齊

蘇珣雍州藍田人。中明經第。調鄆尉。時李義琰為雍州長史。鄆多訟。日至長史府。珣決明辨。自是無訴者。義琰異之。顧聽事曰：「此公坐也。恨吾齒晚不及見。垂拱初為監察御史。武后殺韓魯諸王。付珣密牒。按訊珣維之。蝶賦或言珣勸韓魯者。后詰之。挺議無所撓。后不悅。曰：「卿大雅士。此獄不足。倭卿即詔監軍河西五遷右司郎中。御史王弘義附來俊臣為酷。世畏疾莫敢觸。其鋒會督伐材於號。管督過程人多死。珣按奏弘義坐免。遷給事中。進左肅政臺御史大夫。后營大像。白司馬坂糜用億計。珣上疏切諫。見納。中宗將斬韋月將珣執據。時令不可以大戮。忤三思意。改右臺。俄出為岐州刺史。復為右臺大夫。會節愍太子敗。詔株索支黨。時睿宗居藩為獄。辭牽逮珣。密啟保辯。亦會宰相開陳。帝感悟。多所舍貸。擢戶部尚書。封河內郡公。以檢校太子詹事致仕。卒。年八十一。贈兗州都督。諡曰文。

子晉。數歲知為文。作八卦論。吏部侍郎房穎叔祕書少監王紹宗歎曰：「後來之王粲也。」舉進士及大禮科。乾隆四年校刊。唐書卷一百二十八列傳



蘇收或

685

皆上第先天中爲中書舍人玄宗監國所下制命多晉及賈會屢獻讜言天子嘉允出爲泗州刺史以
珣老請解職奉養珣卒歷戶部侍郎襲爵遷吏部時宋璟兼尚書事晉與齊澣更典二都選既糊名校判
而晉獨事賞拔當時譽之及裴光廷知尚書有過官被劫者就籍以朱點頭而已晉因榜選院曰門下點
頭者更擬光廷以爲侮己出晉汝州刺史遷魏州終太子左庶子始晉與洛人張循之仲之兄弟善而二
人以學顯循之上書忤武后見殺仲之神龍中謀去武三思爲宋之遜等所殺死晉厚撫其子漸爲營婚
宦晉卒漸喪之若諸父云

尹思貞京兆長安人弱冠以明經第調隆州參軍事屬邑豪蒲氏驚肆不法州檄思貞按之適其姦贓萬
計卒論死部人稱慶刻石歎遷明堂令以善政聞擢殿中少監檢校洛州刺史會契丹孫萬榮亂朔方
震驚思貞循撫境內獨無擾武后璽書褒慰長安中遷秋官侍郎忤張昌宗意出爲定州刺史召授司府
少卿時卿侯知一亦厲威嚴吏爲語曰不畏侯卿杖祇畏尹卿筆加銀青光祿大夫其家坎地獲古戟十
二俄而門樹戟時人異焉神龍初擢大理卿雍人韋月將告武三思大逆中宗命斬之思貞以方發生月
固奏不可乃決杖流嶺南三思諷所司加法殺之復固爭御史大夫李承嘉助三思而以他事劾思貞不
得諫思貞謂承嘉曰公爲天子執法乃擅威福慢憲度諛附姦臣圖不軌今將除忠良以自恣邪承嘉慙

怒劾思貞爲青州刺史或問曰公敏行何與承嘉辯答曰石非能言者而或有言承嘉恃權而侮吾議不
辱亦不知言何從而至治州有續蠶至歲四熟黜陟使路敬潛至部歎曰是非善政致祥乎表言之睿宗
立召授將作大匠封天水郡公僕射寶懷貞護作金仙玉貞觀廣調夫匠思貞數有損節懷貞讓之答曰
公輔臣也不能宣贊王化而土木是興以媚上害下又聽小人譖以廷辱士今不可事公矣乃拂衣去闕
門待罪帝知之特詔令視事懷貞誅拜御史大夫累遷工部尚書請致仕許之開元四年卒年七十七贈
黃門監諡曰簡思貞前後爲刺史十三郡其政皆以清最聞

畢構字隆擇河南偃師人六歲能爲文及冠擢進士第補金水尉遷九隴主簿居親喪毀棘甚已除猶屏
處巨園武后召爲左拾遺神龍初遷中書舍人敬暉等表諸武不宜爲王構當讀表抗聲析句左右皆曉
知三思疾之出爲潤州刺史政有惠愛徙衛同陝三州遷益州府長史景龍末召爲左御史大夫會平諸
韋治其黨衣冠多坐構詳比重輕皆得其情時李傑爲河南尹與構皆一時選世謂畢李封魏縣男復爲
益州長史按察劍南振弊梃私號爲清嚴睿宗嘉構修潔獨行有古人風其治術又爲諸使最乃賜璽書
袍帶再遷吏部尚書並遙領益州長史徙廣州都督玄宗立授河南尹進戶部尚書久之移疾帝手疏醫
方賜之當時以戶部爲凶官遽改太子詹事冀其愈會卒贈黃門監諡曰景始構喪繼母而一妹襁褓身

鞠養至成人妹爲構服三年弟栩以太府主簿留司東都聞疾馳歸哀毀如大喪雖變服未嘗笑天下稱
其弟終荆州司馬構子炕天寶末爲廣平太守拒安祿山城陷覆其家贈戶部尚書炕生罔始四歲與
弟增以細弱得不殺爲賞[?]平宗人宏以財贖出之後舉明經爲臨渙尉徐州節度使張建封高炕
節聞罔篤行表署幕府攝符離令後調王屋尉以謹廉聞喜賓客家未嘗以有無計及歿無貲以治喪云
李傑本名務光相州滏陽人後魏并州刺史寶之裔孫少以孝友著擢明經第解褐齊州叅軍事遷累天
官員外郎爲吏詳敏有治譽以採訪使行山南時戶口逋蕩細弱下戶爲豪力所兼傑爲設科條區處檢
防亡匿復業者十七八神龍中爲河東巡察黜陟使課最諸道先天中進陝州刺史水陸發運使置使自
傑始改河南尹傑既精聽斷雖行坐食飲省治不少廢絲是府無淹事人吏愛之寡婦有告其子不孝者
傑物色非是謂婦曰子法當死無悔乎答曰子無狀盜其悔乃命市棺還歛之使人迹婦出與一道士語
頃持棺至傑命道士接問乃與婦私不得逞傑殺道士內于棺河汴之交舊有梁公埭廢不治南方漕
弗通傑調汴鄭丁男復作之不費而利入代宋璟爲御史大夫尙衣奉御長孫昕素惡傑遇于道內侍玄
宗姬媾與所親楊仙玉共毆辱之傑訴曰敗髮膚痛在身辱衣冠耻在國帝怒詔斬昕等朝堂左散騎常
侍馬懷素建言陽和月不可以殊死乃敕杖殺之謝百官降書慰傑以謬作橋陵封武威縣子初傑引侍

御史王旭爲護陵判官旭貪贓傑將繩之未及發反爲所構出衢州刺史遷揚州大都督府長史復爲御
史劾免開元六年卒帝悼之特贈戶部尚書

鄭惟忠宋州宋城人第進士補并陘尉天授中以制舉召見廷中武后問舉者何所事爲忠對皆不合旨
惟忠曰外揚君之美內正君之惡后曰善擢左司禦曹參軍事遷水部員外郎后還長安復以待制召
后曰非嘗於東都對忠臣者乎朕今不忘遷鳳閣舍人中宗立擢黃門侍郎時議禁嶺南曾戶不得畜兵
惟忠曰善爲政者因其俗且吳人所謂家鶴膝戶犀渠此民風也禁之得無擾乎遂止進大理卿節愍太
子敗守衛誣誤皆流已決諸章黨請悉誅之帝欲改推惟忠奏大獄始判復改訊恐反側者不自安且失
信天下有詔百司參議卒論如前所全貸爲多俄授御史大夫持節賑給河北道且許黜陟守宰還奏稱
旨封滎陽縣男遷太子賓客卒贈太子少保

王志愔博州聊城人擢進士第中宗神龍中爲左臺侍御史以剛鷲爲治所居人吏畏讐呼爲阜鵬遷大
理正嘗奏言法今者人之隄防不立則無所制今大理多不奉法以縱罪爲仁持文爲苛臣執刑典恐且
得謗遂上所著應正論以見志因規帝失大抵以易萃之六二曰引吉无咎謂處萃之時已獨居正異操
而聚獨正者危未能以遠害惟九五應之乃履正迎吉由己居下位而中正是託期於上應之不括囊以

守祿也又言刑賞二柄惟人主操之故曰以力役法者百姓也以死守法者有司也以道變法者君上也魏游擊爲廷尉帝私敕擊有所降恕擊執不從曰陛下自能恕之豈可令臣曲筆也又言爲國當以嚴致平非以寬致平嚴者非凝網重罰在人不易犯而防難越也故捨銜策以奔蹏則王良不能御驥停藥石於膚腠則兪跗不能攻疾又言漢武帝甥昭平君殺人以公主子廷尉上請帝垂涕曰法令者先帝之所造也用親故誣先帝法吾何面目入高廟乎卒可其奏隋文帝子秦王俊爲并州總管以奢縱免官楊素曰王陛下愛子請赦之帝曰法不可違若如公意我乃五兒之父非兆人之父何不別制天子子律乎故天子操法有不變之義凡數千言帝嘉之景雲初以左御史中丞遷大理少卿時詔用漢故事設刺史監郡於天下劇州置都督選素威重者授之遂拜志愔齊州都督事中格復授齊州刺史河南道按察使徙汴州封北海縣男太極元年兼御史中丞內供奉實封百戶出爲魏州刺史改揚州長史所至破碎姦猾令行禁信境內肅然開元九年帝幸東都詔留守京師京兆人權梁山妄稱襄王子與左右屯營官謀反自稱先帝夜犯長樂門入宮城將殺志愔志愔踰垣走而屯營兵悔更斬梁山等自歸志愔慙奉許景先常州義興人曾祖緒武德時以佐命功厯左散騎常侍封真定公遂家洛陽景先由進士第釋褐夏陽尉神龍初東都造服慈閣景先獻賦李迥秀見其文畏歎曰是宜付太史擢左拾遺以論事切直外

補滑州司士叅軍舉手筆俊拔茂才異等連中進揚州兵曹叅軍遷爲左補闕宋璟蘇頌擇殿中侍御史久不補以授景先時議僉愜扞按不避近疆與齊澣王巨韓休張九齡更知制誥以雅厚稱張說曰許舍人之文雖乏峻峯激流然詞旨豐美得中和之氣開元十年伊汝溢壞廬舍甚衆景先見侍中源乾曜曰災皆所降王者宜修德應之因遣大臣存問失職罪已引咎以答天譴公在元弼庸可默乎乾曜悟遠白玄宗遣陸象先持節賑贖十三年帝自擇刺史景先由吏部侍郎爲刺史治虢州大理卿源光裕鄭州兵部侍郎寇泚宋州禮部侍郎鄭溫琦邠州大理少卿袁仁敬杭州鴻臚少卿崔志廉襄州衛尉少卿李昇期邢州太僕少卿鄭放定州國子司業蔣挺湖州左衛將軍裴觀滄州衛率崔誠遂州凡十一人治行詔宰相諸王御史以上祖道洛濱盛具奏太常樂帛舫水嬉命高力士賜詩帝親書且給紙筆令自賦賚絹三千道之後徙岐州入爲吏部侍郎卒

潘好禮貝州宗城人第明經累遷上蔡令治在最擢監察御史坐小累下除芮城令拜侍御史徙岐王府司馬居後母喪詔奪服固辭不出開元初爲邠州府長史王爲滑州刺史好禮兼府司馬知州事王御下不能肅有詔好禮檢督王家至過失皆上聞王每游觀好禮必諫諭禁切農月王出獵家奴羅剗好禮遮道諫王初不許乃臥馬下諫曰今農在田王何得非時暴禾稼以損下人要先踐殺司馬然後聽所爲王

慙爲遷豫州刺史勤力于治清廉無所私然喜察細事下厭其苛子請舉明經好禮曰經不明不可妄進乃自試之不能通怒笞之械而徇於門復以公累徙温州別駕卒好禮博學能論議節行修整一意無所傾附未嘗自列階勳居室服用麤苟至終身世謂近名

倪若水字子泉恆州藁城人擢進士第累遷右臺監察御史黜陟劍南道繩舉嚴允課第一開元初爲中書舍人尙書右丞出爲汴州刺史政清淨增修孔子廟興州縣學廬勸生徒身爲教誨風化興行玄宗遣中人捕鵲鵲溪鵲南方若水上言農方田婦方蠶以此時捕奇禽怪羽爲圓鑊之玩自江嶺而南達京師水舟陸齋所飼魚蟲稻梁道路之言不以賤人貴鳥望陛下邪帝手詔褒答悉放所玩隨使人過取罪而賜若水帛四十段時天下久平朝廷尊榮人皆重內任雖自冗官擢方面皆自謂下遷班景倩自揚州採訪使入爲大理少卿過州若水餞于郊顧左右曰班公是行若登仙吾恨不得爲騶僕本幾入爲戶部侍郎復拜右丞卒

席豫字建侯襄州襄陽人後周昌州刺史固七世孫後徙河南長安中舉學兼流略詞擅文場科擢上第時年十六以父喪罷復舉手筆俊拔科中之補襄邑尉奏事闕下會節愍太子難安樂公主請爲皇太女豫曰昔梅福上書譏后族彼何人哉乃上疏請立皇太子語深切人爲寒懼太平公主聞其名將表爲諫

官豫恥汙諛謁遁去俄舉賢良方正異等爲陽翟尉開元初觀察使薦豫賢遷監察御史出爲樂壽令前令以親喪解而豫母病訴諸朝改懷州司倉參軍復舉超拔羣類科會母喪去服除授大理丞遷考功員外郎進絀清明爲中書舍人與韓休許景先徐安貞孫述名相甲乙出鄭州刺史韓休輔政舉代己入拜吏部侍郎玄宗曰卿前日考功職詳事允故有今授豫典選六年拔寒遠士多至臺閣當時推知人號席公云天寶六載進禮部尙書累封襄陽縣子凡四以使者按行江南江東淮南河北南方俗死不葬暴骨中野豫教以埋斂明列科防俗爲之改豫清直亡欲當官不爲勢權所撼性謹畏與子弟屬吏書不作草字或曰此細事耳何留慮答曰細不謹況大事邪及疾篤遺令三日斂斂已卽葬勿久留以贖公私貲不足可賣居宅以終事卒年六十九贈江陵大都督諡曰文帝嘗登朝元閣賦詩羣臣屬和帝以豫詩最工詔曰詩人之冠冕也弟晉亦以文名當時

齊澣字洗心定州義豐人少開敏年十四見特進李嶠稱有王佐才中宗在廬陵澣上言請抑諸武迎太子東宮不報及太子還武后召澣宴同明殿諭曰朕母子如初卿豫有力焉方不次待爾澣辭母老不忍違離賞而罷聖厯初及進士第以拔萃調蒲州司法叅軍有父子連坐論死者澣曰條落則本枯柰何俱死讓貸其父太守不聽固爭卒原景雲初姚崇取爲監察御史凡劾奏常先風教號善職睿宗將祠太

廟刑部尚書裴談攝太尉先告澣奏孝享攝事稽首而拜恭明神也而談慢媠不恭并劾談神昏形滓挾邪以罔上神龍時事武三思陷敬暉沒其家以獲進妻外淫男女不得姓氏夫告神慢事主不忠家不治有是三罪不可不寘之法談由是下除汾州刺史開元初姚崇復相用爲給事中中書舍人論駁及誥詔皆援準古誼朝廷大政必咨之時號解事舍人數諷崇年老宜避位時宋璟在廣州因勸崇舉自代崇用其謀環爲相它日問曰吾不敢冀房杜此爾日諸公云何澣曰不如璟請故答曰前時近郊戶三百以爲困今不百戶是以知之馬懷素等緒次四庫書表澣爲副改祕書少監出爲汴州刺史地當舟車湊集事浩繁前刺史數不稱職唯倪若水與澣以清毅聞吏民頌美玄宗封太山歷汴宋許車騎數萬王公妃主四夷君長馬囊駝亦數萬所頓彌數十里澣列長棚帘幕聯互上食凡千舉納筦鑰身進膳帝以爲知禮喜甚爲留三日賜帛二千匹澣以淮至徐城險急鑿渠十八里入青水人便其漕中書令張說擇丞轄以王巨爲左澣爲右李元紘杜暹當國表宋璟爲吏部尚書澣及蘇晉爲侍郎世謂臺選嘗奏事帝指政事堂曰非卿尙誰居者是時開府王毛仲寵甚與龍武將軍葛福順相婚嫁毛仲奏請無不從澣乘間曰福順典兵馬與毛仲爲婚家小人寵極則姦生不預圖且有後患高力士小心謹畏加宦人可備禁中驅使腹心所委何必毛仲哉又言君不密失大臣臣不密失身惟陛下密此言帝嘉納且勞曰卿第出我徐計其

宜會大理丞麻察坐事出爲興州別駕澣往餞因道諫語察姦佻遽言狀帝怒召澣入殿中曰卿尙疑朕不密而反告察謂何且察輕躁無行常游太平門者詎不知邪澣免冠頓首謝貶高州良德丞察再貶皇化尉其黨齊數郭稟皆流放久之澣徙索盧丞郴州長史濠常一州刺史遷潤州州北距瓜步沙尾紆匯六十里舟多敗溺澣徙漕路繇京口埭治伊婁渠以達揚子歲無覆舟減運錢數十萬又立伊婁埭官征其入招還流人五百戶置明州以安輯之復徙汴州澣中失勢益悵恨素操寢衰更倚力士助得爲兩道採訪使與利以中天子意衰貨財遺謝貴幸納劉戒女爲妾不答其妻李林甫惡其行欲擠而廢之會其幕府坐職事連澣詔矜澣老放歸田里天寶初召爲太子少詹事留司東都嚴挺之亦爲林甫所廢與澣家居杖屨經過不缺日林甫畏之乃用澣爲平陽太守離其謀更以黃老清靜爲治卒年七十二肅宗時錄林甫所陷者皆褒洗故澣贈禮部尚書澣嘗稱陳希烈宋遙苗晉卿韋述之才後皆大顯麻察者河東人由明經第五遷殿中侍御史魏元忠子昇死節愍太子難而元忠繫大理昇妻鄭父遠嘗納錢五百萬以女易官武后重元忠舊臣欲榮其姻對授遠河內令子洛州叅軍元忠下獄遣人絕婚許之明日嫁其女察劾遠敗風教請錮終身遠遂廢當時謂察爲公而終以儉險斥云澣孫抗

抗字遐舉少值天寶亂奉母夫人隱會稽壽州刺史張鎰辟署幕府抗吏事閑敏有文雅從鎰鎮江西及

以宰相領鳳翔奏署監察御史李楚琳亂奔奉天授侍御史遷戶部員外郎蕭復引為江淮宣尉判官德宗自梁洋還財用大屈鹽鐵使元琇薦抗材改倉部郎中幹鹽利俄為水陸運副使護漕江淮給京師歷諫議大夫坐小累為處州刺史歷蘇州徙潭州觀察使召為給事中遷河南尹進太常卿以中書侍郎同中書門下平章事抗無遠謀大略雖用心至精末乃滋彰苛刻以病乞身罷為太子賓客卒年六十五贈戶部尚書諡曰成初吏部歲考書言以它官第上下中書門下遣官覆實以為常抗以尚書侍郎皆大臣選今更覆覈非任人勿疑之道禮部侍郎試貢士其姻舊悉試考功謂之別頭皆奏罷之又省州別駕田曹司田官判司雙曹者減中書吏員此其稍近治者云

唐書卷一百二十八

唐書卷一百二十九

宋 端 明 殿 學 士 宋 祁 撰

列傳第五十四

裴崔盧李王嚴

裴守真絳州稷山人後魏冀州刺史叔業六世孫父晉隋人業中為淮安司戶參軍郡人楊琳田瓚等亂劫吏多死唯存以仁愛故賊約其屬無敢害護送還鄉守真早孤母喪哀毀癯盡舉進士六科連中累調乾封尉養寡姊謹甚士推其禮法永淳初關中旱悉稟祿奉姊及諸甥與妻息惡食不贍也授太常博士守真善容典時謂才稱其官高宗將封嵩山詔諸儒議射牲事守真奏古者郊祀天地天子自射牲漢武帝封太山令侍中儒者射之帝不親也今按禮前明十五刻宰人鷲刀割牲質明行事毛血已具天子至奠玉酌獻而已今若前祀一日射牲則早於事及日則晚不逮事漢又天子不親古今異宜恐不可行是時破陣慶善二樂舞入帝常立以視須樂闋乃坐守真并言二舞誠祖宗盛德然古無天子立觀者化育詭庇孰非厥功不應鼓舞別甲嚴奉詔可未及行會帝崩大行舊禮無在者守真與博士韋叔夏輔抱素等討按故事稱情為文咸適為宜時人服其得禮天授中為司府丞推覈詔獄多裁恕全免數十姓不合

武后旨出爲汴州司馬遷累成州刺史政不務威嚴吏民兩懷之徙靈州送者千數出境尙不止長安中卒贈戶部尚書子子餘耀卿巨卿曾孫行立耀卿巨卿別有傳

子餘事繼母以孝聞中明經補鄆尉時同舍李朝隱程行誥以文法稱而子餘以儒顯或問優劣於長史陳業業答曰蘭菊異芬胡有廢者景龍中爲左臺監察御史涇岐有隋世番戶子孫數千家司農卿趙履溫奏籍爲奴婢充賜口子餘曰官戶以恩原爲番戶且今又子孫可抑爲賤乎履溫倚宗楚客執辯于廷子餘執對不撓遂誅其議開元初累遷冀州刺史爲政惠裕人稱有恩入爲岐王府長史卒諡曰孝時程行誥諡貞中書令張說歎曰二諡可無媿矣子餘居官清家闈友愛兄弟六人皆有志行云

行立重然諾學兵有法母亡泣血幾毀以軍勞累授沁州刺史遷衛尉少卿口陳願治民試一縣自效除河東令寬猛時當繇斬州刺史遷安南經略使環王國叛人李樂山謀廢其君來乞兵行立不受命部將杜英策討斬之歸其孥蠻人悅服英策及范廷芝者皆谿洞豪也隸于軍它經略使多假借暴恣于治行立陰把其罪貸之許自效故能得英策死力廷芝嘗休沐久不還行立召之約曰軍法踰日者斬異時復然爾且死後廷芝踰期行立管殺之以尸還范氏更爲擇良子弟以代於是威聲風行徙桂管觀察使黃家洞賊叛行立討平之俄代桂仲武爲安南都護銳於立功爲時所嘗召還道卒年四十七贈右散騎常

侍

崔沔字善冲京兆長安人後周隴州刺史士約四世孫自博陵徙焉純謹無二言事親篤孝有才章擢進士舉賢良方正高第不中者誦嘗之武后敕有司覆試對益工遂爲第一再補陸渾主簿入調吏部郎岑羲歎曰君今卻詵也薦爲左補闕性舒遲進止雍如也當官則正言不可得而訕睿宗召授中書舍人以母病東都不忍去固辭求侍更表陸渾尉郭隣太樂丞封希顏處士李喜以代己處詔改虞部郎中俄檢校御史中丞請發太倉粟及減苑囿爲獸所給以賑貧乏人賴其利監察御史宋宣遠與盧懷慎姻家恃以弄法姚崇子彝留司東都通賓客招賄賂沔將按劾崇懷慎方執政共薦沔有史才轉著作郎去其權蓋憚之也久之爲太子左庶子母亡受弔廬前賓客未嘗至樞室語人曰平生非至親不升堂入謁豈以存亡變禮邪中書令張說數稱之服除遷中書侍郎玄宗以仙州數喪刺史欲廢之沔請治舞陽舞陽故樊噲國也更爲樊州帝不納州卒廢沔既喜論得失或曰今中書宰相承制雖侍郎貳之取充位而已沔曰百官分職上下相維以成至治豈可俛首懷祿邪凡詔敕曹事多所異同說不悅出爲魏州刺史雨潦敗稼沔弛禁使人召還分掌吏部十銓以左散騎常侍爲集賢修撰祕書監太子賓客是時太常議加宗廟籩豆又欲增喪服於是卿韋縉請坐增籩豆至十二外祖服大功舅小功堂姨若舅母祖免沔曰

祭祀上矣古者飲食必先嚴獻未有火化故有毛血之薦未有麩麩故有玄酒之奠後王作爲酒醴犧牲以致馨香故有三牲八簋五齊九獻神道主敬可備而不敢廢也雖曰備物而節制存焉鉶俎籩豆簠簋尊罍之寶皆周時饌其用通宴饗賓客而周公與毛血玄酒同薦於先祖晉盧諶家祭禮所薦皆晉時常食不純用古此聖賢變文而通其情也然當時飲食不可闕於祭明矣國家清廟時享禮饌具設周制也古物存焉園寢上食時膳備列漢法也它珍極焉職貢來祭致遠物也有新必薦順時令也苑囿躬稼所收蒐狩親中莫不薦而後食盡誠敬也若此至矣無以加矣諸珍羞雜物第敕有司悉使著于今因宜而薦不必加籩豆以爲嫌也太羹古食也盛於古器和羹常饌也盛於時器毛血盛於盤玄酒盛於罍未有薦時饌而用古器者繇古質而今文便事也故加籩豆未足盡天下美物而措諸廟徒近侈耳魯丹桓宮之楹刻其桷春秋非之班固稱墨家出於清廟是以貴儉然清廟不奢舊矣太常所謂臣所未安又太常言爵小不及合執持至難沔曰禮有以小爲貴者獻以爵是也然今不及制則非禮自有司之陋也隨失制宜不待議而革云又言禮本於家正家正而天下定家不可以貳故父以尊崇母以厭降是以內服齊斬外服緦尊名所加不過一等今古不易之道也昔辛有適伊川見被髮而祭知其將戎禮先亡也比制唐禮推廣舅恩故弘道以來國命再移於外姓本禮驗亡可不戒哉時職方郎中韋述戶部郎中楊伯成

一二號第一百十七

禮部員外郎楊仲昌監門兵曹參軍劉秩等議與沔合又詔中書門下參裁於是宗廟籩豆坐各六媵若舅小功舅母緦麻堂媵袒免餘仍舊制每朝廷有疑議皆咨逮取衷卒年六十七贈禮部尚書諡曰孝沔儉約自持祿粟隨散宗族不治居宅嘗作陋室銘以見志子祐甫至宰相別傳

盧從愿字子襲六世祖昶仕後魏爲度支尚書自范陽徙臨漳故從愿爲臨漳人擢明經爲夏尉又舉制科高第拜右拾遺遷監察御史爲山南黜陟巡撫使還奏稱旨進累中書舍人睿宗立拜吏部侍郎吏選自中宗後綱紀耗蕩從愿精力于官僞牒詭功隨檢無所遺銓總六年以平允聞帝異之特官其一子從愿請贈其父敬一爲鄭州刺史制可初高宗時吏部號稱職者裴行儉馬載及是從愿與李朝隱爲有名故號前有裴馬後有盧李開元四年玄宗悉召縣令策於廷考下第者罷之從愿坐擬選失實下遷豫州刺史政嚴簡奏課爲天下第一寶書勞問賜絹百匹召爲工部侍郎遷尚書左丞中書侍郎以工部尚書留守東都代韋抗爲刑部尚書數充校考使升退詳確御史中丞宇文融方用事將以括田戶功爲上下考從愿不許融恨之乃密白從愿盛殖產占良田數百頃帝自此薄之目爲多田翁後欲用爲相屢矣卒以是止十八年復爲東都留守坐子起居郎論輸糴于官取利多貶降州刺史遷太子賓客二十年河北饑詔爲宣撫處置使發倉廩賑飢民使還乞骸骨授吏部尚書致仕給全祿終身卒贈益州大都督諡曰

文

李朝隱字光國京兆三原人明法中第調臨汾尉擢至大理丞武三思構五王而侍御史鄭愔請誅之朝隱獨以不經鞫實不宜輕用法忤旨貶嶺南醜地宰相韋巨源李嶠言於中宗曰朝隱素清正一日遠逐恐駭天下帝更以爲聞喜令遷侍御史吏部員外郎時政出權幸不關兩省而內授官但斜封其狀付中書卽宣所司朝隱執罷千四百員怨誹譴騰朝隱脾然無避屈遷長安令宦官閭與貴有所干請曳去之睿宗嘉歎後御承天門對百官及朝集使褒諭其能使徧聞之進太中大夫一階賜中上考絹百匹以旌剛烈成安公主奪民園不酬直朝隱取主奴杖之由是權豪斂伏爲執政所擠出通州都督徙絳州刺史開元初遷吏部侍郎銓敘明審與盧從愿並授一子官久之以策縣令有下第降滑州刺史徙同州玄宗東幸召見慰勞賜以衣帛擢河南尹政嚴清姦人不容息太子舅趙常奴怙勢橫閭里朝隱曰此不繩不可爲政執而撈辱之帝賜書慰勉入爲大理卿武彊令裴景仙丐贓五千匹亡命帝怒詔殺之朝隱曰景仙其先寂有國功載初時家爲酷吏所破誅夷略盡而景仙獨存且承嫡於法當請又丐乞贓無死比藉當死坐猶將宥之使私廟之祀無餒魂可也帝不許固請曰生殺之柄人主專之條別輕重有司當守且臧惟枉法抵死今丐贓卽斬後有枉法抑又何加且近發德音杖者聽減流者給程豈一景仙獨過常法

有詔決杖百流嶺南朝隱更授岐州刺史母喪解召爲揚州大都督府長史固辭見聽時年已衰而篤于孝自致毀瘠士人以爲難明年詔書敦遣揚州就職還爲大理卿封金城伯代崔隱甫爲御史大夫天下以其有素望每大夫闕冀朝隱得之及居職不爭引大體惟先細務由是名少衰進太常卿出爲嶺南採訪處置使兼判廣州卒於官贈吏部尚書官給車轎北還諡曰貞

王巨字仲山同皎從子也父同暉終太子左庶子巨十一擢童子科宅童皆專經而獨屬文辭是知名及冠舉制科中第授奉禮郎氣象清古行修潔於詞賦尤高族方慶及魏元忠更薦之自偃師主簿擢監察御史開元初遷考功員外郎考功異時多請託進者濫冒歲數百人巨務覈實材登科纔滿百議者謂自武后至是數十年采錄精明無巨比其後席豫嚴挺之亦有稱然出巨下遷紫微舍人吏部侍郎典選復號平允其獎用如山陰尉孫述桃林尉張鏡微湖城尉張晉明進士王洽然皆一時茂秀久之爲黃門侍郎會山東旱饑議以中朝巨爲刺史制詔臯陶稱在知人在安民皆念存邦本朝朝夕惕無忘一日今長吏或未稱蒼生謂何深思循良以革頽敝宜重刺史之選自朝廷始乃以巨與中書侍郎崔沔等並爲山東刺史而巨守懷州尤清嚴爲下畏慕入知吏部選改尚書左丞以父喪解服除爲右散騎常侍仍知制誥裴光廷卒蕭嵩與巨善將引與當國巨固辭盛推韓休行能及休秉政薦爲御史大夫巨訥於言所

白奏帝多不喜改太子賓客襲父封以疾徙禮部尙書致仕且更履華劇而所守清約未嘗通饋遺室宅童騎傲陋既老藥餌不自給帝歎之以謂有古人節下制給全祿以旌潔吏天寶二載卒贈荊州大都督諡曰文

嚴挺之名凌以字行華州華陰人少好學姿質軒秀舉進士并擢制科調義興尉號材吏姚崇爲州刺史異之崇執政引爲右拾遺睿宗好音律每聽忘劬先天二年正月望夜胡人婆陁請然百千燈因弛門禁又追賜元年醕帝御延喜安福門縱觀晝夜不息閱月未止挺之上疏諫以爲醕者因人所利合醕爲歡也不使靡傲今暴衣冠羅伎樂雜鄭衛之音縱倡優之玩不深戒慎使有司跛倚下人罷劇府縣里閭課賦苛嚴呼嗟道路買壞家產營百戲擾方春之業欲同其樂而反遭之患乃陳五不可誠意忠到帝納焉侍御史任正名恃風憲至廷中責詈衣冠挺之讓其不敬反爲所劾貶萬州員外參軍事開元中爲考功員外郎累進給事典貢舉時號平允會杜暹李元紘爲相不相中暹善挺之而元紘善宋遙用爲中書舍人遙校吏部判取捨與挺之異言於元紘元紘屢詰譙挺之厲言曰公位相國而愛憎反任小人乎元紘曰小人爲誰曰宋遙也繇是出爲登州刺史改太原少尹初殿中監王毛仲持節抵太原朔方籍兵馬後累年仍移太原取兵仗挺之不肯應且以毛仲寵幸久恐有變密啟於帝俄改濮汴二州刺史所治皆

嚴威吏至重足脅息會毛仲敗死帝以挺之言忠召爲刑部侍郎遷太府卿宰相張九齡雅知之用尙尙書左丞知吏部選李林甫與九齡同輔政以九齡方得君諂事之內實不善也戶部侍郎蕭冕林甫所引不知書嘗與挺之言稱蒸嘗伏臘乃爲伏獵挺之白九齡省中而有伏獵侍郎乎乃出見岐州刺史林甫恨之九齡欲引以輔政使往謁林甫挺之負正陋其爲人凡三年非公事不造也林甫益怨會挺之有所諉於蔚州刺史王元琰林甫使人暴其語禁中下除洛州刺史徙絳州天寶初帝顧林甫曰嚴挺之安在此其材可用林甫退召其弟損之與道舊諄諄歎曲且許美官因曰天子視絳州厚要當以事自解歸得見上且大用因給挺之使稱疾願就醫京師林甫已得奏卽言挺之春秋高有疾幸閑官得自養帝恨叱久之乃以爲員外詹事詔歸東都挺之鬱鬱成疾乃自爲文誌墓遺令薄葬歛以時服挺之重交游許與生死不易嫁故人孤女數十人當時重之然溺志于佛與浮屠惠義善義卒衰服送其喪已乃自葬於其塔左君子以爲偏子武

武字季鷹幼豪爽母裴不爲挺之所答獨厚其妾英武始八歲怪問其母母語之故武奮然以鐵鎚就英寢碎其首左右驚白挺之曰郎戲殺英武辭曰安有大臣厚妾而薄妻者兒故殺之非戲也父奇之曰真嚴挺之子然數禁敕武讀書不甚究其義以陰調太原府參軍事累遷殿中侍御史從玄宗入蜀擢諫議

大夫至德初赴肅宗行在房瑄以其名臣子薦爲給事中已收長安拜京兆尹坐瑄事貶巴州刺史久之遷東川節度使上皇合劍南爲一道擢武成都尹劍南節度使遷拜京兆尹爲二聖山陵橋道使封鄜國公遷黃門侍郎與元載厚相結求宰相不遂復節度劍南破吐蕃七萬衆于當狗城遂收鹽川加檢校吏部尚書武在蜀頗放肆用度無藝或一言之悅賞至百萬蜀雖號富饒而峻陪亟斂閭里爲空然虜亦不敢近境梓州刺史章彝始爲武判官因小忿殺之瑄以故宰相爲巡內刺史武慢倨不爲禮最厚杜甫然欲殺甫數矣李白爲蜀道難者乃爲房與杜危之也永泰初卒母哭且曰而今而後吾知免爲官婢矣年四十贈尚書左僕射

挺之從孫綬綬父丹嘗爲劍南鹽鐵青苗租庸使以武在蜀辭不拜綬擢進士第以侍御史副劉贊爲宣歙團練使贊卒綬總留事悉庫物以獻召爲刑部員外郎賓佐進奉由綬始河東節度使李說病軍司馬鄭儂總其政說卒代爲節度時德宗務姑息方鎮若帥死不它命卽用軍司馬代之以和厭衆情至是帝頗憶綬所獻故擢爲河東司馬明年儂卒卽檢校工部尚書代其使憲宗立楊惠琳反夏州劉闢反蜀綬建言天子始卽位不可失威請必誅選銳兵遣大將李光顏助討賊二賊平檢校尚書左僕射封扶風郡公進司空在鎮九年尚寬惠治稱流聞士馬孳息嘗大閱旗幟周七十里回鶻梅錄將軍在會聞金鼓震

二號第一百十八批

伏入爲尚書右僕射綬旣名胄於吏事有方略然銳進趣素議薄之始就廊下食在百官上帝使中人賜舍桃綬見拜之爲御史劾奏綬慙懼待罪詔釋綬而貶中人出爲荆南節度使封鄆國公涿州蠻張伯靖殺吏據辰錦州連九洞自固詔綬進討綬勒兵出次遣將齋檄開曉羣蠻悉降吳元濟反僉以綬明恕可大事乃徙山南東道節度使加淮西招撫使綬引師壓賊境多出金帛賞士以厚賂謝中人招聲援旣未有以制賊閉屯彌年不戰宰相裴度謂綬非將才以太子少保召還檢校司徒判光祿卿事進少傅卒年七十七贈太保綬才不踰中人然歷三鎮所奏辟及綬時位將相者九人初綬未顯過于闐鄉尉李達達不禮方飯它客不召綬後達罷彭城令過并州晨入謁不知綬也綬方大宴賓客召達至戒客勿起讓曰吾昔羈旅閩鄉君方召客食而不顧我今我召客亦不敢留君達慙不得去左右引出憚而瘖臥館數月其佐令狐楚爲請乃免河東李進賢者善畜牧家高貲得幸於綬署牙門將元和中進賢累爲振武節度使辟綬子澈爲判官澈年少治苛刻軍中苦之回鶻入辟鷄泉進賢發兵討之吏稟糧不實次鳴砂焚殺其將楊遵憲而還進賢大怒衆懼因燔城門攻進賢左右拒戰不勝縋而去奔靖邊軍乃殺澈而屠進賢家詔以夏綬銀節度張煦代之誅亂首數百人乃定

唐書卷一百二十九

唐書卷一百二十九考證

裴守真傳不合武后旨出爲汴州司馬○舊書作汴州司錄

崔沔傳戶部郎中楊伯成○舊書作陽伯城

李朝隱傳諡曰貞○舊書作諡曰哀

嚴挺之從孫綬檢校司徒判光祿卿事○舊書作尋檢校司空

唐書卷一百二十九考證

唐書卷一百三十

宋 端 明 殿 學 士 宋 祁 撰

列傳第五十五

裴陽宋楊崔李解

裴灌絳州聞喜著姓父瑗之永徽中為同州司戶參軍年甚少不主曹務刺史李崇義內輕之鑄諭曰同
 三輔吏事繁子盍求便官毋留此瑗之唯唯吏白積案數百崇義讓使趣斷瑗之曰何至逼人乃命吏連
 紙進筆為省決一日畢既與奪當理而筆詞勁妙崇義驚曰子何自晦成吾過耶由是名動一州號霹靂
 手後為承年令有惠政吏刻石頌美以倉部郎中病廢灌侍疾十餘年不肯仕瑗之沒始擢明經調陳留
 主簿遷監察御史時崔湜鄭愔典吏部坐姦職為李尚隱所劾詔灌按訊而安樂公主上官昭容為阿右
 灌執正其罪天下稱之累進中書舍人睿宗造金仙玉真二觀時旱甚役不止灌上言春夏母聚大眾起
 大役不可興土功妨農事若役使乖度則有疾疫水旱之災此天人常應也今自冬徂春雨不時降人心
 懔然莫知所出而土木方興時暵之孽職為此發且東作云始丁壯就功妨多益少飢寒有漸春秋莊公
 三十一年冬不雨是時歲三築臺僖公二十一年夏大旱是時作南門陛下以四方為念宜下明制令二

京營作和市木石一切停止有如農桑失時戶口流散雖寺觀營立能救飢寒做哉不報遷兵部侍郎以銓總勞特授一子官開元五年爲吏部侍郎甄拔士爲多拜御史大夫灌雅與張說善說方宰相數薦之灌長於數奏天子亦自重焉擢吏部尚書世儉素而晚節稍畜伎妾爲奢侈事議者以爲闕改太子賓客卒贈禮部尚書諡曰懿從祖弟寬

寬性通敏工騎射彈碁投壺略通書記景雲中爲潤州參軍事刺史韋詵有女擇所宜歸會休日登樓見人於後圃有所瘞藏者訪諸吏曰參軍裴寬居也與偕來訊問狀答曰寬義不以包苴汙家適有人以鹿爲餉致而去不敢自欺故瘞之詵嗟異乃引爲按察判官許妻以女歸語妻曰常求佳婿今得矣明日幃其族使觀之寬時衣碧瘳而長旣入族人皆笑呼爲碧鶴雀詵曰愛其女必以爲賢公侯妻也何可以貌求人卒妻寬舉拔萃爲河南丞遷長安尉宇文融爲侍御史括天下田奏爲江東覆田判官改太常博士禮部建言忌日享廟應用樂寬自以情立議曰廟尊忌卑則作樂廟卑忌尊則備而不奏中書令張說是之請如寬議遷刑部員外郎萬騎將軍馬崇白日殺人而王毛仲方以貴倖將鬻其獄寬固執不肯從河西節度使蕭嵩表爲判官歷兵部侍郎宰相裴耀卿領江淮運列倉河陰奏寬爲戶部侍郎自副遷吏部出爲蒲州刺史久旱寬入境輒雨徙河南尹不屈附權貴河南大治繇金吾大將軍授太原尹玄宗賦

詩褒饒天寶初由陳留太守拜范陽節度使時北平軍使烏承恩虜酋也與中人通數冒賄寬以法繩治檀州刺史何僧獻生口數十寬悉歸之故夷夏感附三載用安祿山守范陽召寬爲戶部尚書兼御史大夫裴敦復平海賊還廣張功簿寬密白其妄會河北部將入朝盛譽寬政且言華虜猶思之帝嗟賞瞻倚加厚李林甫恐其遂相又惡寬善李適之乃漏寬語以激敦復敦復任氣而疎以林甫爲誠先是寬以所善請於敦復即欲白發其言林甫趣之敦復未及聞扈幸溫泉宮而其下裨將程藏曜曹鑿自以他事繫臺寬捕按之敦復謂寬求致其罪遠以金五百兩賂貴妃姊因得事聞於帝由是貶寬睢陽太守及韋堅獄起寬復坐親貶安陸別駕林甫任羅希奭殺李適之也亦使過安陸將恠殺寬寬叩頭祈哀希奭乃去寬懼終見殺丐爲浮屠不許稍遷東海太守徙馮翊入爲禮部尚書卒年七十五贈太子太傅寬兄弟八人皆擢明經任臺省州刺史雅性友愛於東都治第八院相對甥姪亦有名稱擊鼓會飯其爲政務清簡所莅人愛之世皆冀其得宰相天寶間稱舊德以寬爲首然惑于佛喜與桑門游習誦其書老彌篤云

子潛

潛字士明擢明經調河南參軍事性通綽舉止不順累遷京兆倉曹參軍號王巨表署襄鄧營田判官母喪居東都會史思明亂逃山谷間思明故爲寬將德寬舊恩且聞潛名遣捕騎跡獲之喜甚呼爲郎君僞

授御史中丞賊殘殺宗室誦陰緩之全活者數百人又嘗疏賊虛實於朝事泄思明恨罵危死而免賊平除太子中允遷考功郎中數燕見奏事代宗幸陝謂徒步挾考功南曹印赴行在帝曰疾風知勁草果可信將用爲御史中丞爲元載沮却故拜河東租庸鹽鐵使時關輔旱謂入計帝召至便殿問權酷利歲出內幾何謂久不對帝復問曰臣有所思帝曰何邪謂曰臣自河東來涉三百里而農人愁嘆穀菽未種誠謂陛下軫念元元先訪疾苦而乃責臣以利孟子曰治國者仁義而已何以利爲故未敢卽對帝曰微公言朕不聞此拜左司郎中數訪政事載忌之出爲虔州刺史歷饒盧亳三州除右金吾將軍德宗新卽位以刑名治天下百吏震服時大行將薨陵事禁屠殺尙父郭子儀家奴宰羊謂列奏帝謂不畏疆禦善之或曰尙父有社稷功豈不爲庇之謂笑曰非君所知尙父方貴盛上新卽位必謂黨附者衆今發其細過以明不恃權耳吾上以盡事君之道下以安大臣不亦可乎時朝堂別置三司決庶獄辯爭者輒擊登聞鼓謂上疏曰諫鼓謗木之設所以達幽枉延直言今詭猾之人輕動天聽爭纖微若然者安用吏治乎帝然之於是悉歸有司謂惡法吏舞文或挾宿怨爲重輕因獻獄官箴以諷坐所善誅貶閬州司馬俄召爲太子右庶子進兵部侍郎至河南尹東都副留守凡五世爲河南謂視事未嘗敢當正處以寬厚和易爲治不鞠人以贓卒年七十五贈禮部尙書

寬弟子胄字盾叔擢明經佐李抱玉鳳翔幕府不得意謝歸更從宣歙觀察使陳少游抱玉怒劾貶桐廬尉時李栖筠觀察浙西幕府皆一時高選判官許鳴謙名知人見崔造及胄器之白栖筠取胄爲支使代宗惡宰相元載怙權召栖筠爲御史大夫欲以相栖筠引胄殿中侍御史尤爲載所惡會栖筠卒胄護喪歸洛陽人爲危之胄屹然不沮愾少游復表爲淮南觀察判官載誅始拜刑部員外郎遷宣州刺史楊炎當國爲載復讎窮摭所惡會胄部人積胄雜奉爲贓炎遣員寓蔓劾峭詆貶汀州司馬稍遷京兆少尹以父名不拜換國子司業遷江西觀察使初李兼嘗罷南昌卒千餘人收資稟爲月進胄白罷之樊澤徙襄州宰相議所代德宗雅記胄才遂拜荆南節度使是時方鎮爭剝下希恩製重錦異綾名貢奉有中使者卽悉公帑市歡胄待之有節獻餉直不數金宴勞止三爵是時武臣多粗暴庸人待賓介不以禮少失意則以罪中傷之胄亦劾斥其管記世恨胄之流于俗卒年七十五贈尙書右僕射諡曰成

陽嶠其先北平人世徙洛陽北齊尙書右僕射休之四世孫舉八科皆中調將陵尉累遷詹事司直長安中左右御史中丞桓彥範袁恕己爭取爲御史楊再思素與嶠善知其意不樂彈抨事爲語彥範曰爲官擇人豈待情樂乎唯不樂者固與之以伸難進抑躁求也遂爲右臺侍御史久乃遷國子司業嶠資謹飭好學喜誘勸後生修講舍人以爲善職睿宗立進尙書右丞時議建都督府擇最吏故嶠爲涇州都

督議罷歷魏州刺史荊州長史本道按察使率以清白聞魏州人勢耳闕下請嶠為刺史故再治魏入為國子祭酒封北平縣伯引尹知章范行恭趙玄默為學官皆名儒冠云生徒游惰者至督以鞭楚人怨之乘夜毆嶠道中事聞詔捕毆者殺之嶠撫孤姪與子均常語人曰吾備位方伯而心亦昔時一尉耳以老致仕卒諡曰敬

宋慶禮洛州永平人擢明經補衛尉武后詔侍御史桓彥範行河北鄣斷居庸五回等路以支突厥召慶禮與議見其方略器之俄遷大理評事為嶺南採訪使時崖振五州首領更相掠民苦于兵使者至輒苦瘡痍莫敢往慶禮身到其境諭首領大誼皆釋仇相親州土以安罷戍卒五千歷監察殿中侍御史以習識邊事拜河東河北營田使善騎日能馳數百里性甘於勞苦然好興作濱塞掘穿植兵以邀虜徑議者蚩其不切事稍遷貝州刺史復為河北支度營田使初營州都督府治柳城扼制奚契丹武后時趙文翹失兩蕃情攻殘其府更治東漁陽城玄宗時奚契丹款附帝欲復治故城宋璟固爭不可獨慶禮執處其利乃詔與太子詹事姜師度左驍衛將軍邵宏等為使築栽三旬畢俄兼營州都督開屯田八十餘所追拔漁陽淄青沒戶還舊田宅又集商胡立邸肆不數年倉廩充居人蕃輯卒贈工部尚書慶禮為政嚴少私吏畏威不敢犯太常博士張星以好巧自是諡曰專禮部員外郎張九齡申駁曰慶禮國勞臣在邊垂

三十年往城營州士纔數千無甲兵疆衛指期而往不失所慮遂罷海運收歲儲邊亭晏然其功可推不當醜諡慶禮兄子辭玉亦自詣闕訴改諡曰敬

楊瑒字瑤光華州華陰人五世祖縉為陳中書舍人名屬文終交愛九州都督武康郡公子林甫代領都督隋滅陳踰三年乃降徙長安林甫字衛卿為柳城太守高祖軍興遣其子琮招之挈郡以來授檢校總管足疾不能造朝帝以絳州寒涼拜刺史累封宜春郡公琮字孝璋為上津令會天下亂去官與秦王同里居武德初為王府參軍兼庫直隱太子事平詔親王宰相一人入宴而琮獨預太宗賜懷昔賦申以恩意歷沔綏二州刺史姆饋孺子以餅妻偽受而棄之垣外人咨其廉瑒始為麟游令時竇懷貞大營金仙玉真二觀檄取畿內嘗負逆人貲者暴斂之以佐費瑒拒不應懷貞怒曰縣令而拒大夫命乎瑒曰所論者民冤抑也位高下乎何取懷貞壯其對為止初韋后表民二十二為丁限及敗有司追趣其課瑒執不可曰韋氏當國擅擢士大夫赦罪人皆不改奚獨取己寬之人重斂其租非所以保下之宜遂止不課由是名顯當世擢累侍御史京兆尹崔日知食香不法瑒與大夫李傑謀劾舉之反為日知先構瑒廷奏曰肅繩之司一為恐脅所屈開姦人謀則御史府可廢玄宗直之令傑還視事而逐日知瑒進歷御史中丞戶部侍郎帝常召宰相大臣議天下戶版延英殿瑒言利病尤詳帝咨賞於是宇文融建檢脫戶餘口瑒

執不便融方貴公卿哢默唯唯獨瑒抗議故出爲華州刺史帝封太山集樂工山下居喪者亦在行瑒謂起直經使和鍾律非人情所堪帝許乃免入爲國子祭酒表大儒王迥質尹子路白履忠等三人教授國子有詔迥質諫議大夫皇太子侍讀履忠老不任職拜朝散大夫罷歸子路直弘文餘皆有名瑒奏有司帖試明經不質大義乃取年頭月尾孤經絕句且今習春秋三家儀禮者纔十二恐諸家廢無日請帖平文以存學家其能通者稍加優賞孤學從之因詔以三家傳儀禮出身者不任散官遂著令生徒爲瑒立頌太學門又言古者卿大夫子弟及諸侯歲貢小學之異者入太學漸漬禮樂知朝廷君臣之序班以品類分以師長三德四教學成然後爵之唐興二監舉者千百數當選者十之二考功覆校以第謂經明行修故無多少之限今考功限天下明經進士歲百人二監之得無幾然則學徒費官粟而博士濫天祿者也且以流外及諸色仕者歲二千過明經進士十倍胥史浮虛之徒旣先王禮義非得與服勤道業者挈長短絕輕重也國家啟庠序廣化導將有以用而勸進之有司爲限約以黜退之欲望俊乂在朝難矣帝然其言再遷大理卿以疾辭改左散騎常侍卒年六十八贈戶部尚書諡曰貞瑒常歎士大夫不能用古禮因其家冠婚喪祭乃据舊典爲之節文揖讓威儀哭踊衰殺無有違者在官清白吏請立石紀德瑒曰事益於人書名史氏足矣若碑頌者徒遺後人作訂石耳瑒伯父志操頗剛簡未遇時著閑居賦自託

常曰得田十頃僮婢十人下有兄弟布粟之資上可供先公伏臘足矣位終司屬卿安平縣男瑒從父兄晏精孝經學常手寫數十篇可教者輒遺之

崔隱甫貝州武城人隋散騎侍郎儻曾孫解褐左玉鈐衛兵曹參軍遷殿中侍御史內供奉浮屠惠範倚太平公主脅人子女隱甫劾狀反爲所擠貶邛州司馬玄宗立擢汾州長史兼河東道支度營田使遷洛陽令梨園弟子胡鸞善笛有寵嘗負罪匿禁中帝以他事召隱甫從容指曰就卿丐此人對曰陛下輕臣而重樂工請解官再拜出帝遽謝與胡鸞隱甫殺之有詔貫死不及矣賜隱甫百緡孫佺敗績于奚擢隱甫并州司馬護邊會兄逸甫疾甚未及行詔責逗留下除河南令累拜華州刺史太原尹入爲河南尹居三歲進拜御史大夫初臺無獄凡有囚則繫大理貞觀時李乾祐爲大夫始置獄由是中丞侍御史皆得繫人隱甫執故事廢掘諸獄其後患囚往來或漏泄復繫之廚院云臺中自監察御史而下舊皆得顯事無所承詔隱甫始一切令歸寔乃得行有忤意輒劾正多貶絀者臺吏側目威名赫然帝嘗詔校外官歲考異時必委曲參審竟春未定隱甫一日會朝集使詢逮檢實其暮皆訖議者服其敏帝嘗謂曰卿爲大夫天下以爲稱職張說嘗國隱甫素惡之乃與中丞宇文融李林甫暴其過不宜處位說賜罷然帝嫉朋黨免其官使侍母歲餘復爲大夫遷刑部尚書兼河南尹帝還京師卽拜東都留守累封清河郡公卒贈

益州大都督諡曰忠始帝欲相隱甫也謂曰牛仙客可與語卿常見否對曰未也帝曰可見之隱甫終不詣他日又問對如初帝乃不用子弟或問故答曰吾不以其人微易之也其材不遠中人可與之對耶隱甫所至潔介自守明吏治在職以強正稱云

贊曰嚴挺之拒宰相不肯見李林甫崔隱甫違詔不屈牛仙客信剛者乎二人坐是皆不得相彼亦各申其志也管夷吾以編棧諭之信曲與直不相函哉

李尚隱其先出趙郡徙貫萬年年二十舉明經再調下邳主簿州刺史姚班說其能器之神龍中左臺中丞侯令德爲關內黜陟使尚隱佐之以最擢左臺監察御史於是崔湜鄭愔典吏部選附勢倖銓擬不平至逆用三年員闕材廉者輒不進俄而相踵知政事尚隱與御史李懷讓顯劾其罪湜等皆斥去睦州刺史馮昭泰性鷲刻人憚其彊嘗誣繫桐廬令李師旦二百餘家爲妖蠱有詔御史覆驗皆稱病不肯往尚隱曰善其方蒙枉不爲申明可乎因請行果推雪其冤湜愔復當路乃出尚隱爲伊闕令懷讓魏令湜等伏誅玄宗知尚隱方嚴繇定州司馬擢吏部員外郎懷讓自河陽令拜兵部員外郎懷讓蒞人後歷給事中尚隱以將作少監營橋陵封高邑縣男未幾進御史中丞御史王旭招權稍不制仇家告其罪尚隱窮治具得姦贓無假借遂抵罪進兵部侍郎俄出爲蒲州刺史浮屠懷照者自言母夢日入懷生已鏤石

喻聞人馮待徵等助實其言尚隱劾處妖妄詔流懷照播州再遷河南尹尚隱性剛亮論議皆披心示誠處事分明御下不苟密尤詳練故實前後制令誦記略無遺妖賊劉定高夜犯通洛門尚隱坐不素覺左遷桂州都督帝遣使勞曰知卿忠公然國法須爾因賜雜綵百匹遣之遷廣州都督五府經略使及還人或要金以贈尚隱曰吾自性分不可易非畏人知也代王巨爲御史大夫時司農卿陳思問引屬吏多小人乾隱錢穀尚隱按其違贓累鉅萬思問流死嶺南改尚隱太子詹事不閱旬進戶部尚書前後更楊益二州長史東都留守爵高邑伯開元二十八年以太子賓客卒年七十五諡曰貞尚隱三入御史府輒繩惡吏不以殘孽失名所發當也素議歸重仕官未嘗以過譎惟劾詆幸臣及坐小法左遷復見用以循吏終始云自開元二十二年置京畿採訪處置等使用中丞盧奐爲之尚隱以大夫不充使永泰以後大夫王翊崔渙李涵崔靈虛杞乃爲之

解琬魏州元城人舉幽素科中之調新政尉後自成都丞奏事稱旨躡除監察御史以喪免武后顧琬習邊事追追西撫羌夷琬因乞終喪后嘉許之詔服除赴屯遷侍御史安撫烏質勒及十姓部落以功擢御史中丞兼北廷都護西域安撫使琬與郭元振營宗楚客惡之左授滄州刺史爲政引大體部人順附景龍中遷御史大夫兼朔方行軍大總管前後乘邊積二十年大抵務農習戰多爲長利華虞安之景雲二

年復爲朔方軍大總管分遣隨軍要籍官河陽丞張冠宗肥鄉令章景駿普安令于處忠料三城兵省其
戍十萬人改右武衛大將軍兼檢校晉州刺史濟南縣男以老丐骸骨不待報輒去優詔以金紫光祿大
夫聽致仕準品給全祿璽書勞問會吐蕃騷邊復召授左散騎常侍詔與虜定經界因諧輯十姓降戶琬
建言吐蕃不可以信約請調兵十萬屯秦渭間防遏其姦是冬吐蕃果入寇爲秦渭兵擊走之俄復請老
不許遷太子賓客年八十餘開元五年終同州刺史

唐書卷一百三十

唐書卷一百三十考證

裴灌弟寬刺史韋饒有女擇所宜歸○沈炳震曰舊書刺史韋饒爲按察使引爲判官以女妻之官與名
俱不合

贈太子太傅○舊書作贈太子少傅

李尚隱傳刺史姚班說其能器之○

臣德潛

按舊書時姚瑱爲同州刺史甚禮之

神龍中左臺中丞侯令德爲關內黜陟使尚隱佐之○沈炳震曰舊書景龍中爲左臺監御史

代王邱爲御史大夫○舊書作代王鋹爲御史大夫

東都留守爵高邑伯○

臣德潛

按新書在代王邱爲御史大夫後舊書在代王鋹前

唐書卷一百三十一

宋 端 明 殿 學 士 宋 祁 撰

列傳第五十六

宗室宰相

李適之恆山愍王孫也始名昌神龍初擢左衛郎將開元中遷累通州刺史以辦治聞按察使韓朝宗言諸朝擢秦州都督徙陝州刺史河南尹其政不苟細為下所便玄宗患穀洛歲暴耗徭力詔適之以禁錢作三大防曰上陽積翠月陂自是水不能患刻石著功詔永王璘書皇太子瑛署額進御史大夫二十七

年兼幽州長史知節度事適之以祖被廢而父象見逐武后時葬有闕至是丐陪瘞昭陵闕中詔可褒冊典物焜照都邑行道為咨歎遷刑部尚書適之喜賓客飲酒至斗餘不亂夜宴娛晝決事案無留辭天寶元年代牛仙客為左相累封清河縣公嘗與李林甫爭權不協林甫陰賊即好謂適之曰華山生金采之可以富國顧上未之知適之性疏信其言他日從容為帝道之帝喜以問林甫對曰臣知之舊矣顧華山陛下本命王氣之舍不可以穿治故不敢聞帝以林甫為愛己而薄適之不親於是皇甫惟明韋堅裴寬韓朝宗皆適之厚善悉為林甫所構得罪適之懼不自安乃上宰相求散職以太子少保罷欣然自以為

免禍俄坐章堅累貶宜春太守會御史羅希夷陰被詔殺堅等貶所州縣震恐及過宜春適之懼仰藥自殺

李峴吳王恪孫也折節下士長吏治天寶時累遷京兆尹玄宗歲幸溫湯旬內巧供億以媚上峴獨無所獻帝異之楊國忠使客齎昂何盈適安祿山陰事諷京兆捕其第得安岱李方來等與祿山反狀縊殺之祿山怒上書自言帝懼變出峴為零陵太守峴為政得人心時京師米翔貴百姓乃相與謠曰欲粟賤追李峴尋徙長沙永王為江陵大都督假峴為長史至德初肅宗召之拜扶風太守兼御史大夫明年擢京兆尹封梁國公乾元二年以中書侍郎同中書門下平章事於是呂諲李揆第五琦同輔政而峴位望最舊事多獨決諲等不平李輔國用權制詔或不出中書百司莫敢覆峴頓首帝前極言其惡帝悟稍加檢制輔國由是讓行軍司馬然深銜峴鳳翔七馬坊押官盜掠人天興令謝夷甫殺之輔國諷其妻使訴枉詔監察御史孫鑿鞫之直夷甫其妻又訴詔御史中丞崔伯陽刑部侍郎李暉大理卿權獻為三司訊之無異辭妻不承輔國助之乃令侍御史毛若虛覆按若虛委罪夷甫言御史用法不端伯陽怒欲質讓若虛馳入自歸帝帝留若虛簾中頃伯陽等至劾若虛傳中人失有罪帝怒叱之貶伯陽高要尉權獻杜陽尉逢李暉嶺南流鑿播州峴謂責太重入言於帝曰若虛希旨用刑亂國法陛下信為重輕示無御史臺

帝怒李揆不敢爭乃出峴為蜀州刺史時右散騎常侍韓擇木入對帝曰峴欲專權耶乃云任毛若虛示無御史臺朕今出之尙恨法太寬擇木曰峴言直不敢專權陛下寬之祇益盛德耳代宗立改荆南節度知江淮選補使入為禮部尙書兼宗正卿乘輿在陝由商山走帝所還京拜門下侍郎同中書門下平章事故事政事堂接客自元載為相中人傳詔者引升堂置榻待之峴至卽敕吏撤榻又奏常參官舉才任諫官憲官者無限員不踰月為要近譖短遂失恩罷為太子詹事遷吏部尙書復知江淮選改檢校兵部尙書兼衢州刺史卒年五十八初東京平陳希烈等數百人待罪議者將悉抵死帝意亦欲懲天下故崔器等附致深文峴時為三司獨曰法有首有從情有重有輕若一切論死非陛下與天下惟新意且羯胡亂常誰不凌汗衣冠奔亡各顧其生可盡責邪陛下之親戚勳舊子若孫一日皆血鈇砧尙為仁恕哉書稱殲厥渠魁脅從罔治況河北殘孽劫服官吏其人尙多今不開自新之路而盡誅之是堅叛者心使為賊致死困獸猶鬪況數萬人乎於是器與呂諲皆齟齬文吏操常議不及大體尙騰頰固爭數日乃見聽衣冠蒙更生賊亦不能使人歸怨天子峴力也峴兄峴嶧峴從上皇峴翊戴肅宗以勳力相高同時為御史大夫俱判臺事又合制封公而峴為戶部侍郎銀青光祿大夫同居長興里第門列三戟

李勉字玄卿鄭惠王元懿曾孫父擇言累為州刺史封安德郡公以吏治稱張嘉貞為益州都督性簡貴

接部刺史偃甚擇言守漢州獨引同榻坐講釋政事名重當時勉少喜學內沈雅外清整始調開封尉汴州水陸一都會俗龐錯號難治勉摧姦決隱爲有名從肅宗於靈武擢監察御史時武臣囑與無法度大將管崇嗣背闕坐笑語譁縱勉劾不恭帝歎曰吾有勉乃知朝廷之尊遷司膳員外郎關東獻俘百將即死有歎者勉過問曰被脅而官非敢反勉入見帝曰寇亂之汙半天下其欲澡心自歸無繇如盡殺之是驅以助賊也帝馳騎宥後歸者日至累爲河東王思禮朔方河東都統李國貞行軍司馬進梁州刺史勉假王晬南鄭令晬爲權幸所誣詔誅之勉曰方藉牧宰爲人父母豈以讒殺良吏乎卽拘晬爲請得免晬後以推擇爲龍門令果有名羌渾奴刺寇州勉不能守召爲大理少卿然天子素重其正擢太常少卿欲遂柄用而李輔國諷使下己勉不肯乃出爲汾州刺史歷河南尹徙江西觀察使厲兵睦鄰平賊屯部人父病爲蠱求厭者以木偶署勉名埋之掘治驗服勉曰是爲其父則孝也縱不誅入爲京兆尹兼御史大夫魚朝恩領國子監威寵震赫前尹黎幹諂事之須其入敕吏治數百人具以餉至是吏請勉不從曰吾候太學彼當見享軍容幸過府則修具朝恩銜之亦不復至太學尋拜嶺南節度使番禺賊馮崇道桂叛將朱濟時等負險爲亂殘十餘州勉遣將李觀率容州刺史王翊討斬之五嶺平西南夷船歲至纔四五譏視苛謹勉旣廉潔又不暴征明年至者乃四千餘椹居官久未嘗妓飾器用車服後召歸至石門盡

搜家人所蓄犀珍投江中時人謂可繼宋璟盧象李朝隱部人叩闕請立碑頌德代宗許之進工部尙書封沂國公滑毫節度使令孤彰且死表勉爲代從之勉居鎮且八年以舊德方重不威而治東諸帥暴桀者皆尊憚之田神玉死詔勉節度汴宋未行汴將李靈耀反魏將田悅以兵來叩汴而屯勉與李忠臣馬燧合討之淮西軍據汴北河陽軍壁其東大將杜如江尹伯良與悅戰匡城不勝徙壘與靈耀合忠臣將軍李重倩夜攻其營與河陽軍合譟賊不陣潰悅走河北靈耀奔韋城爲如江所禽勉縛以獻斬闕下旣而忠臣專汴故勉還滑臺明年忠臣爲麾下所逐復詔勉移治汴德宗立就加同中書門下平章事俄爲汴宋滑毫河陽等道都統建中四年李希烈圍襄城詔勉出兵救之帝又遣神策將劉德信以兵三千援接勉奏言賊以精兵攻襄城而許必虛令兵直擣許則襄圍解不待報使其將唐漢臣與德信襲許未至數十里有詔請讓二將懼而還次扈澗不設備爲賊所乘殺傷什五輜械盡亡漢臣走汴德信走汝勉懼東都危復遣兵四千往戍賊斷其後不得歸於是希烈自將攻勉勉氣索嬰守累月援莫至哀兵萬人潰圍出東保睢陽興元元年勉固讓都統以檢校司徒平章事召旣見帝素服待罪詔不許勉內愧取充位而已不敢有所與貞元初帝起盧杞爲刺史袁高還詔不得下帝問勉曰衆謂盧杞姦邪朕顧不知謂何勉曰天下皆知而陛下獨不知此所以爲姦邪也時雖其對然自是益見疏居相二歲辭位以太子太師

罷卒年七十二贈太傅諡曰貞簡勉少貧狹客梁宋與諸生共逆旅諸生疾且死出白金曰左右無知者幸君以此爲我葬餘則君自取之勉許諾既葬密置餘金棺下後其家謁勉共啟墓出金付之位將相所得奉賜悉遺親黨身沒無贏藏其在朝廷鯁亮廉介爲宗臣表禮賢下士有終始嘗引李巡張參在幕府後二人卒至宴飲仍設虛位沃饋之遣戍兵常視其資糧春秋存問家室故能得人死力善鼓琴有所自製天下寶之樂家傳譽泉韻磬勉所愛者

李夷簡字易之鄭惠王元懿四世孫以宗室子始補鄭丞德宗幸奉天朱泚外示迎天子遣使東出關至華侯吏李翼不敢問夷簡謂曰泚必反向發幽隴兵五千救襄城乃賊舊部是將追還耳上越在外召天下兵未至若凶狡還西助泚送死危禍也請驗之翼馳及潼關果得召符白于關大將駱元光乃斬賊使收偽符獻行在詔卽拜元光華州刺史元光掠功故無知者夷簡棄官去擢進士第中拔萃科調藍田尉遷監察御史坐小累下遷虔州司戶參軍九歲復爲殿中侍御史元和時至御史中丞京兆尹楊憑性鷲倪始爲江南觀察使冒沒于財夷簡爲屬刺史不爲憑所禮至是發其貪憑貶臨賀尉夷簡賜金紫以戶部侍郎判度支俄檢校禮部尚書山南東道節度使初貞元時取江西兵五百戍襄陽制蔡右脅仰給度支後亡死略盡而歲取貲不置夷簡曰迹空文苟軍興可乎奏罷之闕三歲徙帥劍南西川雋州刺史王

一一號第一百十六批

卿積姦賊屬蠻怒畔去夷簡逐擊占檄諭禍福蠻落復平始章阜作奉聖樂于頔作順聖樂常奏之軍中夷簡輒廢去謂禮樂非諸侯可擅制語其屬曰我欲蓋前人非以詒戒後來十三年召爲御史大夫進門下侍郎同中書門下平章事李師道方叛裴度當國帝倚以平賊夷簡自謂才不能有以過度乃求外遷以檢校尚書左僕射平章事爲淮南節度使穆宗立有司方議廟號夷簡建言王者祖有功宗有德大行皇帝有武功廟宜稱祖詔公卿禮官議不合止久之請老朝廷謂夷簡齒力可任不聽以右僕射召辭不拜復以檢校左僕射兼太子少師分司東都明年卒年六十七贈太子太保夷簡致位顯處以直自閑未嘗苟辭氣悅人歷三鎮家無產貲病不迎醫將終戒毋厚葬毋事浮屠毋碑神道惟識墓則已世謂行己能有終始者

李程字表臣襄邑恭王神符五世孫也擢進士宏辭賦日五色造語警拔士流推之調藍田尉縣有滯獄十年程單言輒判京兆狀最選監察御史召爲翰林學士再遷司勳員外郎爵渭源縣男德宗季秋出畋有寒色顧左右曰九月猶衫二月而袍不爲順時朕欲改月謂何左右稱善程獨曰玄宗著月令十月始裘不可改帝矍然止學士入署常視日影爲候程性嫺日過八埒乃至時號八埒學士元和三年出爲隨州刺史以能政賜金紫服李夷簡鎮西川辟成都少尹以兵部郎中入知制誥韓弘爲都統命程宣慰汴

州歷御史中丞鄂岳觀察使還爲吏部侍郎敬宗初以本官同中書門下平章事帝沖逸好宮室畋獵功用奢廣程諫曰先王以儉德化天下陛下方諒陰未宜興作願回所費奉園陵帝嘉納又請置侍講學士選名臣備訪問加中書侍郎進彭原郡公寶曆二年檢校吏部尚書同平章事爲河東節度使徙河中召拜尚書左僕射俄檢校司空領宣武山南東道節度再爲僕射先是元和長慶時僕射視事百官皆賀四品以下官荅拜太和四年詔不荅拜王涯竇易直行之自如程循其故不自安言諸朝御史中丞李漢謂不荅拜於禮太重文宗不許聽用太和詔書議者不善也程爲人辯給多智然簡傲無儀檢雖在華密而無重望最爲帝所遇嘗曰高飛之翮長者在前卿朝廷羽翮也武宗立爲東都留守卒年七十七贈太保諡曰繆子廓第進士累遷刑部侍郎大中中拜武靈節度使不能治軍補闕鄭魯奏言新麥未登徐必亂既而果逐廓乃擢魯起居舍人

李石字中玉襄邑蒸王神符五世孫元和中擢進士第辟李聽幕府從歷四鎮有材略爲吏精明聽每征伐必留石主後務大和中爲行軍司馬聽以兵北渡河令石入奏占對華敏文宗異之府罷擢工部郎中判鹽鐵案令狐楚節度河東引爲副使入遷給事中累進戶部侍郎判度支帝惡李宗閔等以黨相排背公害政凡舊臣皆疑不用取後出孤立者欲懲刈之故李訓等至宰相訓誅死乃擢石以本官同中書門

下平章事仍領度支石器雄遠當軸秉權亡所撓方是時宦寺氣盛陵暴朝廷每對延英而仇士良等往往斥訓以折大臣石徐謂曰亂京師者訓注也然其進孰爲之先士良等願縮不得對氣益奪搢紳賴以爲彊它日紫宸殿宰相進及陛帝喟而歎石進曰陛下之歎臣固未諭敢問所從帝曰朕歎治之難也且朕卽位十年不能得治本故前歲有疾今茲震擾皆自取之夫託億兆之上不能以美利及百姓焉得久無事乎石曰陛下罪己當然責治太早雖十年孜孜養德適成爾天下治不治要自今觀之且人之氣志雖賢聖猶有優劣故仲尼稱三十而立四十不惑陛下春秋少非起人間也而知人情僞今自視何如卽位時帝曰有間矣石曰古之聖賢必觀書以考察往行然後成治功陛下積十年盛德日新然向所以疾戾震驚者天其固陛下之志乎誠務修將來之政視太宗致昇平之期猶不爲晚帝曰行之得至乎石曰今四海夷一唯登拔才良使小大各任其職愛人節用國有餘力下不加賦太平之術也于時大臣新族死歲苦寒外情不安帝曰人心未舒何也石曰刑殺太甚則致陰沴比鄧注多募鳳翔兵至今誅索不已臣恐緣以生變請下詔慰安之帝曰善又問奈何致太平之難鄧暉曰治天下治莫若恤人石卽贊曰恤之得術尙何太平之難陛下節用度去冗食簿最不得措其姦則百司治百司治天下安矣帝戚然曰我思貞觀開元時以視今日卽氣拂吾膺石曰治道本於上而下罔敢不率帝曰不然張元昌爲左街副

使而用金唾壺比坐事誅之吾聞禁中有金鳥錦袍二昔玄宗幸溫泉與楊貴妃衣之今富人時時有之石曰毛玠以清德爲魏尚書而人不敢鮮衣美食況天子獨不可爲法乎是時宰相吏卒因內變多死詔江西南索募直助召士力石建言宰相左右天子教化若徇正忘私宗廟神靈猶當祐之雖有盜無害也有如挾姦自欺植權黨害正直雖加之防鬼得以誅無所事於召募請直以金吾爲衛帝嘗顧鄭覃曰覃老矣當無妄試論我猶漢何等主覃曰陛下文宣主也帝曰渠敢望是石欲彊帝志使不怠因曰陛下之問而覃之對臣皆以爲非顏回匹夫耳自比於舜陛下有四海春秋富當觀得失於前日引月長以齊堯舜奈何比文宣而又自以爲不及惟陛下開肆厥志不以文宣自安則大業濟矣中人自邊還走馬入金光門道路妄言兵且至京師謹走塵起百官或躐而騎臺省吏稍稍遁去鄭覃將出石曰事未可知宜坐須其定宰相走則亂矣若變出不虞逃將安適人之所瞻不可忽也益治簿書沛然如平時里閭羣無賴望南闕陰持兵俟變金吾大將軍陳君賞率衆立望仙門內使趣闔門君賞不從日入乃止當是時非石鎮靜君賞有謀幾亂開成赦令賜京畿一歲租停方鎮正至端午三歲獻以其直代百姓配緡天下非藥物若果它貢悉禁又罷宣索營造帝曰朕務其實不欲事空文石以異時詔令天子多自踰之因請內置赦令一通以時省覽臨遣十道黜陟使敕以政治根本使與長吏奉行之乃盡病利俄進中書侍郎帝

嘗曰朕觀晉君臣以夷曠致傾覆當時卿大夫過邪石曰然古詩有之人生不滿百常懷千歲憂畏不逢也晝短苦夜長闇時多也何不秉燭游勸之照也臣願捐軀命濟國家惟陛下鑒照不惑則安人疆國其庶乎又言致治之道在得人德宗多猜貳仕進之塗塞奏請輒報罷東省閉闔累月南臺惟一御史故兩河諸侯競引豪英士之喜利者多趨之用爲謀主故藩鎮日橫天子爲旰食元和間進用日廣陛下嗣位惟賢是咨士皆在朝廷彼疆宇甲兵如故而低摧順屈者士不之助也帝曰天下之勢猶持衡然此首重則彼尾輕矣其爲我博選士朕且用之石奏咸陽令韓遼治興成渠渠當咸陽右十八里左直永豐倉秦漢故漕渠成起咸陽抵潼關三百里無車輓勞則轅下牛盡可耕永利秦中矣李固言曰然恐役非其時奈何帝曰以陰陽拘畏乎苟利於人朕奚慮哉石用韓益判度支案以贓敗石曰臣本以益知財利不保其貪帝曰宰相任人知則用過則棄謂之至公它宰相所用疆蔽其過此其私也三年正月將朝騎至親仁里狙盜發射石傷馬逸盜邀斫之坊門絕馬尾乃得脫天子駭愕遣使者慰撫賜良藥始命六軍衛士二十人從宰相是日京師震恐百官造朝纔十一石因臥家固辭位有詔以中書侍郎平章事爲荆南節度使始訓注亂權歸闕暨天子畏備幾不立石起爲相以身徇國不卹近倖張權綱欲置王室收威柄而仇士良疾之將加害帝知其然而未爲之遂罷去遣日饗資都闕士人恨憤石讓中書侍郎換檢校兵部

尙書宅不聽會昌三年檢校司空徙節河東會伐潞詔以大原兵助王逢軍榆社石起橫水戍千五百人令別將楊弁領之常曰軍興人賜二緘治裝會財置而給以半士怨又促其行弁乘隙激衆以亂還兵逐石出之詔以太子少傅分司東都俄檢校吏部尙書卽拜留守卒年六十二贈尙書右僕射

弟福字能之大和中第進士楊嗣復領劍南辟幕府崔郾輔政兼集賢殿大學士引爲校理調藍田尉後石當國薦福可任治人繇監察御史至戶部郎中累歷州刺史進諫議大夫大中時党項羌震擾議者以將臣貪牟產虜怨議擇儒臣治邊乃授福夏綬銀節度使宣宗臨軒諭遣福以善政聞徙鎮鄭滑再遷兵部侍郎判度支出爲宣武節度使入遷戶部尙書會蠻侵蜀詔福持節宣撫卽拜劍南西川節度使同中書門下平章事與蠻戰敗績貶斬王傅分司東都僖宗初以檢校尙書左僕射就拜留守改山南東道節度使王仙芝寇山南福團訓鄉兵邀險須之賊不敢入轉略岳鄂以逼江陵節度使楊知溫求援於福乃自將州兵率沙陀壯騎五百赴之賊已殘江陵鄂而聞福至乃走以勞檢校司空同中書門下平章事還朝以太子太傅卒

李回字昭度新興王德良六世孫本名躒字昭回避武宗諱改焉長慶中擢進士第又策賢良方正異等辟義成淮南幕府稍遷監察御史累進起居郎李德裕雅知之爲人彊幹所洩無不辦繇職方員外郎判

戶部案四遷中書舍人會昌中以刑部侍郎兼御史中丞時方伐劉稹武宗慮河朔列鎮陰相締以撓兵事德裕薦回持節往諭何弘敬王元逵以澤潞邈京洛非若河北三鎮國家許世以壤地傳子孫者且稷父子無功悖道理上以邢洛磁三州與河北比境用軍莫便魏鎮且王師不欲輕出山東請公等取三州報天子二將聽命又張仲武以幽州兵攻回鶻而與劉沔不協回至諭以大義仲武釋然卽合太原軍攻潞復以回爲使督戰至蒲東王宰石雄藥韃謁道左回不弛行顧左右呼直史責破賊限牒宰等震恐期六旬取潞否則死之未及期三日賊平以戶部侍郎判戶部事俄進中書侍郎同中書門下平章事武宗崩爲山陵使遷門下侍郎兼戶部尙書出爲劍南西川節度使以與德裕善決吳湘獄時回爲中丞坐不糾擿貶湖南觀察使俄以太子賓客分司東都給事中還制謂責回薄遂貶賀州刺史徙撫州長史卒大中九年詔復湖南觀察使贈刑部尙書

贊曰周之卿士周召毛原皆同姓國也唐宰相以宗室進者九人林甫姦諛幾亡天下李程和柔在位無所發明其餘以材稱職號賢宰相秦隋棄親侮賢皆二世而滅周唐任人不疑得親親用賢之道嚮國長久嗚呼盛歟

唐書卷一百三十一考證

李勉傳明年至者乃四千餘臣德潛按舊書末年至者四十餘夷舶至者四十餘未見不暴征之效

也新書為允

以太子太師罷卒○舊書作罷知政事加太子太保

李程傳寶曆二年檢校吏部尚書同平章事○沈炳震曰舊書寶曆二年罷相檢校兵部尚書同平章事

李石傳襄邑恭王神符五世孫○沈炳震曰新書不載父名舊書父明新書宗室表名鵬

俄檢校吏部尚書○舊書作檢校司徒

李回傳徙撫州長史卒○沈炳震曰舊書再貶撫州刺史白敏中令狐綯罷相入朝為兵部尚書復出為

成都尹劍南西川節度卒據此非卒於撫州長史也

唐書卷一百三十一考證

唐書卷一百三十一

宋 端 明 殿 學 士 宋 祁 撰

列傳第五十七

劉吳韋蔣柳沈

劉子玄名知幾以玄宗諱嫌故以字行年十二父藏器為授古文尚書業不進父怒楚督之及聞為諸兄講春秋左氏冒往聽退輒辨析所疑歎曰書如是兒何怠父奇其意許授左氏踰年遂通覽羣史與兄知柔俱以善文詞知名擢進士第調獲嘉主簿武后證聖初詔九品以上陳得失子玄上書譏每歲一赦或一歲再赦小人之幸君子之不幸又言君不虛授臣不虛受妄受不為忠妄施不為惠今羣臣無功遭遇輒遷至都下有車載斗量杷推椀脫之諺又謂刺史非三載以上不可徙宜課功殿明賞罰后嘉其直不能用也時吏橫酷淫及善人公卿被誅死者踵相及子玄悼士無良而甘於禍作思慎賦以刺時蘇味道李嶠見而歎曰陸機豪士之流乎周身之道盡矣子玄與徐堅元行沖吳兢等善嘗曰海內知我者數子耳累遷鳳閣舍人兼脩國史中宗時擢太子率更令介直自守累歲不遷會天子西還子玄自乞留東都三年或言子玄身史臣而私著述驛召至京領史事遷祕書少監時宰相韋巨源紀處訥楊再思宗楚客

蕭至忠皆領監修子立病長官多意向不一而至忠數責論次無功又仕偃蹇乃奏記求罷去因爲至忠言五不可曰古之國史皆出一家未聞藉功于衆唯漢東觀集羣儒纂述無主條章不建今史司取士滋多人自爲苟衰家自爲政駿每記一事載一言閣筆相視含毫不斷頭白可期汗青無日一不可漢郡國計書上太史副上丞相後漢公卿所撰先集公府乃上蘭臺故史官載事爲廣今史臣唯自詢采二史不注起居百家弗通行狀二不可史局深籍禁門所以杜顏面防請謁也今作者如林儻示褻貶曾未絕口而朝野咸知孫盛取嫉權門王劭見讐貴族常人之情不能無畏三不可古者史氏各有指歸故司馬遷退處士進姦雄班固抑忠臣節主闕今史官注記類稟監修或須直辭或當隱惡十羊九牧其令難行四不可今監者不肯指授修者又不遵奉務相推避以延歲月五不可又言朝廷厚用其才而薄其禮至忠得書悵惜不許楚客等惡其言誠切謂諸史官曰是子作書欲致吾何地始子立修武后實錄有所改正而武三思等不聽自以爲見用於時而志不遂乃著史通內外四十九篇譏評今古徐堅讀之歎曰爲氏者宜置此坐右也又嘗自比楊雄者四雄好雕蟲小伎老而爲悔吾幼喜詩賦而壯不爲期以述者自名雄準易作經當時笑之吾作史通俗以爲愚雄著書見尤於人作解嘲吾亦作釋蒙雄少爲范滂劉歆所器及聞作經以爲必覆醬甌吾始以文章得譽晚談史傳由是減價其自感槩如此子立內負有所未

盡乃委國史於吳兢別撰劉氏家史及譜考上推漢爲陸終苗裔非堯後彭城叢亭里諸劉出楚孝王曾孫居巢侯般不承元王按據明審議者高其博嘗曰吾若得封必以居巢紹司徒舊邑後果封居巢縣子鄉人以其兄弟六人俱有名號其鄉曰高陽里曰居巢累遷太子左庶子兼崇文館學士皇太子將釋奠國學有司具儀從臣著衣冠乘馬子立議古大夫以上皆乘車以馬爲駢服魏晉後以牛駕車江左尙書郎輒輕乘馬則御史劾治顏延年罷官乘馬出入閭里世稱放誕此則乘馬宜從襲服之明驗今陵廟巡謁王公册命士庶親迎則盛服冠履乘輅車他事無車故貴賤通乘馬比法駕所幸侍臣皆馬上朝服且冠履惟可配車故博帶褒衣革履高冠是車中服鞮而鐙跳而鞍非唯不師於古亦自取驚流俗馬逸人顛受噉行路太子從之因著爲定令開元初遷左散騎常侍嘗議孝經鄭氏學非康成注舉十二條左證其謬當以古文爲正易無子夏傳老子書無河上公注請存王弼學宰相宋璟等不然其論奏與諸儒質辯博士司馬貞等阿意共黜其言請二家兼行惟子夏易傳請罷詔可會子貺爲大樂令抵罪子立請於執政玄宗怒貶安州別駕卒年六十一子立領國史且三十年官雖徙職常如舊禮部尙書鄭惟忠嘗問自古文士多史才少何耶對曰史有三長才學識世罕兼之故史者少夫有學無才猶愚賈操金不能殖貨有才無學猶巧匠無榘斧斤弗能成室善惡必書使驕君賊臣知懼此爲無可加者時以爲篤論

子玄善持論辯據明銳視諸儒皆出其下朝有論著輒豫歿後帝詔河南就家寫史通讀之稱善追贈工部尚書諡曰文六子貺儉彙秩迅迴

貺字惠卿好學多所通解子玄卒有詔訪其後擢起居郎歷右拾遺內供奉獻續說苑十篇以廣漢劉向所遺而刊落怪妄貺嘗以竹書紀年序諸侯列會皆舉證後人追修非當時正史如齊人殲于遂鄭棄其師皆孔子新意師春一篇錄卜筮事與左氏合知按春秋經傳而爲也因著外傳云子滋泆

滋字公茂通經術喜持論以蔭歷漣水令楊綰薦材堪諫官累授左補闕久之去養親東都河南尹李真奏補功曹母喪解服除以司勳員外郎判南曹勸職奉法進至給事中興元元年以吏部侍郎知南選時大盜後旱蝗相仍吏不能詣京師故命滋至洪州調補以振職聞貞元二年擢左散騎常侍同中書門下平章事爲相無所設施廉抑畏慎而已明年罷又明年復爲吏部侍郎遷尚書會御史中丞韋貞伯劾奏吏選不實滋覆疏外吏因得爲姦詔與侍郎杜黃裳奪階卒贈陝州大都督諡曰貞泆亦有學稱生子敦儒家東都母病狂易非笞掠人不能安左右皆亡去敦儒日侍疾體常流血母乃能下食敦儒怡然不爲痛隱留守韋夏卿表其行詔標闕于閩元和中權德輿復薦之乃授左龍武軍兵曹參軍分司東都在母喪毀瘠幾死時謂劉孝子後爲起居郎達禮好古有祖風云

饒字鼎卿天寶初歷集賢院學士兼知史官終右補闕父子三人更泄史官著史例頗有法彙左散騎常侍終荆南節度使子贊以蔭仕爲鄆丞杜鴻漸自劍南還過鄆廚驛豐給楊炎薦彙名儒子擢浙西觀察判官炎入相進歙州刺史政幹疆濟野嫗將爲虎噬幼女呼號搏虎俱免觀察使韓滉表贊治有異行加金紫徙常州滉輔政分所統爲三道以贊爲宣州刺史都團練觀察使治宣十年贊本無學第以剛猛立威官吏重足一迹宣旣富饒卽厚斂廣貢奉以結恩又不能訓子皆驕傲不度素業衰矣卒贈吏部尚書諡曰敬迴以剛直稱第進士歷殿中侍御史佐江淮轉運使時新更安史亂迴餽運財賦力于職大厯初爲吉州刺史治行尤異累遷給事中

秩字祚卿開元末歷左監門衛錄事參軍事稍遷憲部員外郎坐小累下除隴西司馬安祿山反哥舒翰守潼關楊國忠欲奪其兵秩上言翰兵天下成敗所繫不可忽房瑄見其書以比劉更生至德初遷給事中久之出爲閩州刺史貶撫州長史卒所著政典止戈記至德新議等凡數十篇

迅字捷卿歷京兆功曹叅軍事常寢疾房瑄聞憂不寐曰捷卿有不諱天理歟矣陳郡殷寅名知人見迅歎曰今黃叔度也劉晏每聞其論曰皇王之道盡矣上元中避地安康卒迅續詩書春秋禮樂五說書成語人曰天下滔滔知我者希終不以示人云

吳兢汴州浚儀人少厲志貫知經史方直寡諧比惟與魏元忠朱敬則游二人者當路薦兢才堪論議詔直史館修國史遷右拾遺內供奉神龍中改右補闕節閔太子難姦臣誣構安國相王與謀朝廷大恐兢上言文明後皇運不殊如帶陛下龍興恩被骨肉相王與陛下同氣親莫加焉今賊臣日夜陰謀必欲實之極法相王仁孝遭荼苦哀毀以陛下爲命而自託於手足若信邪佞委之於法傷陛下之恩失天下望芟刈股肱獨任曾臆可爲寒心自昔翦伐宗支委任異姓未有不亡者秦任趙高漢任王莽晉家自相魚肉隋室猜忌子弟海內靡沸驗之覆車安可重跡且根朽者葉枯源涸者流竭子弟國之根源可使枯竭哉皇家枝幹夷芟略盡陛下卽位四年一子弄兵被誅一子以罪謫去惟相王朝夕左右斗粟之刺蒼蠅之詩不可不察伏願陛下全常棣之恩慰罔極之心天下幸甚累遷起居郎與劉子玄徐堅等並職玄宗初立收還權綱銳於決事羣臣畏伏兢慮帝果而不及精乃上疏曰自古人臣不諫則國危諫則身危臣愚食陛下祿不敢避身危之禍比見上封事者言有可采但賜束帛而已未嘗蒙召見被拔擢其忤旨則朝堂決杖傳送本州或死於流貶由是臣下不敢進諫古者設諍諫木欲聞己過今封事謗木比也使所言是有益於國使所言非無累於朝陛下何遽加斥逐以杜塞直言道路流傳相視怪愕夫漢高帝赦周昌桀紂之對晉武帝受劉毅桓靈之譏況陛下豁達大度不能容此狂直耶夫人主居尊極之位顯生殺

之權其爲威嚴峻矣開情抱納諫諍下猶懼不敢盡奈何以爲罪且上有所失下必知之故鄭人欲毀鄉校而子產不聽也陛下卽位猶有褚无量張廷珪韓思復辛替否柳澤袁楚客等數上疏爭時政得失自頃上封事往往得罪諫者頓少是鵲巢覆而鳳不至理之然也臣誠恐天下骨鯁士以讜言爲戒撓直就曲斲方爲剗倫合苟容不復能盡節忘身納君於道矣夫帝王之德莫盛於納諫故曰木從繩則正后從諫則聖又曰朝有諷諫猶髮之有梳猛虎在山林藜藿爲之不采忠諫之有益如此自古上聖之君恐不聞己過故堯設諫鼓禹拜言不肖之主自謂聖智拒諫害忠桀殺關龍逢而滅於湯紂殺王子比干而滅於周此其驗也夫與治同道罔不興與亂同道罔不亡人將疾必先不甘魚肉之味國將亡必先不甘忠諫之說嗚呼惟陛下深監于茲哉隋煬帝驕矜自負以爲堯舜莫己若而諱亡憎諫乃曰有諫我者當時不殺後必殺之大臣蘇威欲開一言不敢發因五月五日獻古文尙書帝以爲訕己卽除名蕭瑀諫無伐遼出爲河西郡守董純諫無幸江都就獄賜死自是蹇諤之士去而不顧外雖有變朝臣鉗口帝不知也身死人手子孫剗絕爲天下笑太宗皇帝好悅至言時有魏徵王珪虞世南李大亮岑文本劉洎馬周褚遂良杜正倫高季輔咸以切諫引居要職嘗謂宰相曰自知者爲難如文人巧工自謂己長若使達者大匠誡訶商略則燕辭拙跡見矣天下萬機一人聽斷雖甚憂勞不能盡善今魏徵隨事諫正多中朕

失如明鑑照形美惡畢見當是時有上書益於政者皆黏寢殿之壁坐望臥觀雖狂書逆意終不以爲忤故外事必聞刑戮幾措禮義大行陛下何不遵此道與聖祖繼美乎夫以一人之意綜萬方之政明有所不燭智有所不周上心未諭於下下情未達於上伏惟以虛受人博覽兼聽使深者不隱遠者不塞所謂闕四門明四目也其能直言正諫不避死亡之誅者特加寵榮待以不次則失之東隅冀得之桑榆矣尋以母喪去官服除自陳修史有緒家貧不能具紙筆願得少祿以終餘功有詔拜諫議大夫復修史睿宗崩實錄留東都詔兢馳驛取進梓宮以父喪解宰相張說用趙冬曦代之終喪爲太子左庶子開元十三年帝東封太山道中數馳射爲樂兢諫曰方登岱告成不當逐狡獸使有垂堂之危朽株之殆帝納之明年六月大風詔羣臣陳得失兢上疏曰自春以來亢陽不雨乃六月戊午大風拔樹壞居人廬舍傳曰敬德不用厥災早上下蔽隔庶位踰節陰侵於陽則旱災應又曰政悖德隱厥風發屋壞木風陰類大臣之象恐陛下左右有姦臣擅權懷謀上之心臣聞百王之失皆由權移於下故曰人主與人權猶倒持太阿授之以柄夫天降災異欲人主感悟願深察天變杜絕其萌且陛下承天后和帝之亂府庫未充冗員尚繁戶口流散法出多門賦謁大行趨競彌廣此弊未革寔陛下庶政之闕也臣不勝惓惓願斥屏羣小不爲慢游出不御之女減不急之馬明選舉慎刑罰杜僥倖存至公雖有旱風之變不足累聖德矣始兢在

長安景龍間任史事時武三思張易之等監領阿貴朋佞釀澤浮辭事多不實兢不得志私撰唐書唐春秋未就至是丐官筆札冀得成書詔兢就集賢院論次時張說罷宰相在家修史大臣奏國史不容在外詔兢等赴館撰錄進封長垣縣男久之坐書事不當貶荊州司馬以史草自隨蕭嵩領國史奏遣使者就兢取書得六十餘篇累遷洪州刺史坐累下除舒州天寶初入爲恒王傅雖年老衰僕甚意猶願還史職李林甫嫌其衰不用卒年八十兢敘事簡核號良史晚節稍疎時人病其太簡初與劉子玄撰定武后實錄叙張昌宗誘張說誣證魏元忠事頗言說已然可賴宋璟等邀勵苦切故轉禍爲忠不然皇嗣且殆後說爲相讀之心不善知兢所爲卽從容謬謂曰劉生書魏齊公事不少假借奈何兢曰子玄已亡不可受誣地下兢實書之其草故在聞者歎其直說屢以情斬改辭曰徇公之情何名實錄卒不改世謂今董狐云

韋述弘機曾孫家廚書二千卷述爲兒時誦憶略徧父景駿景龍中爲肥鄉令述從到官元行沖景駿姑子也爲時儒宗常載書數車自隨述入其室觀書不知寢食行沖異之試與語前世事孰復詳諦如指掌然使屬文受紙輒就行沖曰外家之寶也舉進士時述方少儀質陋悅者功員外郎宋之問曰童子何業述曰性嗜書所撰唐春秋三十篇恨未畢它唯命之問曰本求茂才乃得遷固遂上第開元初爲樞陽尉

祕書監馬懷素奏述與諸儒卽祕書續七志五年而成述好譜學見柳沖所撰姓族系錄每私寫懷之遺
會則又繕錄故於百氏源流爲詳乃更撰開元譜二十篇累除右補闕張說既領集賢院薦述爲直學士
遷起居舍人從封太山奏東封記有詔褒美先是詔修六典徐堅構意歲餘歎曰吾更修七書而六典歷
年未有所適及蕭嵩引述撰定述始募周六官領其屬事歸於職規制遂定初令狐德棻吳兢等讓武德
以來國史皆不能成述因二家參以後事遂分紀傳又爲例一篇嵩欲蚤就復奏起居舍人賈登著作佐
郎李銳助述續述成文約事詳蕭穎士以爲譙周陳壽之流改國子司業充集賢學士累遷工部侍郎
封方城縣侯述典掌圖書餘四十年任史官二十年澹榮利爲人純厚長者當世宗之接士無貴賤與均
著書二萬卷皆手校定黃墨精謹內祕書不逮也古草隸帖祕書古器圖譜無不備安祿山亂剽失皆盡
述獨抱國史藏南山身陷賊汚僞官賊平流渝州爲刺史薛舒所困不食死廣德初甥蕭直爲李光弼判
官詣闕奏事稱旨因理述倉卒奔遁能存國史賊平盡送史官于休烈以功補過宜蒙恩宥有詔贈右散
騎常侍韋氏之顯者孝友詞學則承慶嗣立邃音樂有萬石達禮儀則叔夏史才博識有述所著書二百
餘篇行於時弟迪迪學業亦亞述與迪對爲學士與迪並禮官擢紳高之時趙冬曦兄弟亦各有名張說
嘗曰韋趙兄弟人之杞梓云

蔣父字德源常州義興人徙家河南祖瓌開元中弘文館學士父將明天寶末辟河中使府安祿山反以
計佐其帥全并潞等州兩京陷被拘乃陽狂以免號王巨引致幕府歷侍御史擢左司郎中國子司業集
賢殿學士父性銳敏七歲時見庾信哀江南賦再讀輒誦外祖吳兢位史官父幼從外家學得其書博覽
彙記逮冠該綜羣籍有史才司徒楊綰尤稱之將明在集賢值兵興圖籍殺舛白宰相請引父入院助力
整比宰相張鎰亦奇之署集賢小職父料次踰年各以部分得善書二萬卷再遷王屋尉充太常禮院修
撰貞元九年擢右拾遺史館修撰德宗重其職先召見延英乃命之張孝忠子茂宗尙義章公主母亡遺
言丐成禮帝念孝忠功卽日召爲左衛將軍許主下降父上疏以爲墨纒禮本緣金革未有奪喪尙主者
繆整典禮違人情不可爲法帝令中使者諭茂宗之母之請父意殊堅帝曰卿所言古禮也今俗借吉而
婚不爲少對曰俚室窮人子旁無至親乃有借吉以嫁不聞男冒凶而娶陛下建中詔書郡縣主當婚皆
使有司循典故母用俗儀公主春秋少待年不爲晚請茂宗如禮便帝曰更思之會太常博士韋彤裴璠
諫曰婚禮主人几筵聽命稱事立文謂之嘉所以承宗廟繼後嗣也喪禮創巨者日久痛甚者愈遲二十
五月而畢謂之凶所以送死報終示有節也故夫義婦聽父慈子孝昔魯侯改服管襄墨纒緣金革事則
有權變安有釋纒服衣冕裳去墜室行親迎以凶瀆嘉爲朝廷爽法疏入帝迂其言促行前詔然心嘉父

有守十八年遷起居舍人轉司勳員外皆兼史任帝嘗登凌煙閣視左壁顏顛題文漫缺行纒數字命錄以問宰相無能知者遽召父至答曰此聖厯中侍臣圖贊帝前口以誦補不失一字帝歎曰雖虞世南默寫列女傳不是過會詔問神策軍建置本末中書討求不獲時集賢學士甚衆悉亡以對乃訪父父條據甚詳宰相高郢鄭珣瑜歎曰集賢有人哉明日詔兼判集賢院事父子爲學士儒者榮之順宗既葬議祧廟有司以中宗中興之君當百代不遷宰相問父父曰中宗卽位春秋已壯而母后篡奪以移神器賴張柬之等國祚再復蓋曰反正不得爲中興凡非我失之自我復之爲中興漢光武晉元是也自我失之因人復之晉孝惠孝安是也今中宗與惠安二帝同不可爲不遷主有司疑曰五王有安社稷功若遷中宗則配饗永絕父曰禘祫功臣乃合食太廟中宗廟雖毀而禘祫並陳太廟此則五王配食與初一也由是遷廟遂定遷兵部郎中與許孟容韋員之刪正制敕三十篇爲開元格後敕李錡誅詔宗正削一房屬籍宰相召父問一房自大功可乎答曰大功錡之從父昆弟其祖神通有功配饗於廟雖裔孫之惡而忘其勳不可自替可乎曰替者錡昆弟其父若幽死社稷今以錡連坐不可執政然之故罪止錡及子息無旁坐者未幾改祕書少監復兼史館修撰與獨孤郁韋處厚修德宗實錄以勞遷右諫議大夫裴垕罷宰相而李吉甫惡垕以嘗監修故授父太常少卿久之遷祕書監累封義興縣公卒年七十五贈禮部尚書諡

曰懿父在朝廷久居史職二十年每有大政事議論宰相未能決必咨訪之又據經義或舊章以參時事其對允切該詳初以是被遇終亦忤貴近介介不至顯官然資質樸直遇權臣乘政輒數歲不遷嘗疏裴延齡罪惡及拒王叔文當世高之結髮志學老而不厭雖甚寒暑卷不釋于前故能通百家學尤明前世沿革家藏書至萬五千卷初名武憲宗時因進見請曰陛下今日偃武修文羣臣當順承上意請改名父帝悅時討王承宗兵方罷父恐天子銳於武亦因以諷它日帝見侍御史唐武曰命名固多何必曰武父既改之矣更曰慶羣臣乃知帝且馱兵云父論議百餘篇五子係伸偕知名仙佶皆位刺史

係善屬文得父典實大和初授昭應尉直史館明年拜右拾遺史館修撰與沈傳師鄭澣陳夷行李漢參撰憲宗實錄轉右補闕未申錫被誣文宗怒甚係與左常侍崔玄亮涕泣苦諍申錫得不死歷膳部員外工禮兵三部郎中皆兼史職開成末轉諫議大夫宰相李德裕惡李漢以係友婿出爲桂管觀察使人安其治復坐漢貶唐州刺史宣宗立召爲給事中集賢殿學士判院事轉吏部侍郎歷興元鳳翔節度使懿宗初拜兵部尚書以弟伸位丞相懇辭乃檢校尚書右僕射節度山南東道封淮陽郡公徙東都留守卒子曜字耀之咸通末由進士第署鄂岳團練判官除虞工二部員外郎改起居郎黃巢之難曜闔門無職類以是絕意仕進隱居沈痛中和二年表請爲道士許之

伸字大直第進士大中二年以右補闕爲史館修撰轉駕部郎中知制誥白敏中領邠寧節度表伸自副加右庶子入知戶部侍郎九年爲翰林學士進承旨十年改兵部侍郎判戶部宣宗雅信愛伸每見必咨天下得失伸言比爵賞稍易人且偷帝愕然曰偷則亂矣伸曰否非遽亂但人有覬心亂由是生帝嗟嘆伸三起三留曰它日不復獨對卿矣伸不論未幾以本官同中書門下平章事踰四月解戶部加中書侍郎懿宗卽位兼刑部尚書監修國史咸通二年出爲河中節度使同中書門下平章事徙宣武俄以太子少保分司東都七年用爲華州刺史再遷太子太傅表乞骸骨以本官致仕卒贈太尉

偕以父任歷右拾遺史館修撰轉補闕主客郎中初柳芳作唐厯大厯以後闕而不錄宣宗詔崔龜從韋澳李荀張彥遠及偕等分年撰次盡元和以續云累遷太常少卿大中八年與盧耽牛叢王溥盧告撰次文宗實錄蔣氏世禪儒唯伸及係子兆能以辭章取進士第然不爲文士所多三世踵修國史世稱良筆咸云蔣氏日厯天下多藏焉

二號第一百二十一號

柳芳字仲敷蒲州河東人開元末擢進士第由永靈尉直史館肅宗詔芳與韋述綴輯吳兢所次國史會述死芳緒成之興高祖詔乾元凡百三十篇敘天寶後事棄取不倫史官病之上元中坐事徙黔中後歷左金吾衛騎曹參軍史館修撰然芳篤志論著不少選忘厭承寇亂史籍淪缺芳始謫時高力士亦貶巫州因從力士質開元天寶及禁中事具識本末時國史已送官不可追刊乃推衍義類做編年法爲唐厯四十篇頗有異聞然不立褒貶義例爲諸儒譏訕改右司郎中集賢殿學士卒子登冕

登字成伯淹質羣書年六十餘始仕宣元和初爲大理少卿與許孟容等刊正敕格以病改右散騎常侍致仕卒年九十餘贈工部尚書

子瓊字德輝寶厯初第進士宏詞三遷監察御史時郊廟告祭吏部以雜品攝上公瓊據開元元和詔書太尉以宰相攝事司空司徒以僕射尚書師傅攝餘司不及差限請如舊制從之累遷吏部員外郎文宗開成初爲翰林學士初芳永泰中按宗正課斷自武德以昭穆系承撰永泰新譜二十篇瓊因召對帝歎新譜詳悉詔瓊攝承泰後事綴成之復爲十篇戶部供筆札稟料遷中書舍人武宗立轉禮部侍郎瓊爲人寬信好接士稱人之長游其門者它日皆顯於世會昌二年再主貢部坐其子招賄貶信州司馬終郴州刺史

冕字敬叔博學富文辭且世史官父子並居集賢院憲右補闕史館修撰坐善劉晏貶巴州司戶參軍遷爲太常博士昭德王皇后崩冕與張薦議皇太子宜依晉魏卒哭除服左補闕穆質請依禮碁而除冕議見用德宗旣親郊廟慎祠事動稽典禮冕以吏部郎中攝太常博士與薦及司封郎中徐岱倉部郎中陸

質修飭儀矩帝疑郊廟每升輒去劍履及象劍尺寸祝語輕重冕據禮以對本末詳明天子嘉異久之以
論議勁切執政不善出爲婺州刺史十三年兼御史中丞福建觀察使自以久疏斥又性躁狷不能無恨
乃上表乞代且推明朝覲之意曰臣竊感江漢朝宗之誼鹿鳴君臣之謙頌聲之作王道本始國家自兵
興不遑議禮方牧未朝譙樂久缺臣限一切之制例無朝集目不覲朝廷之禮老不聞宗廟之樂足不踐
軒墀之地十有二年于茲矣夫朝會禮之本也唐虞之制羣后四朝以明黜陟商周之盛五歲一見以考
制度漢法三載上計以會課最聖唐稽古天下朝集三考一見皆以十月上計京師十一月禮見會尙書
省應考績事元日陳貢棊集於考堂唱其考第進賢以興善簡不肖以黜惡自安史亂常始有專地四方
多故始有不朝戎臣恃險或不悔過臣忝牧圉之寄憤不朝之臣思一入覲率先天下使君臣之義親而
不疏朝覲之禮廢而復舉誠恐負薪溘先朝露覲禮不展臣之憂也比聞諸將帥亡歿者衆臣自憚何德
以堪久長鄉國人情之不忘也闕庭臣子所戀也朝覲國家大禮也三者臣之大願表累上其辭哀切德
宗許還會冕奏聞中本南朝畜牧地可息羊馬置牧區於東越名萬安監又置五區於泉州悉索部內馬
驢牛羊合萬餘游畜之不經時死耗略盡復調充之民間怨苦坐政無狀代還卒贈工部尙書
沈既濟蘇州吳人經學該明吏部侍郎楊炎雅善之既執政薦既濟有良史才召拜左拾遺史館修撰初

吳兢撰國史爲則天本紀次高宗下既濟奏議以爲則天皇后進以彊有退非德讓史臣追書當稱爲太
后不宜曰上中宗雖降居藩邸而體元繼代本吾君也宜稱皇帝不宜曰廬陵王睿宗在景龍前天命未
集假歸大寶於誼無名宜曰相王未容曰帝且則天改周正朔立七廟天命革矣今以周廟唐列爲帝紀
考于禮經是謂亂名中宗嗣位在太后前而敘年製紀反居其下方之躋僖公是謂不智昔漢高后稱制
獨有王諸呂爲負漢約無遷鼎革命事時孝惠已歿子非劉氏不紀呂后尙誰與哉議者猶謂不可況中
宗以始年卽位季年復祚雖尊名中奪而天命未改足以首事表年何所拘闕而列爲二紀魯昭公之出
春秋歲書其居曰公在乾侯君在雖失位不敢廢也請省天后紀合中宗紀每歲首必書孝和在所以統
之曰皇帝在房陵太后行某事改某制紀稱中宗而事迹太后名不失正禮不違常矣夫正名所以尊王
室書法所以觀後嗣且太后遺制自去帝號及孝和上諡開元冊命而后之名不易今附陵配廟皆以后
禮而獨承統于帝是有司不時正失先有若后姓名諱才藝智略崩葬日月宜入皇后傳題其篇曰則
天順聖武皇后云議不行德宗立銳于治建中二年詔中書門下兩省分置待詔官三十以見官故官若
同正試攝九品以上者視品給俸至稟餼幹力什器館宇悉有差權公錢收子贍用度既濟諫曰今日之
治患在官煩不患員少患不問不患無人兩省官自常侍諫議補闕拾遺四十員日止兩人待對缺員二

十一員未補若謂見官不足與議則當更選其人若廣聰明以收淹滯先補其闕何事官外置官夫置錢取息有司之權制非經治法今置員三十大抵費月不減百萬以息準本須二十萬得息百萬配戶二百又當復除其家且得入流所損尤甚今關輔大病皆言百司息錢毀室破產積府縣未有以革臣計天下財賦耗數大者唯二事一兵資二官俸自它費十不當二者一所以黎人重困杼軸空虛何則四方形勢兵未可去資費雖廣不獲已爲之又益以閑官冗食其弊奈何藉舊而置猶可若之何加焉事遂寢炎得罪既濟坐貶處州司戶參軍後入朝位禮部員外郎卒撰建中實錄時稱其能子傳師

傳師字子言材行有餘能治春秋工書有楷法少爲杜佑所器貞元末舉進士時給事中許孟容禮部侍郎權德輿樂挽穀士號權許德輿稱之於孟容孟容曰我故人子盍不過我傳師往見謝曰聞之丈人脫中第則累公舉矣故不敢進孟容曰如子可使我急賢詣子不可使子因舊見我遂擢第德輿門生七十人推爲顏子復登制科授太子授書郎以鄆尉直史館轉右拾遺左補闕史館修撰遷司門員外郎知制誥召入翰林爲學士改中書舍人翰林缺承旨次當傳師穆宗欲面命辭曰學士院長參天子密議次爲宰相臣自知必不能願治人一方爲陛下長養之因稱疾出帝遣中使敦召李德裕素與善開曉諄切終不出遂以本官兼史職俄出爲湖南觀察使方傳師與修憲宗實錄未成監修杜元穎因建言張說令孤

峴在外官論次國書今稿史殘課請付傳師卽官下成之詔可寶曆二年入拜尚書右丞復出江西觀察使徙宣州傳師於吏治明吏不敢罔慎重刑法每斷獄召幕府平處輕重盡合乃論決嘗擇邸吏尹倫遲魯不及事官屬屢白易之傳師曰始吾出長安誠倫曰可闕事不可多事倫如是足矣故所益以廉靖闈入爲吏部侍郎卒年五十九贈尚書傳師性夷粹無競更二鎮十年無書賄入權家初拜官宰相欲以姻私託幕府者傳師固拒曰誠爾願罷所授故其僚佐如李景讓蕭真杜牧極當時選云治家不威嚴閨門自化兄弟子姓屬無親疏衣服飲食如一問餽姻家故人幣無儲錢鬻宅以葬子詢字誠之亦能文辭會昌初第進士補渭南尉累遷中書舍人出爲浙東觀察使除戶部侍郎判度支咸通四年爲昭義節度使治尚簡易人皆便安奴私侍兒詢將戮之奴懼結牙將爲亂夜攻詢滅其家贈兵部尚書左散騎常侍劉潼代爲節度馳至刳奴心祭其靈坐

贊曰唐興史官秉筆衆矣然垂三百年業鉅事叢簡策繁其間巨盜再興圖典焚逸大中以後史錄不存雖論著之人隨世哀掇而疏舛殘餘本末顛倒故聖主賢臣叛人佞子善惡汨汨有所未盡可爲永慨者矣又舊史之文猥釀不綱淺則入俚簡則及漏窳當時儒者有所諱而不得矚耶或因淺仍俗不足於文也亦有待于後取當而行遠耶何知幾以來工訶古人而拙於用已歟自韓愈爲順宗實錄議者闕然

不忌卒竄定無完篇乃知爲史者亦難言之游夏不能措辭於春秋果可信已

唐書卷一百三十一

唐書卷一百三十一考證

柳登子璟○舊書作冕子

柳芳子冕坐政無狀代還卒贈工部尚書○沈炳震曰舊書以政無狀詔以閻濟美代歸而卒無贈工部尚書之文贈尚書者係冕之兄登

沈既濟子傳師轉右拾遺左補闕史館修撰○舊書作左拾遺

寶祿二年入拜尚書右丞○舊書作尚書左丞

唐書卷一百三十二考證

唐書卷一百三十三

宋 端 明 殿 學 士 宋 祁 撰

列傳第五十八

二郭兩王張牛

郭虔瓘齊州歷城人開元初錄軍閥累遷右驍衛將軍兼北廷都護金山道副大總管明年突厥默啜子同俄特勒圍北廷虔瓘飭壘自守同俄單騎馳城下勇士狙道左突斬之虜亡酋長相率丐降請悉軍中所資贖同俄死聞已斬舉軍慟哭去虔瓘以功授冠軍大將軍安西副大都護封潞國公建募關中兵萬人擊餘寇遂前功有詔募士給公乘在所續食將作大匠韋湊上言漢徙豪族以實關中今畿輔戶口遺耗異時戎虜入盜丁壯悉行不宜更募驍勇以空京甸資荒服萬人所過遞馱孰饗亘六千里州縣安所供億秦隴以西多沙磧少居人若河而濟縱有克獲其補幾何儻稽天誅則諉大事不省既而虔瓘果不見虜還遷涼州刺史河西節度大使進右威衛大將軍四年奏家奴八人有戰功求為游擊將軍宰相劾其恃功亂綱紀不可聽罷之陝王為安西都護詔虔瓘為副虔瓘與安撫招慰十姓可汗使阿史那獻數持異交訴諸朝玄宗遣左衛中郎將王惠齋詔書諭解曰朕聞師克在和不在眾以虔瓘獻宿將當捨嫌

室隙戮力國家自開西鎮列諸軍戍有定區軍有常額卿等所統蕃漢雜之在乎善用何必加募或云突騎施圍石城獻所致也葛邏祿稱兵虔瓘所沮也大將不協小人以逞何功可圖昔相如能誅廉頗寇恂不吝賈復宜各曠然終承朕命今賜帛二千段及佗珍器俾諒朕意虔瓘奉詔人之卒軍中以張孝嵩爲安西副都護孝嵩偉姿貌及進士第而慷慨好兵在安西勸田訓士府庫盈饒徙太原尹卒以黃門侍郎杜暹代

郭知運字逢時瓜州晉昌人長七尺猿臂虎口以格鬪功累補秦州三度府果毅從郭虔瓘破突厥有功加右驍衛將軍封介休縣公吐蕃將全達延乞力徐寇渭源盜牧馬詔知運與薛訥王陵等相犄角敗之進階冠軍大將軍兼臨洮軍使封太原郡公賜資萬計徙隴右諸軍節度大使鄯州都督突厥降戶阿悉爛跌思泰率衆叛執單于都護張知運詔以朔方兵追擊至黑山呼延谷敗之虜棄仗走取副都護還詔知運兼隴右經略使營柳城開元五年大破吐蕃獻俘京師明年復出將輕兵丙夜至九曲獲精甲名馬犛牛甚衆既獻獲詔分賜文武五品以上清官及朝集使三品者進兼鴻臚卿攝御史中丞六州胡康待賓反率王陵討平之拜左武衛大將軍授一子官賜金帛九年卒于軍年五十五贈涼州都督知運屯西方戎夷畏憚與王君奭功名略等時號王郭帝詔中書令張說紀其功於墓碑上元中配饗太公廟永

泰初諡曰威子英傑英父

英傑字孟武爲左衛將軍幽州副總管開元二十三年長史薛楚玉遣英傑與裨將吳克勤烏知義羅守忠帥萬騎及奚衆討契丹屯榆關契丹酋長可突于拒戰都山下奚衆貳官軍不利知義守忠引麾下遁去英傑克勤力戰死其下尙六千人殊死戰虜示以英傑首終不屈師遂殲

英父字元武以武勇有名河隴間累遷諸衛員外將軍哥舒翰見之曰是當代吾節制者祿山亂拜秦州都督隴右採訪使賊將高嵩擁兵入汧隴英父僞勞之且具饗旣而伏兵發盡虜其衆至德二載加隴右節度使召還改羽林軍大將軍掌衛兵以喪去職史思明陷洛陽謀掠陳蔡詔英父統淮南節度兵賊叩陝虢又改陝西節度潼關防禦使進御史大夫兼神策軍節度使代宗卽位以檢校戶部尙書兼大夫雍王率諸將討賊洛陽留英父殿于陝東都平權知留守無檢御才其麾下與朔方回紇遂大掠都城及鄠汝環千里無居人以功實封三百戶召拜尙書右僕射封定襄郡王日驕蹇爲侈汰陰事宰相元載以久其權未幾嚴武死成都乃拜劍南節度使自有內主故肆志無所憚初玄宗在蜀時舊宮爲道士祠治金作帝象盡繪乘輿侍衛每拜至先拜祠後視事英父愛其地勝選輒壞繪像自居之衆始不平又教女伎乘驢擊毬鈿鞍寶勒及它服用日無慮數萬費以資倡樂未嘗問民間事爲政苛暴人以目相謂怨崔

盜不已同也出兵襲盜不克盜因人之怨率麾下五千直擣成都英父拒戰衆皆反戈內攻乃奔簡州次靈池普州刺史韓澄斬首送盜遂屠其家

王君奐字威明瓜州常樂人初事郭知運爲別奏累功至右衛副率知運卒代爲河西隴右節度使右羽林軍將軍判涼州都督事開元十四年吐蕃酋悉諾邏寇大斗拔谷君奐聞其怠率秦州都督張景順乘冰度青海襲破之以功遷大將軍封晉昌縣伯拜其父壽爲少府監聽不事君奐凱旋玄宗宴君奐及妻夏於廣達樓賜金帛夏亦自以戰功封武威郡夫人俄而吐蕃陷瓜州執刺史田元獻及壽殺居人取資糧進攻玉門軍使人謂君奐曰將軍常自以忠勇今不一進戰奈何君奐登陴西向哭兵不敢出初涼州有回紇契苾思結渾四部世爲酋長君奐微時數往來爲所輕及節度河西回紇等頗鞅鞅恥爲下君奐怒數督過之既怨望潛遣人至東都言狀君奐聞驛奏四部有叛謀帝使中人即訊回紇不能自直於是瀚海大都督回紇承宗流瀼州渾大得流吉州賀蘭都督契苾承明流藤州廬山都督思結歸國流瓊州而承宗黨瀚海州司馬護輸等益不平思有以復怨會吐蕃使問道走突厥君奐率騎到肅州掩取之還至甘州護輸狙兵發奪君奐節殺左右親吏剖其心曰是始謀者君奐引帳下力戰兵盡乃死輸欲以尸奔吐蕃追兵至乃棄尸去帝痛惜之贈特進荊州大都督以喪還京師官護其葬詔張說刻文墓碑帝自

書以寵之始吐蕃寇瓜州分遣莽布支攻常樂令賈師順乘城守俄而瓜州陷悉諾邏并兵攻之數日虜衆有姻家在城中使夜見師順曰州已失守虜悉衆來孤城渠可久不早降以全噍類乎師順曰吾受天子命守此義不可下賊數日又說師順曰明府不降吾衆且還宜有以贈我師順請脫士卒衣襦悉諾邏知無有乃夜徹營去毀瓜州城師順開門收器械復完守備吐蕃果使精騎還襲見有備乃去以功遷鄯州都督隴右節度使師順岐州人終左領軍將軍

張守珪陝州河北人姿幹瓌壯慷慨尙節義善騎射以平樂府別駕從郭虔瓘守北庭突厥侵輸臺遣守珪往援中道逢賊苦戰斬首千餘級禽頡斤一人開元初虜復攻北庭守珪從僞道奏事京師因上書言利害請引兵出蒲昌輪臺夾擊賊再遷幽州良杜府果毅時盧齊卿爲刺史器之引與共榻坐謂曰不十年子當節度是州爲國重將願以子孫託可僚屬相期邪稍遷建康軍使王君奐死河西震懼詔以守珪爲瓜州刺史墨離軍使督餘衆完故城版築方立虜奄至衆失色守珪曰創痍之餘詎可矢石相礪須權以勝之遂置酒城上會諸將作樂虜疑有備不敢攻引去守珪縱兵擊敗之於是脩復位署招流冗使復業有詔以瓜州爲都督府卽詔守珪爲都督州地沙碛不可藝常瀦雪水溉田是時渠塌爲虜毀材木無所出守珪密禱于神一昔水暴至大木數千章塞流下因取之脩復堰坊耕耨如舊州人神之刻石紀事

遷鄴州刺史隴右節度使徙幽州長史河北節度副大使俄加採訪處置等使契丹奚連年梗邊牙官可
突于胡有謀者前長史趙含章薛楚玉等不能制守珪至每戰輒勝虜遂大敗帝喜詔有司告九廟契丹
曾屈刺及突于恐懼乃遣使詐降守珪得其情遣右衛騎曹王悔詣部計事屈刺無降意徙帳稍西北密
引突厥眾將殺悔以叛契丹別帥李過折與突于爭權不叶悔因間誘之夜斬屈刺及突于盡滅其黨以
眾降守珪次紫蒙州大閱軍實賞將士傳屈刺突于首於東都二十三年入見天子會藉田畢卽酹燕爲
守珪飲至帝賦詩寵之加拜輔國大將軍右羽林大將軍賜金綵授二子官詔立碑紀功久之復討契丹
餘黨于捺祿山鹵獲不訾會裨將趙堪白眞陀羅等疆使平盧軍使烏知義度涅水邀叛奚且蹂其稼知
義辭不往眞陀羅矯詔脅之知義與虜鬪不勝還守珪匿其敗但上克獲狀事頗泄帝遣謁者牛仙童按
實守珪逼眞陀羅自殺厚賂使者還奏如狀後仙童以贓敗事逮守珪以功貶括州刺史疽發背死子獻
誠

獻誠天寶末陷安祿山授僞署後事史思明將兵數萬守汴州東都平史朝義走遄汴獻誠不內藉所統
兵以州降詔卽拜汴州刺史封南陽郡公改寶應軍左廂兵馬使更封鄧國公既來朝代宗禮賜尤渥擢
山南西道節度使討南山劇賊高玉禽之俄兼劍南東川節度時崔旰殺郭英乂獻誠率眾戰梓州大敗

一一號為一百十九批

大厯三年以疾歸京師舉其弟獻恭自代以檢校戶部尚書知省事病甚固乞辭位卒始獻誠喜功名爲
政寬裕有機略隨方制變而簡廉不逮於父從弟獻恭數有軍功以右羽林軍代爲節度使大厯末破吐
蕃於岷州久之拜東都留守累遷檢校吏部尚書德宗欲徙盧杞爲饒州刺史給事中袁高上還詔書苦
爭獻恭見帝曰高所奏宜聽帝不答復前曰高乃陛下良臣當優異之上遂不徙杞世服其不撓子煦積
閩亦至夏州節度使元和八年振武軍逐節度使李進賢屠其家及判官嚴澈憲宗怒詔煦以本軍進討
許以便宜賜縑三萬爲軍資河東王鐸遣兵五千爲援煦入捕亂卒蘇國珍等數百人誅之卒贈太子太
保
獻誠從弟獻甫以軍功試光祿卿殿中監從河中節度使賈耽討梁崇義有勞德宗西幸又從渾瑊討朱
泚戰多累遷至金吾將軍檢校工部尚書李懷光叛吐蕃盜邊獻甫領禁兵戍咸陽累年兵農悅安貞元
四年代韓游瓌領邠寧節度使邠寧軍素驕悍獻甫嚴因游瓌去遂縱掠邀范希朝爲帥都將楊朝晟誅
首亂者獻甫乃得入於是斷山浚塹選巖要地築烽堡請復鹽州及洪門洛原鎮屯兵詔可獻甫遣兵馬
使魏莢逐吐蕃築鹽夏二城虜衆畏不敢入寇十二年加檢校尚書左僕射卒贈司空
王忠嗣華州鄭人父海賓太子右衛率豐安軍使開元二年吐蕃寇隴右詔隴右防禦使薛訥率杜賓客

郭知運王峻安思順禦之以海濱爲先鋒戰武階追北至壕口殺其衆進戰長城堡諸將媚其功按兵顧望海濱戰死大軍乘之斬賊萬七千級獲馬七萬牛羊四十萬玄宗憐其忠贈左金吾大將軍忠嗣時年九歲始名訓授尚鞮奉御入見帝伏地號泣帝撫之曰此去病孤也須壯而將之更賜名養禁中肅宗爲忠王帝使與游及長雄毅寡言有武略上與論兵應對益起帝器之曰後日爾爲良將試守代州別駕大猾閉門自歛不敢干法數以輕騎出塞忠王言於帝曰忠嗣敢鬪恐亡之由是召還信安王禕在河東蕭嵩出河西數引爲麾下帝以其年少有復讎志詔不得特將嵩入朝忠嗣曰從公三年無以歸報天子乃請精銳數百襲虜會贊普大會閱武鬱標川其下欲還忠嗣不從提刀略陣斬數千人獲羊馬萬計嵩上其功帝大悅累遷左威衛將軍代北都督封清源縣男與皇甫惟明輕重不得構忠嗣罪貶東陽府左果毅河西節度使杜希望欲取吐蕃新羅城有言忠嗣才者希望以聞詔追赴河西進拔其城忠嗣錄多授左威衛郎將專知兵馬俄吐蕃大出欲取當新城晨壓官軍陣衆不敵舉軍皆恐忠嗣單馬進左右馳突獨殺數百人賊衆驚相蹂軍虜翼掩之虜大敗拜左金吾衛將軍領河東節度副使大同軍使尋爲節度使二十九年節度朔方兼靈州都督天寶元年北討奚怒皆戰桑乾河三遇三克耀武漢北高會而還時突厥新有難忠嗣進軍磧口經略之烏蘇米施可汗請降忠嗣以其方疆特文降耳乃營木刺蘭山謀

虛實因上平戎十八策縱反間於拔悉密與葛邏祿回紇三部攻多羅斯城涉昆水斬米施可汗築大同靜邊二城徙清塞橫野軍實之併受降振武爲一城自是虜不敢盜塞徙河東節度使進封縣公忠嗣本負勇敢及爲將乃能持重安邊不生事嘗曰平世爲將撫衆而已吾不欲竭中國力以幸功名故訓練士卒馬隨闕繕補有漆弓百五十斤每殺之示無所用軍中士氣盛日夜思戰忠嗣縱詭間伺虜隙時出奇兵襲敵所向無不克故士亦樂爲用軍每出召屬長付以兵使授士卒雖弓矢亦誌姓名其上軍還遺弦亡鏃皆按名第罪以是部下人自勸器甲充牣自朔方至雲中袤數千里據要險築城堡斥地甚遠自張仁亶後四十餘年忠嗣繼其功俄爲河西隴右節度使權朔方河東節度佩四將印勁兵重地控制萬里近世未有也又授一子五品官後數出戰青海積石虜輒奔破又討吐谷渾於墨離平其國乃固讓朔方河東二節度許之帝方事石堡城詔問攻取計忠嗣奏言吐蕃舉國守之若頓兵堅城下費士數萬然後可圖恐所得不讎所失請厲兵馬待擧取之帝意不快而李林甫尤忌其功日鉤撫過咎會董延光建言請下石堡詔忠嗣分兵應接忠嗣不得已爲出軍而士無賞格延光不悅河西兵馬使李光弼入說曰大夫愛惜士卒有拒延光心雖名受詔實奪其謀然大夫已付萬衆而不立重賞何以賈士勇且大夫惜數萬段賜以啟讒口有不如捷歸罪大夫大夫先受禍矣忠嗣曰吾固審得一城不足制敵失之未害於國

吾忍以數萬人命易一官哉明日見責不失一金吾羽林將軍歸宿衛不者黔中上佐耳光弼謝曰大夫乃行古人事光弼又何言趨而出延光過期不克果訴忠嗣沮兵又安祿山城雄武扼飛狐塞謀亂請忠嗣助役因欲留其兵忠嗣先期至不見祿山而還數上言祿山且亂林甫益惡之陰使人誣告忠嗣嘗養宮中云吾欲奉太子帝怒召入付三司訊驗罪應死哥舒翰方有寵白上請以官爵贖忠嗣罪帝意解貶漢陽太守久之徙漢東郡卒年四十五後翰引兵攻石堡拔之死亡略盡如忠嗣言故當世號爲名將初在朔方至互市輒高償馬直諸蕃爭來市故蕃馬寔少唐軍精及鎮河隴又請徙朔方河東九千騎以實軍迄天寶末益滋息寶應元年追贈兵部尚書

贊曰以忠嗣之才戰必破攻必克策石堡之得不當所亡高馬直以空虜資論祿山亂有萌可謂深謀矣然不能自免於讒卒死放地自古忠賢工謀於國則拙於身多矣可勝吒哉

牛仙客涇州鶡觚人初爲縣小史令傅文靜器之會爲隴右營田使引與計事積功遷洮州司馬河西節度使王君奭召爲判官君奭死仙客獨得免蕭嵩代節度復委以軍政仙客清勤不懈接士大夫以信及嵩還執政因薦之稍遷太僕少卿判涼州別駕知節度留後事俄爲節度使開元二十四年代信安王禕爲朔方行軍大總管始在河西舊事省用倉庫積鉅萬器械犀銳崔希逸代之卽以聞帝令刑部員外郎

張利馳傳覆視如狀帝悅將用爲尚書宰相張九齡持不可乃封隴西郡公實封戶二百李林甫探知帝旨稱其材會九齡罷故以工部尚書同中書門下三品知門下事遙領河東節度副大使爲相謹身無它與時沈浮唯唯恭愿前後錫與緘皮不敢用百司諮決無所處可輒曰如令式帝旣用仙客知時議不歸乘間以問高力士力士曰仙客本胥史非宰相器帝忿然曰朕且用康晉蓋患言也有爲晉言者晉以爲實喜甚久之封幽國公加左相卒贈尚書右丞相諡曰貞簡

唐書卷一百三十三

唐書卷一百三十三考證

郭知運子英傑開元二十三年長史薛楚玉遣英傑與裨將吳克勤烏知義羅守忠帥萬騎及奚衆討契丹○臣德潛按綱目於開元二十一年書幽州副總管郭英傑與契丹戰敗死舊書亦作二十一年新書誤

郭知運子英父以功實封三百戶○舊書作二百戶

張守珪子獻誠擢山南西道節度使○舊書作充山南西道觀察使

王忠嗣傳攻多羅斯城涉昆水斬米施可汗○沈炳震曰舊書攻米施可汗走之兩書皆天寶元年事也元宗本紀斬米施在天寶三年以走之爲合

牛仙客傳卒贈尚書右丞相○舊書作贈左丞相

唐書卷一百三十三考證

唐書卷一百三十四

宋 端 明 殿 學 士 宋 祁 撰

列傳第五十九

宇文韋楊王

宇文融京兆萬年人隋平昌公敬裔孫祖節明法令貞觀中為尚書右丞謹幹自將江夏王道宗以事請節節以聞太宗喜賚絹二百勞之曰朕比不置左右僕射正以公在省耳永徽初遷黃門侍郎同中書門下三品代于志寧為侍中坐房遺愛友善貶桂州卒融明辯長於吏治開元初調富平主簿源乾曜孟溫繼為京兆賢其人厚為禮時天下戶版剝隱人多去本籍浮食閭里詭脫絲賦豪弱相并州縣莫能制融由監察御史陳便宜請校天下籍收匿戶羨田佐用度玄宗以融為覆田勸農使鈞檢帳符得偽勳亡丁甚眾擢兵部員外郎兼侍御史融乃奏慕容琦韋洽裴寬班景倩庫狄履溫賈晉等二十九人為勸農判官假御史分按州縣括正戶畝招徠戶口而分業之又兼租地安輯戶口使於是諸道收沒戶八十萬田亦稱是歲終羨錢數百萬緡帝悅引拜御史中丞然吏下希望融旨不能無擾張空最務多其獲而流客頗脫不止初議者以生事沮詰百端而帝意向之宰相源乾曜等佐其舉又集羣臣大議公卿雷同不敢

異唯戶部侍郎楊瑒以爲籍外取稅百姓困弊得不酬失瑒坐左遷融乃自請馳傳行天下事無巨細先上勸農使而後上臺省臺省須其意乃行下融所過見高年宣天子恩旨百姓至有感涕者使還言狀帝乃下詔以客賦所在並建常平倉益貯九穀權發欵官司勸作農社使貧富相恤凡農月州縣常務一切罷省使趨刈穫流亡新歸十道各分官屬存撫使遂厥功復業已定州縣季一中牒不須挾名中書令張說素惡融融每建白說輒引大體廷爭融揣說不善欲先事中傷之張九齡謂說曰融新用事辯給多詐公不可以忽說曰狗鼠何能爲會帝封太山還融以選限簿冬請分吏部爲十銓有詔融與禮部尚書蘇頌刑部尚書韋抗工部尚書盧從愿右散騎常侍徐堅蒲州刺史崔琳魏州刺史崔沔荊州長史韋虛心鄭州刺史賈曾懷州刺史王巨分總而不得參事一決於上融奏選事說屢卻之融怒乃與御史大夫崔隱甫等廷劾說引術士解禱又受賂說由是罷宰相融畏說且復用嘗說不已帝疾其黨詔說致仕放隱甫于家出融爲魏州刺史方河北大水卽詔領宣撫使俄兼檢校汴州刺史河南北溝渠隄堰決九河使又建請墾九河故地爲稻田權陸運本錢收其子入官興役紛然而卒無成功入爲鴻臚卿兼戶部侍郎明年進黃門侍郎同中書門下平章事融曰使吾執政得數月久天下定矣乃薦宋璟爲右丞相裴耀卿爲戶部侍郎許景先爲工部侍郎當時長其知人而性卞急少所推下旣居位日引賓客故人與酣飲然

而神用警敏應對如響雖天子不能屈信安王禕節度朔方融畏其權諷侍御史李宙劾奏之禕密知因玉真公主高力士自歸翌日宙通奏帝怒罷融爲汝州刺史居宰相凡百日去而錢穀亦自此不治帝思之讓宰相曰公等暴融惡朕旣罪之矣國用不足將奈何裴光庭等不能對卽使有司劾融交不逞作威福其息受贓饋狼籍乃貶融平樂尉歲餘司農發融在汴州給隱官息錢巨萬給事中馮紹烈深文推證詔流于巖州道廣州遷延不行爲都督耿仁忠所讓惶恐上道卒初融廣置使額以侈上心百姓愁恐有司濫失職自融始帝猶思其舊功贈台州刺史其後言利得幸者踵相躡皆本於融云

子審字審融之貶也審與兄弟侍母京師及聞融再貶不告其家徒步號泣省父使者憐之以車共載達于巖州後擢進士第累遷大理評事以夏楚大小無制始創杖架以高厚度杖長短又鑄銅爲規齊其巨細楊國忠顯政殺嶺南流人以中使傳口勅行刑畏議者嫉其酷乃以審爲嶺南監決處置等使活者甚衆後終和永二州刺史

韋堅字子全京兆萬年人姊爲惠宣太子妃妹爲皇太子妃中表貴盛故仕最蚤繇祕書丞歷奉光長安令有幹名見宇文融楊慎矜父子以聚斂進乃運江淮租賦所在置吏督察以佐國稟歲終增鉅萬玄宗咨其才擢爲陝郡太守水陸運使漢有運渠起闕門西抵長安引山東租賦訖隋常治之堅爲使乃占咸

陽雍渭爲堰絕灞滄而東注永豐倉下復與渭合初滄水銜苑左有望春樓堅于下鑿爲潭以通漕二年而成帝爲升樓詔羣臣臨觀堅豫取洛汴宋山東小斛舟三百並貯之潭篙工枕師皆大笠侈袖芒屨爲吳楚服每舟署某郡以所產暴陳其上若廣陵則錦銅器官端綾繡會稽則羅吳綾絳紗南海瑋瑁象齒珠琲沉香豫章力士莖飲器茗鑑釜宣城空青石綠始安蕉葛蚌膽翠羽吳郡方文綾船皆尾相銜進數十里不絕關中不識連檣挾櫓觀者駭異先是人間唱得休絃那歌有揚州銅器語開元末得寶符於桃林而陝尉崔成甫以堅大輸南方物與歌語叶更變爲得寶歌自造曲十餘解召吏唱習至是衣缺勝衫錦半臂絳冒額立艦前倡人數百皆巾幘解治齊聲應和鼓吹合作船次樓下堅跪取諸郡輕貨上於帝以給貴戚近臣上百牙盤食府縣教坊音樂迭進惠宣妃亦出寶物供具帝大悅擢堅左散騎常侍官屬賞有差蠲役人一年賦舟工賜錢二百萬名潭曰廣運堅進兼江淮南租庸轉運處置等使又兼御史中丞封韋城縣男堅妻姜皎女李林甫舅子也初甚昵比既見其寵惡之堅亦自以得天子意銳於進又與左相李適之善故林甫授堅刑部尚書奪諸使以楊慎矜代之堅失職稍怨望河西隴右節度使皇甫惟明數於帝前短林甫稱堅才林甫知之惟明故爲忠王友王時爲皇太子矣正月望夜惟明與堅宴集林甫奏堅外戚與邊將私且謀立太子有詔訊鞫林甫使楊慎矜楊國忠王鏐吉温等文致其獄帝感之貶

堅縉雲太守惟明播川太守籍其家堅諸弟訴枉帝大怒太子懼表與妃絕復貶堅江夏別駕未幾長流臨封郡弟蘭爲將作少匠冰郭令芝兵部員外郎子諒河南府戶曹皆謫去歲中遣監察御史羅希奭就殺之殺惟明於黔中惟堅妻得原從坐十餘人倉部員外郎鄭章右補闕內供奉鄭欽說監察御史豆盧友楊惠嗣薛王瑁皆免官被竄堅始鑿潭多壞民冢墓起江淮至長安公私騷然及得罪林甫遣使江淮鉤索堅罪捕治舟夫漕史所在獄皆滿郡縣剝歛償輸責及鄰伍多裸死牢戶林甫死乃絕

楊慎矜隋齊王暕曾孫祖正道從蕭后入突厥及破頡利可汗乃得歸爲尚衣奉御父隆禮歷州刺史善檢督吏以嚴辯自名開元初爲太府卿封弘農郡公時御府財物羨積如丘山隆禮性詳密出納雖尋尺皆自按省凡物經楊卿者號無不精麗歲常愛省數百萬任職二十年年九十餘以戶部尚書致仕卒慎矜沈毅任氣健而才初爲汝陽令有治稱隆禮罷太府立宗訪其子可代父任者宰相以慎餘慎矜慎名皆得父清白帝喜擢慎矜監察御史知太府出納慎餘太子舍人主長安倉慎名大理評事爲含嘉倉出納使被眷尤渥慎矜遷侍御史知雜事高置風格始議輸物有汗傷貴州縣償所直轉輕齋入京師自是天下調發始煩天寶二年權判御史中丞京畿採訪使太府出納如故於時李林甫用事慎矜進非其意固讓不敢拜乃授諫議大夫兼侍御史更以蕭諒爲中丞諒爭輕重不平罷爲陝郡太守林甫知慎矜爲

己屈卒授御史中丞兼諸道鑄錢使韋堅之獄王鉷等方文致而慎矜依違不甚力鉷恨之雖林甫亦不悅鉷父與慎矜外兄弟也故與鉷狎及爲侍御史繇慎矜所引後遷中丞同列慎矜猶以子姓畜之鉷負林甫勢滋不平會慎矜擢戶部侍郎仍兼中丞林甫疾其得君且逼己乃與鉷謀陷之明年慎矜父冢草木皆流血懼以問所善胡人史敬忠敬忠使身桎梏裸而坐林中厭之又言天下且亂勸慎矜居臨汝置田爲後計會婢春草有罪將殺之敬忠曰勿殺賣之可市十牛歲耕田十頃慎矜從之婢入貴妃姊家因得見帝帝愛其辯惠留宮中澣侍左右帝嘗問所從來婢奏爲慎矜家所賣帝曰彼乏錢邪對曰固將死賴史敬忠以免帝素聞敬忠挾術問質其然婢具言敬忠夜過慎矜坐庭中步星變夜分乃去又白獸勝事帝怒而婢漏言於楊國忠國忠方睦陰相語始慎矜奪鉷職田辱詬其母又嘗私語識書鉷銜之未有發也至聞國忠語乃喜且欲嘗帝以取驗異時奏事數稱引慎矜帝悖然曰爾親邪毋相往來鉷知帝惡甚後見慎矜輒侮不爲禮慎矜怒鉷乃與林甫作飛牒告慎矜本隋後蕃識緯妖言與妄人交規復隋室帝方在華清宮聞之震怒收慎矜尚書省詔刑部尚書蕭冕大理卿李道邃殿中侍御史盧鉉楊國忠雜訊馳遣京兆士曹參軍吉溫繫慎餘慎名於洛陽獄考治捕太府少卿張瑄致會昌傳舍劾瑄與慎矜共解圖讖榜掠不服鉉遣御史崔器索讖書於慎矜小妻臥內得之詎曰逆賊所寘固密今得矣以示

慎矜慎矜曰它日無是今得之吾死命矣夫溫又誘敬忠首服詰言慎矜不能對有詔杖敬忠賜慎矜瑄死籍其家子女悉置嶺南姻黨通事舍人辛景湊天馬副監万俟承暉閑廐使殿中監韋衢等坐竄徙者十餘族所在部送近親不得仕京師遣御史顏真卿馳洛陽決獄慎餘慎名聞兄死皆哭既讀詔輟哭慎名曰奉詔不敢稽死但真姊垂白作數行書與別真卿許之索筆曰拙於謀己兄弟併命姊老孤兒何以堪此遂縊手指天而絕慎矜兄弟友愛事姊如母儀幹皆秀偉愛賓客標置不凡著稱於時慎名嘗視鑑歎曰兄弟皆六尺餘此貌此才欲見容當世難矣胡不使我少體弱邪世哀其言寶應初慎矜王琚韋堅皆復官爵

王鉷中書舍人璿側出子也初爲鄆尉遷監察御史擢累戶部郎中數按獄深文玄宗以爲才進兼和而糴長春宮戶口色役使拜御史中丞京畿關內採訪黜陟使林甫方興大獄搃東宮誅不附己者以鉷險刻可動以利故倚之使鷲擊狼噬鉷所摧陷多抵不道又厚誅斂嚮天子意人雖被蠲貸鉷更奏取脚直轉異貨百姓間關輸送乃倍所賦又取諸郡高戶爲租庸脚士大抵贖業皆破督責連年人不賴生帝在位久妃御服玩脂澤之費日侈而橫與別賜不絕于時重取於左右藏故鉷迎帝旨歲進錢鉅億萬諸禁中以爲歲租外物供天子私帑帝以鉷有富國術寵遇益厚以戶部侍郎仍御史中丞加檢察內作閑

廡使苑內營田五坊宮苑等使隴右羣牧度支營田使天寶八載方士李渾上言見太白老人告玉版祕
記事帝詔鉉按其地求得之因是羣臣奉上帝號明年鉉爲御史大夫兼京兆尹加知總監裁使於是
領二十餘使中外畏其權鉉於第左建大院文書叢委吏爭入求署一字累數日不得者天子使者賜遺
相望聲焰薰灼帝寵任鉉亞林甫而楊國忠不如也然鉉畏林甫謹事之安祿山怙寵見林甫白事稍自
怠林甫欲示之威託以事召王大夫俄而鉉至趨進俯伏祿山不覺自失鉉語久祿山益恭故林甫雖忌
其盛亦以附己親之子準爲衛尉少卿以鬪雞供奉禁中林甫子岫亦親近準驕甚凌岫出其上過駙馬
都尉王繇以彈彈其巾折玉簪爲樂既置酒永穆公主親視供具萬年尉章黃裳長安尉賈季隣等候準
經過饌具倡樂必素辦無敢違意鉉事嫡母孝而與弟錚友愛錚疾鉉宦達常忿慢不弟錚終不異情錚
歷戶部郎中錚與錚召術士語不軌術士驚引去錚畏事泄託它事捕殺之以絕口王府司馬安定公主
子章會竊語於家左右往白錚錚遣季隣收會長安獄夜縊死以尸還家會姻屬權近而惕息不敢言錚
封太原縣公兼殿中監爲中丞也與楊國忠同列用林甫薦爲大夫故國忠不悅錚與邢縉善縉鴻臚少
卿璿子也以功名相期錚因錚亦交縉十一載四月縉與錚謀引右龍武軍萬騎燒都門誅執政作難先
二日事覺帝召錚付告牒錚意錚與縉連故緩其事但督兩縣尉捕賊賈季隣逢錚於路錚謂曰我與縉

有舊今反恐妄相引君勿受既至縉與其黨持弓刃突出格鬪錚與國忠繼至縉黨相語曰勿鬪大夫或
白國忠曰賊語陰相謂不可戰會高力士以飛龍小兒甲騎四百至斬縉盡禽其黨國忠奏錚與謀帝不
信林甫亦爲錚言故帝原錚不問然欲錚請錚罪使國忠諷之錚良久曰弟爲先人所愛義不欲捨而謀
存帝聞頗怒而陳希烈固爭當以大逆錚未知方上表自解有詔希烈訊錚矣有司不肯通奏錚見林甫
林甫曰事後矣俄而錚至國忠問曰大夫與否未及應侍御史裴冕叱錚曰上以大夫故官君五品君爲
臣不忠爲弟不誼大夫豈與反事乎國忠愕然曰與固不可隱不與不可妄錚乃曰兄不與獄具詔錚杖
死錚賜死三衛尉冕請國忠以其尸歸斂葬之諸子悉誅家屬徙遠方有司籍第舍數日不能徧至以寶
鈿爲并幹引泉激雷號自雨亭其奢侈類如此錚兄錫見諸弟貴盛不肯仕錚疆之爲太子僕至是貶東
區尉死於道時人傷焉初錚附楊慎矜以貴已而佐林甫陷慎矜覆其家凡五年而錚亦族矣盧鉉者本
以御史事章堅爲判官堅被劾鉉發其私以結林甫又善張瑄及按慎矜則誣瑄死至錚得罪方爲閑廡
判官妄曰大夫以牒索馬五百我不與衆疾其反覆貶廬江長史它日見瑄如平生乃曰公何得來此願
假須臾卒死

贊曰開元中字文融始以言利得幸於時天子見海內完治偃然有攘卻四夷之心融度帝方調兵食故

議取隱戶剩田以中主欲利說一開天子恨得之晚不十年而取宰相雖後得罪而追恨融才有所未盡也孟子所謂上下征利而國危者可不信哉天寶以來外奉軍興內蠱艷妃所費愈不貲計於是韋堅楊慎矜王鉷楊國忠各以衰刻進剝下益上歲進羨縉百億萬為天子私藏以濟橫賜而天下經費自如帝以為能故重官累使尊顯烜赫然天下流亡日多於前有司備員不復事而堅等所欲既充還用權媚以相屠脅四族皆覆為天下笑夫民可安而不可擾利可通而不可竭觀數子乃欲擾而竭之斂怨基亡則向所謂利者顧不反哉鉷國忠後出橫虐最甚當方毒天下復思融云

唐書卷一百三十四

唐書卷一百三十四考證

宇文融傳融乃奏慕容琦等二十九人為勸農判官○臣德潛按舊書置勸農判官十人通鑑綱目俱作十人

楊慎矜傳詔刑部尚書蕭冕○舊書作蕭隱之

王鉷傳然鉷畏林甫謹事之○舊書作雖晉公林甫亦畏避之

唐書卷一百二十四考證

唐書卷一百三十五

宋 端 明 殿 學 士 宋 祁 撰

列傳第六十

哥舒高封

哥舒翰其先蓋突騎施酋長哥舒部之裔父道元為安西都護將軍赤水軍使故仍世居安西翰少補效
 殿府果毅家富于財任俠重然諾縱蒲酒長安市年四十餘遭父喪不歸不為長安尉所禮慨然發憤游
 河西事節度使王倕倕攻新城使翰經略稍知名又事王忠嗣署衙將翰能讀左氏春秋漢書通大義疏
 財多施予故士歸心為大斗軍副使佐安思順不相下忠嗣更使討吐蕃副將倨見翰怒立殺之麾下為
 股扞遷左衛郎將吐蕃盜邊與翰遇苦拔海吐蕃枝其軍為三行從山差池下翰持半段槍迎擊所嚮輒
 披靡名蓋軍中擢授右武衛將軍副隴右節度為河源軍使先是吐蕃候積石軍麥熟歲來取莫能禁翰
 乃使王難得楊景暉設伏東南谷吐蕃以五千騎入塞放馬褫甲將就田翰自城中馳至躡虜駭走追
 北伏起悉殺之隻馬無遺者翰嘗逐虜馬驚陷于河吐蕃三將欲刺翰大呼皆擁矛不敢動救兵至追
 殺之翰有奴曰左車年十六以臂力聞翰工用槍追及賊擬槍於肩叱之賊反顧翰刺其喉剔而騰之高

五尺許乃墮左車卽下馬斬其首以爲常會忠嗣被罪帝召翰入朝部將請齎金帛以救忠嗣翰但齎樸裝曰使吾計從奚取於是不行用此足矣翰至帝虛心待與語異之拜鴻臚卿爲隴右節度副大使翰已謝卽極言忠嗣之枉帝起入禁中翰叩頭從帝且泣帝寤爲未貸其罪忠嗣不及誅朝廷稱其義踰年築神威軍青海上吐蕃攻破之更築於龍駒島有曰龍見因號應龍城翰相其川原宜畜牧謫罪人二千戍之由是吐蕃不敢近青海天寶八載詔翰以朔方河東羣牧兵十萬攻吐蕃石堡城數日未克翰怒梓其將高秀巖張守瑜將斬之秀巖請三日期如期而下遂以赤嶺爲西塞開屯田備軍實加特進賜資彌渥十一載加開府儀同三司翰素與安祿山安思順不平帝每欲和解之會三人俱來朝帝使驃騎大將軍高力士宴城東翰等皆集詔尙食生擊鹿取血瀹腸爲熱洛河以賜之翰母于闐王女也祿山謂翰曰我父胡毋突厥公父突厥母胡族類本同安得不親愛翰曰諺言狐向窟嗥不祥以忘本也兄旣見愛敢不盡心祿山以翰譏其胡怒罵曰突厥敢爾翰欲應之力士目翰翰詭醉去久之進封涼國公兼河西節度使攻破吐蕃洪濟大莫門等城收黃河九曲以其地置洮陽郡築神策宛秀二軍進封西平郡王賜音樂田園又賜一子五品官裨將賞拜有差宰相楊國忠惡祿山白發其反狀故厚結翰俄進太子少保翰者酒極聲色因風痺體不仁旣疾廢遂還京師閤門不朝請十四載祿山反封常清以王師敗帝乃召見翰

拜太子先鋒兵馬元帥以田良丘爲軍司馬蕭昕爲判官王思禮鉗耳大福李承光高元蕩蘇法鼎管崇嗣爲屬將火拔歸仁李武定渾萼契苾靈以本部隸麾下凡河隴朔方奴刺等十二部兵二十萬守潼關師始東先驅牙旗觸門墮注旄干折衆惡之天子御勤政樓臨送詔翰以軍行過門毋下百官郊餞旌旗亘二百里翰惶恐數以疾自言帝不聽然病瘠不能事以軍政委良丘使王思禮主騎李承光主步三人爭長政令無所統一衆攜弛無關意明年進拜尙書左僕射同中書門下平章事祿山遣子慶緒攻關翰擊走之始安思順度祿山必反嘗爲帝言得不坐翰旣惡祿山又怨思順及是知重兵在己有所論請天子重違因僞爲賊書遺思順者使關邏禽以獻翰因疏七罪請誅之有詔思順及弟元貞皆賜死徙放其家國忠始懼或說翰曰祿山本以誅國忠故稱兵今若留卒三萬守關悉精銳度澹水誅君側此漢挫七國計也思禮亦勸翰翰猶豫未發謀頗露國忠大駭入見帝曰兵法安不忘危大兵在潼關而無後殿萬有一不利京師危矣旣募牧兒三千人日夜訓練以劍南列將分統之又募萬人屯灞上使腹心杜乾運爲帥翰疑圖已表請乾運兵隸節下因詭召乾運計事者至軍卽斬首梟牙門并其軍國忠愈恐謂其子曰吾無死所矣然翰亦不自安又謀久不決數奏言祿山雖竊據河朔不得人心請持重以儆之待其離隙可不血刃而禽賊將崔乾祐守陝郡仆旗鼓羸師以誘戰覘者曰賊無備可圖也帝信之詔翰進討翰

報曰祿山習用兵今始為逆不能無備是陰計誘我賊遠來利在速戰王師堅守毋輕出關計之上也且四方兵未集宜觀事勢不必速當是時祿山雖盜河洛所過殘殺人人怨之淹時月不能進尺寸地又郭子儀李光弼兵益進取常山十數郡祿山始悔反矣將還幽州以自固而國忠計迫謬說帝趣輸出潼關復陝洛時子儀光弼遙計曰翰病且耄賊素知之諸軍烏合不足戰今賊悉銳兵南破宛洛而以餘眾守幽州吾直擣之覆其巢窟質叛族以招逆徒祿山之首可致若師出潼關變生京師天下殆矣乃極言請翰固關無出軍而帝入國忠之言使使者趣戰項背相望也翰窘不知所出六月引而東慟哭出關次靈寶西原與乾祐戰由關門七十里道險隘其南薄山北阻河賊以數千人先伏險翰浮舟中流以觀軍謂乾祐兵寡易之促士卒進道阻無行列賊乘高頽石下擊殺士甚眾翰與良已登北阜以軍三萬夾河鳴鼓思禮等以精卒居前餘軍十萬次之乾祐為陣十五五或卻或進而陌刀五千列陣後王師視其陣無法指觀嗤笑曰禽賊乃會食及戰乾祐旗少偃如欲遯者王師懈不為備伏忽起薄戰皆奮死鬪翰以氍毹蒙馬車畫龍虎飾金銀爪目將駭賊持戈矢逐北賊負薪塞路順風火其車燦燦熾熾騰煙如夜士不復相辨自相鬪殺尸血狼籍久乃悟又棄甲奔山谷及陷河死者十一一有糧艘百餘軍爭濟艘輒沈至縛矛盾乘以度喧叫振天地賊乘之奔潰略盡始關門有三壘廣二丈深一丈士馬奔感相壓進少選壘

平後至者踐之以入既敗翰引數百騎絕河還營羸兵裁八千至潼津收散卒復守關乾祐進攻於是火拔歸仁等給翰出關翰曰何邪曰公以二十萬眾一日覆沒持是安歸公不見高芝仙等事乎翰曰吾寧效仙芝死汝舍我歸仁不從執以降賊械送洛陽京師震動由是天子西幸祿山見翰責曰汝常易我今何如翰俯伏謝罪曰陛下撥亂主今天下未平李光弼在土門來瑱在河南魯兗在南陽臣為陛下以尺書招之三面可平祿山悅即署司空同中書門下平章事執火拔歸仁曰背主忘義吾不爾容斬之翰以書招諸將皆讓翰不死節祿山知事不可就囚之東京平安慶緒以翰度河及敗乃殺之翰為人嚴少恩軍行未嘗卹士飢寒有啗民楫者痛笞辱之監軍李大宜在軍中不治事與將士構誦飲酒彈箏篴琵琶為樂而士米糲不饜帝令中人袁思藝勞師士皆訴衣服穿空帝即斥御服餘者製袍十萬以賜其軍翰藏庫中及敗封錡如故先是有客梁慎初遣翰書請壁勿戰以屈賊翰善之奏為左武衛曹參軍留幕府及翰與國忠貳慎初曰難將作矣乃遁去翰失守華陰馮翊上洛郡官吏皆潰帝遣劍南將劉光庭等將新募兵萬餘人往助翰未至而翰被縛云其後贈太尉諡曰武愨

子嚮字子明八歲玄宗召見華清宮擢尚輦奉御累遷光祿卿以翰陷賊哀憤號慟故吏裴冕杜鴻漸等見之歎息李光弼討河北曜誰行拜鴻臚卿為光弼副降安太清救宋州有功改殿中監襲封為東都鎮

守兵馬使德宗立召爲左龍武大將軍李希烈陷汝州以周冕爲僞刺史詔拜曜東都汝州行營節度使將鳳翔邠靈涇原奉天好時兵萬人討希烈帝召見問曰卿治兵孰與父賢對曰先臣臣安敢比但斬長蛇殪封豕然後待罪私室臣之願也帝曰爾父在開元時朝廷無西憂今朕得卿亦不東慮及行帝祖通化門是日牙干折時以翰出師已如此而斬持旗者卒以敗今曜復爾人憂之曜擊賊收汝州禽冕以獻斬其將二人希烈退保許州詔城襄城曜以疲人版築不如按甲持重以挫之帝不許有詔督戰曜進次潁橋雷震軍中七馬斃曜懼還屯襄城希烈遣衆萬人縱火攻柵殪人于壘以薄壘曜苦戰破之居數月希烈自率兵三萬圍曜築甬道屬城矢集如雨帝遣神策將劉德信以兵三千援之又詔河南都統李勉出兵相犄角勉以希烈在外許守兵少乘虛襲之希烈自解乃遣部將與德信趨許未至有詔切讓使班師德信等惶惑還軍無斥候至扈湖爲賊設伏詭擊死者殆半器械輜重皆亡德信走汝州勉恐東都危使將李堅華以兵四千柱守成輿道不得入汴兵沮襄城圍益急帝乃詔普王以荆襄江西鄂沔之師討蔡州詔涇原節度使姚合言球襄城未行京師亂帝幸奉天襄城陷曜走洛陽會母喪奪爲東都畿汝節度使遷河南尹曜拙於統御而銳殺戮士畏而不懷貞元元年部將叛夜焚河南門曜挺身免帝以汴州刺史薛珣代之召入爲鴻臚卿終右驍衛上將軍贈幽州大都督子七人俱以儒聞恒茂才高第有戰破

嶠嶷皆明經擢第

高仙芝高麗人父舍雞初以將軍隸河西軍爲四鎮校將仙芝年二十餘從至安西以父功補游擊將軍數年父子並班仙芝美姿質善騎射父猶以其儒緩憂之初事節度使田仁琬蓋嘉運等不甚知名後事夫蒙靈督乃善遇之開元末表爲安西副都護四鎮都知兵馬使小勃律其王爲吐蕃所誘妻以女故西北二十餘國皆羈屬吐蕃自仁琬以來三討之皆無功天寶六載詔仙芝以步騎一萬出討是時步兵皆有私馬自隨仙芝乃自安西過撥換城入握瑟德經疏勒登蔥嶺涉播密川遂頓特勒滿川行凡百日特勒滿川卽五識匿國也仙芝乃分軍爲三使疏勒趙崇毗自北谷道撥換賈崇瓘自赤佛道仙芝與監軍邊令誠自護蜜俱入約會連雲堡堡有兵千餘城南因山爲柵兵九千守之城下據婆勒川會川漲不得渡仙芝殺牲祭川命士人齋三日精集水涯士不甚信旣涉旗不濡兵已成列仙芝喜告令誠曰嚮吾方涉賊擊我我無類矣今旣濟而陣天以賊賜我也遂登山挑戰日未中破之拔其城斬五千級生擒千人馬千餘匹衣資器甲數萬計仙芝欲遂深入令誠懼不肯行仙芝留羸弱三千使守遂引師行三日過坦駒嶺嶺峻絕下四十里仙芝恐士憚險不敢進乃潛遣二十騎衣阿弩越胡服來迎先語部校曰阿弩越胡來迎我無慮矣旣至士不肯下曰公驅我何去會二十人至曰阿弩越胡來迎已斷娑夷橋矣

仙芝即陽喜令士盡下娑夷河弱水也既行三日越胡來迎明日至阿弩越城遣將軍席元慶以精騎一千先往謂小勃律王曰不聞若城吾假道趨大勃律耳城中大酋領皆吐蕃腹心仙芝密令元慶曰若酋領逃者第出詔書呼之賜以繒綵至皆縛以待我元慶如言仙芝至悉斬之王及妻逃山穴不可得仙芝招喻乃出降因平其國急遣元慶斷娑夷橋其暮吐蕃至不克度橋長度一箭所及者功一歲乃成八月仙芝以小勃律王及妻自赤佛道還連雲堡與令誠俱班師於是拂菻大食諸胡七十二國皆震攝降附仙芝遣判官王庭芬奏捷京師軍至河西靈贊怒不迎勞既見罵曰高麗奴子闕使爾何從得之仙芝懼且謝曰中丞力也又曰馬者鎮守使安西副都護都知兵馬使皆何從得之答曰亦中丞力也靈贊曰審若此捷書不待我而敢即奏何邪奴當斬顧新立功故貸爾仙芝不知所為令誠密言狀於朝且曰仙芝立功而以憂死後孰為朝廷用者帝乃擢仙芝鴻臚卿假御史中丞代靈贊為四鎮節度使而詔靈贊還靈贊懼仙芝朝夕見輒趨走靈贊益慙副都護程千里衛將軍思琛行官王滔康懷順陳奉忠等皆嘗譖仙芝於靈贊者既視事呼千里嫚罵曰公面雖男兒而心似婦女何邪謂琛曰爾奪吾城東千石種田憶之乎對曰公見賜者仙芝曰爾時吾畏汝威豈憐汝而賜邪又召滔欲粹辱良久皆釋曰吾不恨矣由是舉軍安之俄加左金吾衛大將軍與一子五品官九載討石國其王車鼻施約降仙芝為俘獻闕下斬之

由是西域不服其王子走大食乞兵攻仙芝於怛邏斯城以直其冤仙芝為人貪破石獲瑟瑟十餘斛黃金五六橐駝良馬寶玉甚眾家貲累鉅萬然亦不甚愛惜人有求輒與不問幾何尋除武威太守代安思順為河西節度使羣胡固留思順更拜右羽林軍大將軍封密雲郡公祿山反榮王為元帥仙芝副之領飛騎驍騎及朔方等兵出禁財募關輔士五萬繼封常清東討帝御勤政樓引榮王受命宴仙芝以下帝又幸望春亭勞遣詔監門將軍邊令誠監軍次陝郡而常清敗還仙芝急乃開太原倉悉以所有賜士卒焚其餘引兵趨潼關會賊至甲仗資糧委於道彌數百里既至關勒兵繕守具士氣稍稍復振賊攻關不得入乃引還初令誠數私於仙芝仙芝不應因言其逗撓狀以激帝且云常清以賊搖眾而仙芝棄陝地數百里賒盜稟賜帝大怒使令誠即軍中斬之令誠已斬常清陳尸於灤蔭仙芝自外至令誠以陌刀百人自轡曰大夫亦有命仙芝遽下曰我退罪也死不敢辭然以我為盜頡資糧誣也謂令誠曰上天下地三軍皆在君豈不知又顧麾下曰我募若輩本欲破賊取重賞而賊勢方銳故遷延至此亦以固關也我有罪若輩可言不爾當呼枉軍中威呼曰枉其聲殷地仙芝視常清尸曰公我所引拔又代吾為節度今與公同死豈命歟遂就死

封常清蒲州猗氏人外祖教之讀書多所該究然孤貧年過三十未有名夫蒙靈贊為四鎮節度使以高

仙芝爲都知兵馬使嘗出軍奏僉從三十餘人衣襦鮮明常清慨然投牒請豫常清素瘠又脚踏仙芝陋其貌不納明日復至仙芝謝曰僉已足何庸復來常清怒曰我慕公義願事鞭勒故無媒自前公何見拒深乎以貌取士恐失之子羽公其念之仙芝猶未納乃日候門下仙芝不得已竄名僉中會達奚諸部叛自黑山西趨碎葉有詔邀擊靈嘗使仙芝以二千騎追躡達奚行遠人馬疲餒略盡常清於幕下潛作捷布具記井泉次舍克賊形勢謀略條最明審仙芝取讀之皆意所欲出乃大駭卽用之軍還靈嘗迎勞仙芝已去奴祿帶刀而判官劉眺獨孤峻爭問向捷布誰作者公幕下安得此人答曰吾僉封常清也眺等驚進揖常清坐與語異之遂知名以功授豐州戍主仍爲判官仙芝破小勃律代靈嘗爲安西節度使常清以從戰有勞擢慶王府錄事參軍事爲節度判官仙芝征討常知戎務常清才而果曾無疑事仙芝委家事於郎將鄭德詮其乳母子也威動軍中常清嘗自外還諸將前謁德詮見常清始貴易之走馬突常清騎士去常清命左右引德詮至廷中門輒閉因離席曰吾起細微中丞公過聽以主留事郎將安得無禮德詮曰須暫假郎將死以肅吾軍因杖死以面仆地曳出之仙芝妻及乳母哭門外救請不能得遽以狀白仙芝仙芝驚及見常清憚其公不敢讓常清亦不謝會大將有罪又殺二人軍中莫不股慄仙芝節度河西復請爲判官久之擢安西副大都護安西四鎮節度副大使知節度事未幾改北庭都護持節

伊西節度使常清性勤儉耐勞苦出軍乘驟私廐裁二馬賞罰分明天寶末入朝而安祿山反帝引見問何策以討賊常清見帝憂因大言曰天下太平久人不知戰然事有逆順勢有奇變臣請馳至東京悉府庫募驍勇挑馬鎗度河計日取逆胡首以獻闕下天子壯之明日以常清爲范陽節度副大使乘驛赴東京常清募兵得六萬人然皆市井庸保乃部分旗幟斷河陽橋以守賊移書平原令太守顏真卿以兵七千防河真卿馳使司兵叅軍事李平入奏常清取平表發視卽倚帳作書遺真卿勸堅守且傳購祿山檄數十函與之真卿得以分曉諸郡祿山度河陷滎陽入嬰子谷先驅至蔡園常清使驍騎拒之殺拓羯數十百人賊大軍至常清不能禦退入上東門戰不利賊鼓而進劫官吏再戰於都亭驛又不勝引兵守宣仁門復敗乃自提象門出伐大木塞道以殿至穀水西奔陝語高仙芝曰賊銳甚難與爭鋒潼關無兵一夫奔突則京師危不如急守潼關仙芝從之敗書聞帝削常清官使白衣隸仙芝軍効力仙芝使衣黑衣監左右部軍及邊令誠以詔書至示之常清曰吾所以不死者恐汙國家節度戮賊手今死乃甘心始常清敗徑入關欲見上陳討賊事至渭南有詔赴潼關常清憂懼爲表以謝且言自東京陷三遣使表論成敗不得對又言臣死後望陛下無輕此賊則社稷安至是臨刑以表授令誠而死人多哀之

贊曰祿山哀百鬪驍虜乘天下忘戰主德耄勤故提戈內諫人情崩潰常清乃驅市人數萬以嬰賊鋒一

戰不勝即奪爵土欲入關見天子論成敗事使者三輩上書皆不報回斬于軍仙芝棄陝守關遏賊西勢以喪地被誅玄宗雖爲左右蒙瞽然荒奪其明亦甚矣卒使叛將得藉口執翰以降賊嗚呼非天熟其惡使亂四海舉黔首而殘之邪彼二將奚誅焉

唐書卷一百三十五

唐書卷一百三十五考證

高仙芝傳仙芝遣判官王庭芬奏捷京師○舊書作王庭芳

唐書卷一百三十五考證

唐書卷一百三十六

宋 端 明 殿 學 士 宋 祁 撰

列傳第六十一

李光弼

李光弼營州柳城人父楷洛本契丹酋長武后時入朝累官左羽林大將軍封薊郡公吐蕃寇河源楷洛率精兵擊走之初行謂人曰賊平吾不歸矣師還卒于道贈營州都督諡曰忠烈光弼嚴毅沈果有大略幼不嬉弄善騎射起家左衛親府左郎將累遷左清道率兼安北都護補河西王忠嗣府兵馬使充赤水軍使忠嗣遇之厚雖宿將莫能比嘗曰它日得我兵者光弼也俄襲父封以破吐蕃吐谷渾功進雲麾將軍朔方節度使安思順表為副知留後事愛其材欲以子妻之光弼引疾去隴右節度使哥舒翰異其操表還長安安祿山反郭子儀薦其能詔攝御史大夫持節河東節度副大使知節度事兼雲中太守尋加魏郡太守河北採訪使光弼以朔方兵五千出土門東救常山次真定常山圍結子弟執賊將安思義降自顏泉卿死郡為戰區露紫蔽野光弼酌而哭之出為賊幽閉者厚恤其家時賊將史思明李立節蔡希德攻饒陽光弼得思義不殺問其計答曰今軍行疲勞逢敵不可支不如按軍入守料勝而出虜兵焮銳

弗能持重圍之萬全光弼曰善據城待明日思明兵二萬傅堞光弼兵不得出乃以勁弩五百射之賊退徙陣稍北光弼出其南夾泚沱而軍思明雖數困然恃近救解鞍休士是日饒陽賊五千至九門光弼謀知之提輕兵斂旗鼓伺賊方飯襲殺之且盡思明懼引去以奇兵斷饒道馬食薦藉光弼命將取芻行唐賊鈔擊之兵負戶戰賊不能奪會郭子儀收雲中詔悉衆出并陘與光弼合擊賊九門西思明大敗挺身走趙郡立節中流矢死希德走鉅鹿收彙城等十縣遂攻趙詔加光弼范陽大都督府長史范陽節度使思明繇鼓城入博陵殺官吏景城河間信都清河平原博平六郡結營自守以附光弼光弼急攻趙一日拔之士多鹵掠光弼坐譙門收所獲悉歸之民城中大悅進圍博陵未下與子儀合擊思明於嘉山大破之光弼以范陽本賊巢窟當先取之握賊根本會潼關失守乃拔軍入并陘肅宗卽位詔以兵赴靈武更授戶部尙書同中書門下平章事節度如故光弼以景城河間兵五千入大原前此節度使王承業政弛謬侍御史崔衆主兵太原每侮狎承業光弼素不平及是詔衆以兵付光弼衆素狂易見光弼長揖卽付兵光弼怒收繫之會使者至拜衆御史中丞光弼曰衆有罪已前繫今但斬侍御史若使者宣詔亦斬中丞使者內詔不敢出乃斬衆以徇威震三軍至德二載思明希德率高秀巖牛廷玠將兵十萬攻光弼時銳兵悉赴朔方而麾下卒不滿萬衆議培城以守光弼曰城環四十里賊至治之徒疲吾人乃徹民屋

爲掘石車車二百人挽之石所及輒數十人死賊傷十二思明爲飛樓障以木幔築土山臨城光弼遣穴地類之思明宴城下倡優居臺上斬指天子光弼遣人隧地禽取之思明大駭徙牙帳遠去軍中皆視地後行又潛溝營地將沈其軍乃陽約降至期以甲士守陴遣裨校出若送款者思明大悅俄而賊數千沒于壘城上鼓譟突騎出乘之俘斬萬計思明畏敗乃去留希德攻太原光弼出敢死士搏賊斬首七萬級希德委資糧遁走初賊至光弼設公幄城隅以止息經府門不顧圍解闕三替乃歸私寢收清夷橫野等軍賊別將攻好時破大橫關光弼追敗之加檢校司徒尋遷司空封鄭國公食實戶八百乾元元年入朝詔朝官四品以上郊謁進兼侍中與九節度圍安慶緒於相州大戰鄴西敗之光弼與諸將議思明勒兵魏州欲以怠我不如起軍逼之彼懲嘉山之敗不敢輕出則慶緒可禽觀軍容使魚朝恩固謂不可旣而思明來援光弼拒賊戰尤力殺略大當會諸將驚潰各引歸所在剽掠獨光弼整衆還太原帝貸諸將罪以光弼兼幽州大都督府長史知諸道節度行營事又代子儀爲朔方節度使未幾爲天下兵馬副元帥光弼以河東騎五百馳東都夜入其軍且謂賊方闕洛當扼虎牢帥師東出河上檄召兵馬使張用濟用濟憚光弼嚴教諸將逼留其兵用濟單騎入謁光弼斬之以辛京杲代復追都將僕固懷恩懷恩懼先期至會滑汴節度使許叔冀戰不利降賊思明乘勝西嚮光弼帥陣徐行趨東京謂留守韋陟曰賊新勝難

與爭鋒欲誦之以計然洛無見糧危備難守公計安出陟曰益陝兵公保潼關可以持久光弼曰兩軍相敵尺寸地必爭今委五百里而守關賊得地勢益張不如移軍河陽北阻澤潞勝則出敗則守表裏相應賊不得西此獲臂勢也夫辨朝廷之禮我不如公論軍旅勝負公不如我陟不能答判官韋損曰東都乃帝宅公當守之光弼曰汜水嶠嶺盡爲賊蹊子能盡守乎遂檄河南縱官吏避賊閉無留人督軍取戰守備思明至偃師光弼悉軍趨河陽身以五百騎殿賊游騎至石橋諸將曰並城而北乎當石橋進乎光弼曰當石橋進夜甲士持炬徐引部曲重壘賊不敢逼已入三城衆二萬軍纒十日糧與卒伍均少棄甘賊憚光弼未敢犯宮闕頓白馬祠治塹溝築月城以守賊攻光弼與戰中渾西破逆黨斬千級溺死者甚衆生執五千人初光弼謂李抱玉曰將軍能爲我守南城二日乎抱玉曰過期何若曰棄之抱玉許諾即給賊曰吾糧盡明日當降賊喜歛兵待期抱玉已繕完即請戰賊忿急攻之抱玉出奇兵夾擊俘獲過當賊帥周擊引却光弼自將治中渾樹壁掘塹擊捨南城攻中渾光弼遣荔非元禮戰羊馬賊大潰擊收兵復振與安太清合衆三萬攻北城光弼斂軍入登陴望曰彼軍雖銳然方陣而鬪不足虞也日中當破乃出戰及期未決召諸將曰彼疆而可破者亂也今以亂擊亂宜無功因問賊陣何所最堅曰西北隅召郝廷玉曰爲我以麾下破之曰廷玉所將步卒請騎五百與之三百復問其次曰東南隅召論惟貞辭曰蕃

將也不知步戰請鐵騎三百與之二百乃出賜馬四十分給廷玉等光弼執大旗曰望吾旗麾若緩可觀便宜若三麾至地諸軍畢入生死以之退者斬旣而馮瑒望廷玉軍不能前趨左右取其首來廷玉曰馬中矢非卻也乃命易佗馬有裨將援矛刺賊洞馬腹中數人又有迎賊不戰而卻者光弼召援矛者賜絹五百匹不戰者斬光弼麾旗三諸軍爭奮賊衆奔敗斬首萬餘級俘八千餘人馬二千軍資器械以億計禽周擊徐瓚玉李秦授惟太清挺身走思明未知猶攻南城光弼驅所俘示之思明大懼築壘以拒官軍始光弼將戰內刀于鞞曰戰危事吾位三公不可辱于賊萬有一不捷當自刎以謝天子及是西向拜舞三軍感動太清襲懷州守之上元元年加太尉中書令進圍懷州思明來救光弼再逐北思明見兵河清聲度河絕餉路光弼壁野水度旣夕還軍留牙將雍希顥守曰賊將高暉李日越萬人敵也賊必使劫我爾留此賊至勿與戰若降與偕來左右竊怪語無倫是日思明果召日越曰光弼野次爾以鐵騎五百夜取之不然無歸日越至壘使人問曰太尉在乎曰去矣兵幾何曰千人將爲誰曰雍希顥日越謂其下曰我受命云何今顧獲希顥歸不免死遂請降希顥與俱至光弼厚待之表授特進兼右金吾大將軍高暉聞亦降或問公降二將何易也光弼曰思明再敗恨不得野戰聞我野次彼固易之命將來襲必許以死希顥無名不足以爲功日越懼死不降何待高暉材出日越之右降者見遇貳者得不思奮乎諸軍決丹

水灌懷州未下光弼令廷玉由地道入得其軍號登陴大呼王師乘城禽太清楊希仲送之京師獻俘太廟進食寶戶一千五百思明使諜宣言賊將士皆北人譎喻思歸朝恩信然屢上賊可滅狀詔諭光弼光弼固言賊方銳未可輕動僕固懷恩媚光弼功陰佐朝恩陳掃除計使者來督戰光弼不得已令李抱玉守河陽出師次北邙光弼使傅山陣懷恩曰我用騎今迫險非便地請陣諸原光弼曰有險可以勝可以敗陣于原敗斯殲矣且賊致死于我不如阻險懷恩不從賊據高原以長戟七百壯士執刀隨之委物僞遁懷恩軍爭剽獲伏兵發官軍大潰懷州復陷光弼度河保聞喜抱玉以兵募棄河陽光弼請罪帝以懷恩違令覆軍優詔召光弼入朝懇讓太尉更拜開府儀同三司中書令河中尹晉絳等州節度使未幾復拜太尉兼侍中河南副元帥知河南淮南京西山南東荆南五道節度行營事鎮泗州帝爲賦詩以饒朝義乘邙山之捷進略申光等十三州光弼與疾就道監軍使以兵少請保揚州光弼曰朝廷以安危寄我賊安知吾眾寡若出不意當自潰遂疾驅入徐州時朝義圍李岑於宋州使田神功擊走之初神功平劉展逼留淮南尙衡殷仲卿相攻竟鄆間來瑱擅襄陽及光弼至屯朝義走神功還河南瑒衡仲卿踵入朝其爲諸將憚服類此寶應元年進封臨淮郡王光弼收許州斬賊羸千級縛僞將二十二人朝義分兵攻宋州光弼破走之浙東賊袁晁反台州建元寶勝以建丑爲正月殘剽州縣光弼遣麾下破其眾於衢州

廣德元年遂禽晁浙東平詔增實封戶二千與一子三品階賜鐵券名藏太廟圖形凌煙閣相州北邙之敗朝恩羞其策繆故深忌光弼切骨而程元振尤疾之二人用事日謀有以中傷者及來瑒爲元振讒死光弼愈恐吐蕃寇京師代宗詔入援光弼畏禍遷延不敢行及帝幸陝猶倚以爲重數存問其母以解嫌疑帝還長安因拜東都留守察其去就光弼以久須詔書不至歸徐州收租賦爲解帝令郭子儀自河中輩其母還京二年光弼疾篤奉表上前後所賜實封詔不許將吏問後事答曰吾淹軍中不得就養爲不孝子尙何言哉取所餘絹布分遺部將薨年五十七部將卽以其布遂爲光弼行喪號哭相聞帝遣使弔卹其母贈太保諡曰武穆詔百官送葬延平門外光弼用兵謀定而後戰能以少覆衆治師訓整天下服其威名軍中指顧諸將不敢仰視初與郭子儀齊名世稱李郭而戰功推爲中興第一其代子儀朔方也營壘士卒磨礮無所更而光弼一號令之氣色乃益精明云子彙有志操廉介自將從賈耽爲裨將奏兼御史大夫元和初分徐州符離爲宿州光弼有遺愛擢彙爲刺史後遷涇原節度使罷軍中雜徭出奉錢贖將士質賣子還其家卒贈工部尙書光弼弟光進字太應初爲房瑄裨將將北軍戰陳濤斜兵敗奔行在肅宗宥之代宗卽位拜檢校太子太保封涼國公吐蕃入寇至便橋郭子儀爲副元帥光進及郭英乂佐之自至德後與李輔國並掌禁兵委以心膂光弼被譖出爲渭北邠寧節度使承泰初封武威郡王累

遷太子太保卒母李有鬚數十長五寸許封韓國太夫人二子節制皆一品死葬長安南原將相奠祭凡四十四幃時以爲榮光弼所部將李懷光僕固懷恩田神功李抱玉董秦哥舒曜韓游瓌渾釋之辛京杲自有傳若荔非元禮郝廷玉李國臣白孝德張伯儀白元光陳利貞侯仲莊柏良器皆章章可稱列者附次左方

荔非元禮起裨將累兼御史中丞光弼守河陽周摯攻北城光弼方壁中渾摯聞併兵從光弼光弼使元禮守羊馬城植小旗城東北隅望摯軍摯恃衆直逼城以車千乘載木鵝橦車磨兵填塹八道並進光弼諭元禮曰中丞視賊過兵不顧何也報曰公欲守邪戰歟光弼曰戰曰方戰賊爲我實壘復何怪光弼曰吾慮不及此公勉之元禮遂出戰摯軍小卻元禮以敵堅未可以馳還軍示弱怠其意光弼怒使召元禮欲按軍法答曰方戰不及往請破賊以見因休柵中良久顧麾下曰向公來召殆欲斬我鬪死有名無庸受戮乃下馬持刀瞋目直前銳士堵而進左右奮擊一當數人斬賊數百首摯遁去以功累遷驃騎大將軍懷州刺史知鎮西北庭行營節度使上元二年光弼進收洛陽軍敗元禮徙軍翼成爲麾下所害郝廷玉驍勇善格鬪爲光弼愛將及保河陽禽徐瓌玉功爲多累封安邊郡王授神策將軍吐蕃犯京畿與馬磷屯中涓橋它日魚朝恩聞其善布陣請觀之廷玉申號令鳴鼓角部伍坐作進退若一朝恩歎曰

一二號第一百二十一

吾處兵間久今始識訓練法廷玉惻然曰此臨淮王遺法也王善御軍賞當功罰適過每校旗不如令者輒斬由是人皆自効而赴蹈馳突心破膽裂自臨淮歿無復校旗事此安足賞哉累爲秦州刺史卒贈工部尚書

李國臣河西人李姓安力能抉關以折衝從收魚海五城遷中郎將後爲朔方將積勞擢雲磨大將軍賜姓李從光弼守河陽累封臨川郡王大厯八年爲鹽州刺史吐蕃敗渾瑊於黃蕃原將略泝隴國臣謂人曰虜乘勝必擾京師我趨秦原彼當反顧乃引兵登安樂山鳴鼓而西日行三十里吐蕃聞之自百里城回軍踰險城因擊敗之卒贈揚州大都督

白孝德安西人事光弼爲偏裨史思明攻河陽使驍將劉龍仙以騎五十挑戰加右足馬蹶上嫚罵光弼光弼登城顧諸將曰孰能取是賊僕固懷恩請行光弼曰是非大將所宜左右以孝德對召問所須幾兵對曰願出五十騎見可而進大軍鼓譟以張吾氣足矣光弼撫其背遣之孝德擁二矛策馬絕河半濟懷恩賀曰事克矣其攬轡便辟可萬全者龍仙見易之不爲動將至若引避然孝德振手止之曰侍中使致辭無它與語久之曠目曰賊識我乎我白孝德也龍仙罵之乃躍馬前搏城上因大譟五十騎繼進龍仙環隄走追斬其首以還後累功至北庭行營節度使徙邪靈僕固懷恩引吐蕃兵入寇孝德擊敗之承泰

初吐蕃回紇圍涇陽郭子儀說回紇約盟吐蕃退走子儀使渾瑊以兵五千出奉天命孝德應之大戰赤沙峯斬獲甚衆累封昌化郡王歷太子少傅建中元年卒贈太保

張伯儀魏州人以戰功隸光弼軍浙賊袁晁反使伯儀討平之功第一擢睦州刺史後爲江陵節度使樸厚不知書然推誠過人軍中畏肅民亦便之李希烈反詔與賈耽張獻甫收安州戰不利伯儀中流矢師却失所持節賊追及奮力以禦之兩刃相嚮不得下會救至免至漢水擊野人船以達沔州潰兵至江陵哭於廷伯儀妻勞勉出其家帛給之乃定伯儀收散卒還久之除右龍武統軍卒贈揚州大都督既請諡博士李吉甫議以中興三十年而兵未戢者將帥養寇藩身也若以亡敗爲戒則總干戈者必圖萬全而不決戰若伯儀雖敗而其忠可錄遂諡曰恭

白元光字元光其先突厥人父道生歷靈朔州刺史元光初隸本軍補節度先鋒安祿山反詔徙朔方兵東討元光領所部結義營長驅從光弼出土門累遷太子詹事封南陽郡王爲兩都遊弈使長安平率兵清宮進擊餘寇身被數創肅宗躬爲傅藥轉衛尉卿兼朔方先鋒史思明攻河陽光弼召主騎軍其後歷靈武留後定遠城使貞元二年卒贈越州都督

陳利貞幽州范陽人初爲平盧將安祿山亂從光弼軍河南張巡被圍睢陽也光弼遣郝廷玉及利貞救

之輕騎出入廷玉稱爲勝己以子妻之及歸薦于光弼自行間累遷檢校太子賓客封靜戎郡王李希烈叛詔哥舒曜東討利貞爲前鋒次刺城賊衆大集利貞出奇兵五百橫擣其右賊鋒詘數月不敢前及希烈攻曜襄城利貞登陴捍守七十日未嘗櫛沐非議事不下城朱泚反利貞及張廷芝所統士皆幽薊河隴人故與廷芝合謀應泚而利貞麾下亦從爲亂夜半難作利貞拔劍當軍門大譁曰欲過門者先殺我衆畏其鋒乃止廷芝出奔德宗嘉之擢汝州防禦使貞元五年疽發首卒遺觀察使崔縱書自陳受國恩恨不得死所云

侯仲莊字仲莊蔚州人爲光弼先鋒授忠武將軍禽安太清有功累加冠軍將軍僕固懷恩以朔方反仲莊爲都將訓兵自守號爲平射人畏其鋒懷恩敗郭子儀代之引爲腹心封上谷郡王爲神策京西將德宗幸奉天遷左衛將軍爲防城使修壘堞晝夜執戈徼巡從幸興元殿軍略谷授防禦招收使帝還都復幸奉天幾二十年卒贈洪州都督

柏賈器字公亮魏州人父造以獲嘉令死安祿山難乃學擊劍欲報賊父友王奐爲光弼從事見之曰爾額文似臨淮王面黑子似顏平原始能立功乃薦之光弼授兵平山越遷左武衛中郎將以部民隸浙西豫平袁晁方清其後潘瓘虎胡參分據小傷蒸里又擊破之是時年二十四更戰陣六十二李希烈圍靈

陵遇水灌之親令軍中明日拔城良器以救兵至擇弩手善游者沿汴渠夜久及旦伏弩發賊乘城者皆死錄功封平原郡王入爲左神策軍大將軍知軍事圖形凌煙閣募材勇以代士卒市販者中尉竇文場惡之坐友人闖入換右領軍衛自是軍政皆中官專之終左領軍衛大將軍贈陝州大都督子耆別傳烏承玼字德潤張掖人開元中與族兄承恩皆爲平盧先鋒沈勇而決號轅門二龍契丹可突于殺其王邵因降突厥而奚亦亂其王魯蘇挈族屬及邵固妻子自歸是歲奚契丹入寇詔承玼擊之破於捺祿山二十二年詔信安王禕率幽州長史趙含章進討承玼請含章曰二虜固劇賊前日戰而北非畏我乃誘我也公宜奮銳以折其謀含章不信戰白城果大敗承玼獨按隊出其右斬首萬計可突于奔北奚渤海大武藝與弟門藝戰國中門藝來詔與太僕卿金思蘭發范陽新羅兵十萬討之無功武藝遣客刺門藝於東都引兵至馬都山屠城邑承玼室要路壅以大石亘四百里虜不得入於是流民得還士少休脫鎧而耕歲省度支運錢安慶緒使史思明守范陽思明恃兵彊爲自固計慶緒密遣阿史那承慶安守忠就督事且圖之承玼勸思明曰唐家中興與天下更始慶緒偷肆暑刻公殆與俱亡有如東身本朝湔洗前汗此反掌功耳思明善之斬承慶等奉表聽命始承恩爲冀州刺史失守思明護逆東都故肅宗使自雲中趨幽州聞說思明與承玼謀投斃殺之不克死承玼奔李光弼表爲冠軍將軍封昌化郡王爲石嶺軍

使王恩禮爲節度使軍政倚辦焉久之移疾還京師卒年九十六子重胤別傳

贊曰李光弼生戎虜之緒沈鷲有守遭祿山變拔任兵柄其策敵制勝不世出賞信罰明士卒爭奮毅然有古良將風本夫終父喪不入妻室位王公事繼母至孝好讀班固漢書異夫庸人武夫者及困於口舌不能以忠自明奄侍內構遂陷嫌隙謀就全安而身益危所謂工於料人而拙於謀己邪方攘袂徇國天下風靡一爲遷延而田神功等皆不受約束卒以憂死功臣去就可不慎邪嗚呼光弼雖有不釋位之誅然讒人爲害亦可畏矣將時之不幸歟

唐書卷一百三十六

唐書卷一百三十六考證

李光弼傳封薊郡公○舊書作薊國公

生執五千人○舊書作生擒五百人

請鐵騎三百與之二百○舊書作與之百

禽太清楊希仲送之京師○舊書作楊希文

光弼入朝懇讓太尉更拜開府儀同三司中書令○舊書作遂加開府儀同三司侍中

唐書卷一百三十六考證

唐書卷一百三十七

宋 端 明 殿 學 士 宋 祁 撰

列傳第六十二

郭子儀

郭子儀字子儀華州鄭人長七尺二寸以武舉異等補左衛長史累遷單于副都護振遠軍使天寶八載木刺山始築橫塞軍及安北都護府詔卽軍爲使俄苦地偏不可耕徙築永清號天德軍又以使兼九原太守十四載安祿山反詔子儀爲衛尉卿靈武郡太守充朔方節度使率本軍東討子儀收靜邊軍斬賊將周萬頃擊高秀巖河曲敗之遂收雲中馬邑開東陘加御史大夫賊陷常山河北郡縣皆沒會李光弼攻賊常山拔之子儀引軍下井陘與光弼合破賊史思明衆數萬平藁城南攻趙郡禽賊四千縱之斬僞守郭獻璆還常山思明以衆數萬尾軍及行唐子儀選騎五百更出挑之三日賊引去乘之又破於沙河遂趨常陽以守祿山益出精兵佐思明子儀曰彼恃加兵必易我易我心不固戰則克矣與戰未決戮一部將以狗士殊死鬪遂破之斬首二千級俘五百人獲馬如之於是晝揚兵夜擣壘賊不得息氣益老乃與光弼僕固懷恩渾釋之陳回光等擊賊嘉山斬首四萬級獲人馬萬計思明跳奔博陵於是河北諸郡

往往斬賊守迎王師方北圖范陽會哥舒翰敗天子入蜀太子卽位靈武詔班師子儀與光弼率步騎五萬赴行在時朝廷草昧衆軍寡容闕然及是國威大振拜子儀兵部尙書同中書門下平章事仍總節度肅宗大閱六軍鼓而南至彭原宰相房琯自請討賊次陳濤師敗衆略盡故帝唯倚朔方軍爲根本賊將阿史那從禮以同羅僕骨騎五千誘河曲九府六胡部落數萬迫行在子儀以回紇首領萬邏支擊之執獲數萬牛羊不可勝計河曲平至德二載攻賊崔乾祐於潼關乾祐敗退保蒲津會永樂尉趙復河東司戶參軍韓旻司士徐景及宗室子鋒在城中謀爲內應子儀攻蒲復等斬陴者披闔內軍乾祐走安邑安邑僞納之兵半入縣門發乾祐得脫身走賊安守忠壁永豐倉子儀遣子旰與戰多殺至萬級旰死于陳進收倉於是關陝始通詔還鳳翔進司空充關內河東副元帥率師趨長安次潯水上賊守忠等軍潰渠左大戰王師不利委仗奔子儀收潰卒保武功待罪于朝乃授尙書左僕射俄從元帥廣平王率蕃漢兵十五萬收長安李嗣業爲前軍元帥爲中軍子儀副之王思禮爲後軍陣香積寺之北距灃水臨大川彌亙一舍賊李歸仁領勁騎薄戰官軍奮嗣業以長刀突出斬賊數千騎乃定回紇以奇兵緣賊背夾攻之斬首六萬級生禽二萬賊帥張通儒夜亡陝郡翼日王入京師老幼夾道呼曰不圖今日復見官軍王休士三日遂東安慶緒聞王師至遣嚴莊悉衆十萬屯陝助通儒旌幟鉦鼓徑百餘里師至新店賊已

陣出輕騎子儀遣二隊逐之又至倍以往皆不及賊營輒反最後賊以二百騎掩軍未戰走子儀悉軍追橫貫其營賊張兩翼包之官軍却嗣業率回紇從後擊塵且至飛矢射賊賊驚曰回紇至矣遂大敗偃尸相屬于道嚴莊等走洛陽挾慶緒度河保相州遂收東都於是河東河西南州縣悉平以功加司徒封代國公食邑千戶入朝帝遣具軍容迎灞上勞之曰國家再造卿力也子儀頓首陳謝有詔還東都經略北討乾元元年破賊河上執安守忠以獻遂朝京師詔百官迎於長樂驛帝御望春樓待之進中書令帝卽詔大舉九節度師討慶緒以子儀光弼皆元功難相臨攝第用魚朝恩爲觀軍容宣慰使而不立帥子儀自杏園濟河圍衛州慶緒分其衆爲三軍將戰子儀選善射三千士伏壁內誡曰須吾却賊必乘壘若等譟而射旣戰僞遁賊薄營伏發注射如雨賊震駭王師整而奮斬首四萬級獲鎧冑數十萬執安慶和收衛州又戰愁思岡破之連營進圍相州引漳水灌城漫二時不能破城中糧盡人相食慶緒求救於史思明思明自魏來李光弼王思禮許叔冀曾見前軍遇之戰鄴南夷相當見中流矢子儀督後軍未及戰會大風拔木遂晦跬步不能相物色於是王師南潰賊亦走輜械滿野諸節度引還子儀以朔方軍保河陽斷航橋時王師衆而無統進退相顧望責功不專是以及于敗有詔留守東都俄改東畿山南東道河南諸道行營元帥魚朝恩素疾其功因是媒譖之故帝召子儀還更以趙王爲天下兵馬元帥李光弼

副之代子儀領朔方兵子儀雖失軍無少望乃心朝廷思明再陷河洛西戎逼擾京輔天子旰食乃授邠
寧鄜坊兩節度使仍留京師議者謂子儀有社稷功而孽寇首鼠乃置散地非所宜帝亦悟上元初詔爲
諸道兵馬都統以管崇嗣副之率英武威遠兵及河西河東鎮兵繇邠寧朔方大同橫野軍以趨范陽詔
下爲朝恩沮解明年光弼敗邠山失河陽又明年河中亂殺李國貞太原戕鄧景山朝廷憂二軍與賊合
而少年新將望輕不可用遂以子儀爲朔方河中北廷潞儀澤沁等州節度行營兼興平定國副元帥進
封汾陽郡王屯絳州時帝已不豫羣臣莫有見者子儀請曰老臣受命將死于外不見陛下目不瞑帝引
至臥內謂曰河東事一以委卿子儀嗚咽流涕賜御馬銀器雜綵別賜絹布九萬子儀至屯誅首惡王元
振等數十人太原辛雲京亦治害景山者諸鎮皆惕息代宗立程元振自謂於帝有功忌宿將難制離構
百計因罷子儀副元帥加實戶七百爲肅宗山陵使子儀懼讒且成盡哀肅宗所賜詔敕千餘篇上之因
自明詔曰朕不德諱大臣憂朕甚自愧自今公毋有疑初帝與子儀平兩京同天下憂患至是悔悟眷禮
彌重時史朝義尙盜洛帝欲使副雍王率師東討爲朝恩元振交訾之乃止會梁崇義據襄州叛僕固懷
恩屯汾州陰召回紇吐蕃寇河西殘涇州犯奉天武功遽拜子儀爲關內副元帥鎮咸陽初子儀自相州
罷歸京師部曲離散承詔磨下才數十騎驅民馬補行隊至咸陽虜已過渭水並南山而東天子跳幸

陝子儀聞流涕董行營還京師遇射生將王獻忠以敬騎叛劫諸王欲奔虜子儀讓之取諸王送行在乃
率騎南收兵得武關防卒及亡士數千軍浸完會六軍將張知節迎子儀洛南大閱兵屯商州威震關中
乃遣知節率烏崇福羽林將長孫全緒爲前鋒營韓公堆擊鼓譟山張旗幟夜叢高炬以疑賊初光祿卿
殷仲卿募兵藍田以勁騎先官軍爲游弈直度潼民給虜曰郭令公來虜懼會故將軍王甫結俠少夜鼓
朱雀街呼曰王師至吐蕃夜潰於是遣大將李忠義屯苑中渭北節度使王仲昇守朝堂子儀以中軍繼
之射生將王撫自署京兆尹亂京城子儀斬以狗破賊書聞帝以子儀爲京城留守自變生倉卒賴子儀
復安故天下皆咎程元振羣臣數論奏元振懼乃說帝都洛陽帝可其計子儀奏曰雍州古稱天府右隴
蜀左嶠函襟馮終南太華之險背負清渭濁河之固地方數千里帶甲十餘萬兵彊士勇真用武之國秦
漢所以成帝業也後或處而泰去而亡者不一姓故高祖先入關定天下太宗以來居洛陽者亦鮮先帝
興朔方誅慶緒陛下席西土戮朝義雖天道助順亦地勢則然比吐蕃馮陵而不能抗者臣能言其略夫
大軍皆市井人竄虛名逃實賦一日驅以就戰有百奔無一前又宜豎掩迷庶政荒奪遂令陛下彷徨暴
露越在陝服斯委任失人豈秦地非良哉今道路流言不識信否咸謂且都洛陽洛陽自大盜以來焚埃
略盡百曹榛蕪實服不滿千戶井邑如墟豺狼羣嘯東薄鄭汴南界徐北綿懷衛及相千里蕭條亭會不

煙何以奉萬乘牲餼供百官次舍哉且地狹隄裁數百里險不足防適爲闕場陛下意者不以京畿新罹
剽蹂國用不足乎昔衛爲狄滅文公廬于漕衣大布之衣冠大帛之冠卒復舊邦況赫赫天子躬儉節用
寧爲一諸侯下哉臣願陛下斥素餐去冗食抑闕寺任直臣薄征弛役卹隱撫綏委宰相以簡賢任能付
臣以訓兵禦侮則中興之功日月可冀惟時邁亟還見宗廟謁園陵再造王家以幸天下帝得奏泣謂左
右曰子儀固社稷臣也朕西決矣乘輿還子儀頓首謝罪帝勞曰用卿晚故至此乃賜鐵券圖形凌煙閣
僕固懷恩縱兵掠并汾屬縣帝患之以子儀兼河東副元帥河中節度使鎮河中懷恩子瑒屯榆次爲帳
下張惟岳所殺傳首京師持其衆歸子儀懷恩懼委其母走靈州廣德二年進太尉兼領北道邠靈涇原
河西通和吐蕃及朔方招撫觀察使辭太尉不拜懷恩誘吐蕃回紇黨項數十萬入寇朝廷大恐詔子儀
屯奉天帝問計所出對曰無能爲也懷恩本臣偏將雖慄果然素失士心今能爲亂者誅思歸之人劫與
俱來且皆臣故部曲素以恩信結之彼忍以刃相向乎帝曰善虜寇邠州先驅至奉天諸將請擊之子儀
曰客深入利速戰彼下素德我吾緩之當自攜貳因下令敢言戰者斬堅壁待之賊果遁子儀至自涇陽
恩資崇辨進拜尚書令懇辭不聽詔趣詣省視事百官往慶敕射生五百騎執戟衛子儀確讓且言太
宗嘗踐此官故累聖曠不置員皇太子爲雍王定關東乃得授渠可猥私老臣曠大典且用兵已來僭賞

者多至身兼數官冒進亡耻今凶醜略平乃作法審官之時宜從老臣始帝不獲已許之具所以讓付史
官因賜美人六人從者自副車服帷帘咸具永泰元年詔都統河南道節度行營復鎮河中懷恩盡說吐
蕃回紇黨項羌渾奴刺等三十萬掠涇邠鳳翔入醴泉奉天京師大震於是帝命李忠臣屯渭橋李光
進屯雲陽馬璘郝廷玉屯便橋駱奉先李日越屯盤屋李抱玉屯鳳翔周智光屯同州杜冕屯坊州天子
自將屯苑中急召子儀屯涇陽軍纔萬人比到虜騎圍已合乃使李國臣高昇魏楚玉陳回光朱元琮各
當一面身自率鎧騎二千出入陣中回紇怪問是謂誰報曰郭令公驚曰令公存乎懷恩言天可汗棄天
下令公卽世中國無主故我從以來公今存天可汗存乎報曰天子萬壽回紇悟曰彼欺我乎子儀使諭
虜曰昔回紇涉萬里戡大慙助復二京我與若等休戚同之今乃棄舊好助叛臣一何愚彼背主棄親於
回紇何有回紇曰本謂公云亡不然何以至此今誠存我得見乎子儀將出左右諫戎狄野心不可信子
儀曰虜衆數十倍今力不敵吾將示以至誠左右請以騎五百從又不聽卽傳呼曰令公來虜皆持滿待
子儀以數十騎出免胄見其大會曰諸君同艱難久矣何忽亡忠誼而至是邪回紇捨兵下馬拜曰果吾
父也子儀卽召與飲遺錦綵結歡誓好如初因曰吐蕃本吾舅甥國無負而來棄親也馬牛被數百里公
等若倒戈乘之若僞取一芥是謂天賜不可失且逐戎得利與我繼好不兩善乎會懷恩暴死羣虜無所

統一遂許諾吐蕃疑之夜引去子儀遣將白元光回紇眾追躡大軍繼之破吐蕃十萬於靈臺西原斬級五萬俘萬人盡得所掠士女牛羊馬橐駝不勝計遂自涇陽來朝加實封二百戶還河中大厯元年華州節度使周智光謀叛帝問道以蠟書賜子儀令悉軍討之同華將吏聞軍起殺智光傳首闕下二年吐蕃寇涇州詔遣屯涇陽邀戰於靈州敗之斬首二萬級明年還河中吐蕃復寇靈武詔率師五萬屯奉天白元光破虜於靈武議者以吐蕃數為盜馬璘孤軍在邠不能支乃以子儀兼邠靈慶節度使屯邠州徙璘為涇原節度使回紇赤心請市馬萬匹有司以財乏止市千匹子儀曰回紇有大功宜答其意中原須馬臣請內一歲奉佐馬直詔不聽人許其忠九年入朝對延英帝與語吐蕃方疆慷慨至流涕退上書曰朔方國北門西禦犬戎北虞獫狁五城相去三千里開元天寶中戰士十萬馬三萬匹僅支一隅自先帝受命靈武戰士從陛下征討無靈歲頃以懷恩亂傷彫耗亡三分之二比天寶中止十之一今吐蕃兼吞河隴雜羌渾之眾歲深入畿郊勢踰十倍與之角勝豈易得邪屬者虜來稱四節度將別萬人人兼數馬臣所統士不當賊四之一馬不當賊百之二外畏內懼將何以安臣惟陛下制勝力非不足但簡練不至進退未一時淹師老地廣勢分願於諸道料精卒滿五萬者列屯北邊則制勝可必竊惟河南河北江淮大鎮數萬小者數千殫屈稟給未始蒐擇臣請追赴關中勒步隊示金鼓則攻必破守必全長久之策

也又自陳衰老乞骸骨詔曰朕終始倚賴未可以去位不許德宗嗣位詔還朝攝冢宰充山陵使賜號尚父進位太尉中書令增實封通前二千戶給糧千五百人芻馬二百疋盡罷所領使及帥建中二年疾病帝遣舒王到第傳詔省問子儀不能興叩頭謝恩薨年八十五帝悼痛廢朝五日詔羣臣往弔隨喪所須皆取于官贈太師陪葬建陵及葬帝御安福門哭過其喪百官陪位流涕賜諡曰忠武配饗代宗廟廷著令一品墳崇丈八尺詔特增丈以表元功子儀事上誠御下恕賞罰必信遭幸臣程元振魚朝恩短毀方時多虞握兵處外然詔至即日就道無纖介顧望故讒間不行破吐蕃靈州而朝恩使人發其父墓盜未得子儀自涇陽來朝中外懼有變及入見帝唱之即號泣曰臣久主兵不能禁士殘人之墓人今發先臣墓此天譴非人患也朝恩又嘗約子儀脩具元載使人告以軍容將不利公其下衷甲願從子儀不聽但以家僮十數往朝恩曰何車騎之寡告以所聞朝恩泣曰非公長者得無致疑乎田承嗣傲狠不軌子儀嘗遣使至魏承嗣西望拜指其膝謂使者曰茲膝不屈於人久矣今為公拜李靈耀據汴州公私財賦一皆遏絕子儀封幣道其境莫敢留令持兵衛送麾下宿將數十皆王侯貴重子儀頓指進退若部曲然幕府六十餘人後皆為將相顯官其取士得才類如此與李光弼齊名而寬厚得人過之子儀歲入官俸無慮二十四萬繕宅居親仁里四分之一中通承巷家人三千相出入不知其居前後賜良田美器名園甲

館不勝紀代宗不名呼爲大臣以身爲天下安危者二十年校中書令考二十四八子七婿皆貴顯朝廷諸孫數十不能盡識至問安但領之而已富貴壽考哀榮終始人臣之道無闕焉子暉暉暉肝暖暉暉而四子以才顯

暉性沈靜資貌瑰傑累從節度府辟署破虜有功爲開陽府果毅都尉至德初推子儀功授衛尉卿累進太子詹事太原郡公子儀專征伐暉留治家事少長無間言諸弟或飾池館盛車服暉獨以朴簡自處子儀罷兵遷太子少保昆弟六人共制拜官子儀薨以遺命簿上四朝所賜名馬珍物德宗復賜之乃悉散諸弟居喪以禮疾甚或勸茹葱薤終不屬口後盧杞秉政忌勳族子儀壻太僕卿趙縱少府少監李洞清光祿卿王宰皆以次得罪姦人幸其危多論奪田宅奴婢暉大恐獨宰相張鎰力保護德宗稍聞之詔有司曰尙父子儀有大勳力保父王家嘗誓山河琢金石許有十世前日其家市田宅奴婢而無賴者以尙父歿妄論奪之自今有司毋得受建中三年卒贈太子太傅諡曰孝初暉襲代國公食二千戶貞元初詔減半以封暉暉映暉人二百五十戶未幾復詔四人各減五十戶封暉子鋒暉子鐸各百戶云暉善騎射從征伐有功復兩京戰最力出奇兵破賊累進鴻臚卿河中軍亂子儀召首惡誅之其支黨猶反仄暉選親兵晝夜警以備非常姦人不得發以功拜殿中監吐蕃回紇入寇加御史中丞領朔方軍糧

邠州與馬璘合軍擊虜破之虜復來陣涇水北子儀遣暉率徒兵五千騎五百襲虜暉以兵寡不進須暮賊半濟乃擊斬首五千級加御史大夫子儀固讓乃止居父喪值朱泚亂南走山谷賊昇致之欲汙以官伴瘡不答賊露兵脅之不動數以城中事貽書李晟旣而奔奉天天子還改太子賓客子綱從朔方杜希全幕府希全檄爲豐州刺史暉憐其弱不任事丐罷德宗遣使者召綱綱疑得罪挺身走吐蕃不納希全執送京師賜死暉坐免尋復太子賓客累封趙國公卒贈兵部尙書孫承嘏

承嘏字復卿幼秀異通五經元和及進士第累遷起居舍人居母喪以孝聞太和六年爲諫議大夫言政事得失文宗以鄭注爲太僕卿承嘏極論其非注頗懼進給事中俄出爲華州刺史給事中盧載還詔書且言承嘏數封駁稱職宜在禁闈帝曰朕謂久次欲優其稍入耳乃復留給事中時江淮旱用度不支詔宰相分領度支戶部承嘏言宰相調和陰陽安黎庶若使閱視簿書校繆帛非所宜帝順納遷刑部侍郎帝嘗稱其儒素無貴驕氣不類勳家每進對恩接備厚方大任用會卒家無餘貲親友爲辦喪祭贈吏部尙書

暖字暖以太常主簿尙昇平公主暖年與公主伴十餘歲許昏拜駙馬都尉試殿中監封清源縣侯寵冠戚里大麻末檢校左散騎常侍建中時主坐事留禁中朱泚亂逼署暖官辭以居喪被疾旣而與公主奔

奉天德宗嘉之釋主罪進暖金紫光祿大夫賜實封五千戶尋遷太常卿貞元三年襲代國公卒年四十八贈尚書左僕射初暖女爲廣陵郡王妃王卽位是爲憲宗妃生穆宗穆宗立母妃爲皇太后贈暖太傅四子鑄釧銛銛鑄襲封

釧長七尺方口豐下代宗朝以外孫爲奉禮郎累官至左金吾大將軍改檢校工部尚書爲邠寧節度使入爲司農卿憲宗寢疾宦豎或妄議廢立者穆宗問計於釧答曰殿下爲太子當旦夕視膳何外慮乎時稱得元舅體穆宗卽位檢校戶部尚書兼司農卿俄爲河陽三城節度使徙河中尹領進絳慈隰節度敬宗立召拜兵部尚書又帥劍南東川大和中南蠻寇蜀取成都外郫杜元穎不能禦詔釧兼領西川節度未行蠻衆已略梓州州兵寡不可用釧貽書譙蠻首筭巖以侵叛意筭巖曰元穎不自守數侵吾圍我以是報乃與釧脩好約無相犯天子嘉之卽拜西川節度使以疾請代爲太常卿卒贈司徒子仲文仲泰仲詞開成二年詔仲文襲太原郡公給事中盧弘宣奏釧妻沈公主女代宗皇帝外孫其子仲詞尚饒陽公主仲文冒嫡不應襲使仲文承嫡則沈當黜且仲詞亦不得尙主乃詔仲詞檢校殿中少監駙馬都尉襲封而仲文以太皇太后故置不問仲恭歷詹事府丞亦尙金堂公主

鑄字利用尙德陽郡主詔襲延齡爲主營第長興里順宗立主進封漢陽公主擢釧檢校國子祭酒駙馬

都尉自景龍後外戚多爲檢校官不治事宰相薦其才不當以外戚廢乃拜右金吾將軍封太原郡公恭遜折節不以富貴加人性周畏不立赫赫名有諫於上退必毀稿家人子弟無知者別墅在都南尤勝塏穆宗嘗幸之置酒極歡改太子詹事充閑廡宮苑使卒贈尙書左僕射

銛性和易累爲殿中監尙西河公主縱卒代爲太子詹事宮苑閑廡使長慶三年暴卒太后遣使按問發疾狀久乃解初西河主降沈氏生一子銛無嗣以沈氏子嗣

曙代宗朝累官司農卿德宗幸奉天曙方領家兵獵苑北聞蹕至伏謁道左遂從乘輿入駱谷霖雨塗潦衛兵或異請帝召謂曰朕不德而苦公等宜執朕送朱泚以謝天下諸將皆感泣曰願死生從陛下時曙與功臣子李昇韋清令狐建李彥輔被甲請見言曰南行路險且虞姦變臣等世蒙恩今相誓願更挾帝馬許之帝還曙清擢金吾大將軍餘並爲禁軍將軍曙終祔國公子儀母弟幼明性謹愿無過拙于武喜賓客以子儀故終少府監贈太子太傅子昕肅宗末爲四鎮留後關隴陷不得歸朝廷但命官遙領其使建中二年昕始與伊西北廷節度使曹令忠遣使入朝德宗詔曰四鎮二廷統西夏五十七蕃十姓部落國朝以來相與率職自關隴失守王命阻絕忠義之徒泣血固守奉遵朝法此皆侯伯守將交修共治之効朕甚嘉之令忠可北廷大都護四鎮節度留後賜氏李更名元忠昕可安西大都護四鎮節度使諸將

吏超七資敘官云

贊曰天寶末盜發幽陵外阻內訌子儀自朔方提孤軍轉戰逐北誼不還顧當是時天子西走唐祚若贅旒而能輔太子再造王室及大難略平遭讒慧詭奪兵柄然朝聞命夕引道無纖介自嫌及被圍涇陽單騎見虜壓以至誠猜忍沮謀雖唐命方永亦由忠貫日月神明扶持者哉及光弼等畏僞不終而子儀完名高節爛然獨著福祿永終雖齊桓晉文比之爲福唐史臣裴垪稱權傾天下而朝不忌功蓋一世而上不疑侈窮人欲而議者不之貶嗚呼垪誠知言其子孫多以功名顯蓋盛德後云

唐書卷一百三十七

唐書卷一百三十七考證

郭子儀孫縱縱檢校國子祭酒駙馬都尉○舊書累官至衛尉卿駙馬都尉改殿中監

唐書卷一百三十七考證

唐書卷一百三十八

宋 端 明 殿 學 士 宋 祁 撰

列傳第六十三

二李馬路

李嗣業字嗣業京兆高陵人長七尺膂力絕眾開元中從安西都護來曜討十姓蘇祿先登捕虜累功署昭武校尉後應募安西軍中初用陌刀而嗣業尤善每戰必為先鋒所嚮摧北馬靈智為節度出戰必與俱高仙芝討勃律署嗣業及中郎將田珍為左右陌刀將時吐蕃兵十萬屯娑勒城據山瀕水聯木作郭以扼王師仙芝潛軍夜濟信圖河令曰及午破賊不者皆死嗣業提步士升山頽石四面以擊賊又樹大旗先走險諸將從之虜不虞軍至因大潰投崖谷死者十八鼓而驅至勃律禽其主平之授右威衛將軍從平石國及突騎施以跳盪先鋒加特進虜號為神通大將初仙芝特以計襲取石其子出犇因構諸胡共怨之以告大食連兵攻四鎮仙芝率兵二萬深入為大食所敗殘卒數千事急嗣業謀曰將軍深履賊境後援既絕而大食乘勝諸胡銳于鬪我與將軍俱前死尚誰報朝廷者不如守白石嶺以為後計仙芝曰吾方收合餘燼明日復戰嗣業曰事去矣不可坐須殪醢即馳守白石路既隘步騎魚貫而前會拔汗

那還兵輜餉塞道不可騎嗣業懼追及手挺鑿擊人馬斃仆者數十百虜駭走仙芝乃得還表嗣業功進右金吾大將軍留爲疏勒鎮使城一隅陲屢築輒壞嗣業祝之有白龍見因其處龜祠以祭城遂不壞漢耿恭故井久涸禱已泉復出初討勃律也通道葱嶺有大石塞隘以足蹶之抵穹壑識者以爲至誠所感云天寶十二載加驃騎大將軍入朝賜酒帝前醉起舞帝寵之賜綵百金皿五十物錢十萬曰爲解醒具安祿山反肅宗追之詔至卽引道與諸將割臂盟曰所過郡縣秋毫無可犯至鳳翔上謁帝喜曰今日卿至賢於數萬衆事之濟否固在卿輩乃詔與郭子儀僕固懷恩犄角常爲先鋒以巨棓管關賊值類崩潰進四鎮伊西北庭行軍兵馬使廣平王收長安嗣業統前軍陣于香積祠北賊會李歸仁擁精騎薄戰王師注矢逐之走未及營賊大出掩追騎還蹂王師於是亂不能陣嗣業謂子儀曰今日不蹈萬死取一生則軍無類矣卽袒持長刀大呼出陣前殺數十人陣復整步卒三千以陌刀長柯斧堵進所向無前歸仁匿兵營左覘軍勢玉分回紇銳兵擊其伏嗣業出賊背合攻之自日中至昃斬首六萬級填澗壑死幾半賊東走遂平長安進收東都嗣業戰多乃與張鎰魯晃來瑱嗣吳王祇李奐略定諸州兼衛尉卿封虢國公實封戶二百兼懷州刺史北庭行營節度使與子儀等圍相州師耆諸將無功獨嗣業被堅數奮爲諸軍冠中流矢臥帳中方愈忽聞金鼓聲知與賊戰大呼創潰血流數升卒諡曰忠勇贈武威郡王給靈輿

護還在所葬日使中人臨弔中朝臣祖泣縶給掃除十戶嗣業忠毅愛國不計居產有宛馬十疋前後賞賜皆上于官以助軍云子佐國襲爵歷丹王府長史卒推嗣業功贈宋州刺史

馬璘岐州扶風人少孤流蕩無業所年二十讀漢馬援傳至丈夫當死邊野以馬革裹尸而歸慨然曰使吾祖勳業墜于地乎開元末挾策從安西節度府以奇勞累遷金吾衛將軍至德初王室多難統精甲三千自二庭赴鳳翔肅宗奇之委以東討初戰衛南以百騎破賊五千衆從李光弼攻洛陽史朝義衆十萬陣北邙山旗鎧照日諸將尤疑未敢擊璘率部士五百薄賊屯出入三反衆披靡乘之賊遂潰光弼曰吾用兵三十年未見以少擊衆雄捷如馬將軍者遷試太常卿明年吐蕃寇邊詔璘移軍援河西懷恩之叛璘引還間關轉鬪至鳳翔虜圍已合節度使孫志直嬰城守璘令士持滿外向突入縣門不解甲出戰背城陣虜潰率輕騎追之斬數千級漂血丹渠帝引見慰勞擢兼御史大夫永泰初拜四鎮行營節度南道和蕃使俄檢校工部尚書北庭行營節度使元日有卒犯盜或曰宜赦璘曰赦之則人將伺其日爲盜遂戮之天大旱里巷爲土龍衆巫以禱璘曰早由政不脩卽命撤之明日雨是歲大穰未幾徙涇原權知鳳翔隴右節度副使四鎮北庭如舊復以鄭穎二州隸之大曆八年吐蕃內寇渾瑊戰宜祿不利璘設伏潘原與瑊合擊破之俘級數萬進檢校尚書右僕射明年入朝求宰相以檢校左僕射知省事進扶風

郡王十一年卒於軍年五十六贈司徒諡曰武璘少學術而武幹絕倫遭時屯棘以忠力奮在涇八年繕屯壁爲戰守具令肅不殘人樂爲用虜不敢犯爲中興銳將初涇軍乏財帝諷李抱玉讓鄭穎璘因得良積且前後賜資無算家富不貲治第京師侈甚其寢堂無慮費錢二十萬緡方璘在軍守者覆以油幔及喪歸都人爭入觀假稱故吏入赴弔者日數百德宗在東宮聞之不喜及卽位乃禁第舍不得踰制詔毀璘中寢及宦人劉忠翼第璘家懼悉籍亭館入之官其後賜羣臣宴多在璘山池而子無行財亦尋盡李抱玉本安興貴曾孫世居河西善養馬始名重璋閑騎射少從軍其爲人沈毅有謀尤忠謹李光弼引爲裨校天寶末玄宗以其戰河西有功爲改今名祿山亂守南陽斬賊使至德二載上言世占涼州恥與逆臣共宗有詔賜之姓因徙籍京兆舉族以李爲氏進至右羽林大將軍知軍事擢陳鄭穎毫節度使史思明已破東都凶獸勃然鼓而行自謂無前光弼壁河陽拒之使抱玉守南城賊急攻抱玉縱奇兵出表裏俘殺甚衆賊乃捨去從光弼戰大敗因不能西差功第一封樂城縣公代宗立兼澤潞節度使統相衛儀邢十一州兵以功授司空兼兵部尚書武威郡王懇辭王爵徙涼國公進司徒廣德中吐蕃入寇帝次陝羣盜徧南山五谷間東距號西抵岐椎剽不勝計詔太子賓客薛景仙爲南山五溪谷防禦使引兵招捕久不克更詔抱玉討賊抱玉盡得賊株柢蹊隧分兵守諸谷使牙將李崇客精騎四百自桃林號川襲

之賊帥高玉脫身走城固山南西道張獻誠禽以獻悉索支黨斬之不閔旬五穀平卽詔抱玉權鳳翔隴右節度抱玉懇讓司徒故以尚書左僕射同中書門下平章事河西隴右副元帥又讓僕射故還爲兵部尚書大厯二年來朝久之加山南西道副元帥兼節度使屯盤屋抱玉兼三節度三副元帥位望隆赫乃上言隴坻遠扶文緜地二千里虜孔道不一梁岷重則關輔輕願擇能臣帥西道當一面臣得專事關隴帝多其讓許之抱玉在鎮十餘年雖無破虜功而禁暴安人爲將臣之良卒年七十四贈太保諡曰昭武從父弟抱真

抱真字大玄沈慮而斷抱玉屬以軍事授汾州別駕僕固懷恩反陷焉挺身歸京師代宗以懷恩倚回紇所將朔方兵精愛之召抱真問狀答曰郭子儀嘗領朔方軍人多德之懷恩欺其下曰子儀爲朝恩所殺今起而用是伐其謀兵可不戰解也旣而懷恩敗如抱真策遷殿中少監陳鄭澤潞節度留後旣謝因言百姓勞逸在牧守願得一州以自試更授澤州刺史兼澤潞節度副使徙懷州仍爲懷澤潞觀察留後凡八年抱真策山東有變澤潞兵所走集乘戰代後賦重人困軍伍彫刊乃籍戶三丁擇一蠲其徭租給弓矢令閑月得曹偶習射歲終大校親按籍第能否賞責比三年皆爲精兵舉所部得成卒二萬旣不累于官而府庫實乃曰軍可用矣繕甲淬兵遂雄山東天下稱昭義步兵爲諸軍冠久之爲澤潞節度行軍司

馬會昭義節度李承昭病詔抱真權磁邢兵馬留後德宗嗣位檢校工部尚書領昭義節度使建中中由悅反圍邢及臨洛詔抱真與河東馬燧合神策兵救之敗悅於雙岡斬其將楊朝光又破之臨洛遂解臨洛邢之圍以功檢校兵部尚書復與悅戰洹水走之進圍魏悅戰城下大敗進檢校尚書右僕射會朱滔王武俊反救悅抱真退保魏帝倉卒奉天聞諸將皆哭各引麾下還屯於時李希烈陷汴李納反鄆李懷光相次反河中抱真獨以數州截然橫絕潰叛中離沮其姦為羣盜所憚興元初檢校左僕射同中書門下平章事繇倪國公進義陽郡王朱滔悉幽薊兵與回紇圍貝州以應朱泚而希烈既竊名號則欲臣制諸叛衆稍離天子下罪已詔並赦羣盜抱真乃遣客賈林以大義說武俊使合從擊滔武俊許諾而內猶豫抱真將自造其壁譏軍事於司馬盧玄卿曰吾此行繫時安危使遂不還部勒以聽天子命惟子勵兵東向雪吾之恥亦唯子即以數騎馳入見武陵曰泚希烈爭竊帝號滔攻貝州此其志皆欲自肆于天下足下既不能與競長雄捨九葉天子而臣反虜乎且詔書罪己禹湯之心也方上暴露播越公能自安乎因持武俊涕下交頤武俊亦感泣左右皆泣退臥帳中甘寢久之武俊感其不疑乃益蒸指心誓天曰此身已許公死矣食訖約為昆弟而別旦日合戰大破滔經城進檢校司空實封六百戶貞元初朝京師詔遷所鎮抱真喜士聞世賢者必欲與之游雖小善皆卑禮厚幣數千里邀致之至無可錄徐徐以禮

謝會天下稍無事乃飾臺沼以自娛好方士謂不死可致有孫季長者為治丹且曰服此當僊去抱真表署募府嘗語左右曰秦漢君不偶此我乃得之後升天不復見公等矣夜夢駕鶴寤而刻寓鶴衣服習乘之後益感厭勝因疾請降官七讓司空還為左僕射餌丹二萬丸不能食且死醫以羸肪穀漆下之疾少間季長曰危得僊何自棄也益服三千丸卒年六十二其子殿中侍御史緘墮喪與其屬盧會昌元仲經謀會諸將仲經詭抱真令曰吾疾不任事令緘典軍勉佐之副使李說及諸校俯首皆嚙曰諾緘盛服出衆拜之悉發府庫勞軍會昌卽為抱真表翌日令諸將署章請以節付緘天子已聞抱真喪遣使者馳入軍詔以事屬大將王延貴緘謾若抱真疾請詰朝見凡三日緘乃出見使者陳兵甚嚴使者曰朝廷已知公薨詔以兵屬延貴君速歸發喪緘愕然謂諸將曰詔不許若何衆不對乃遽以印鑰上監軍始發喪使者趣延貴視事緘赴東都仲經逃諸外捕殺之會昌得不坐始緘遣將陳榮以書抵武俊假其財武俊怒曰吾與乃公善者恭王命非同惡也今聞已亡誰詐其子使不俟朝制刑囚榮而讓緘焉詔贈抱真太保

路嗣恭字懿範京兆三原人始名劍客以世蔭為鄴尉豫黜陟河朔表為蕭關令連徙神烏姑臧二縣考績為天下最玄宗以為可嗣漢魯恭因賜名轉渭南令主杜化東陽二驛時關畿用兵使人係道嗣恭

備具有素而民不擾後爲郭子儀朔方節度留後大將孫守亮擁重兵驕蹇不受制嗣恭因稱疾守亮至卽殺之一軍皆震承泰三年檢校刑部尚書知省事出爲江西觀察使以善治財賦稱有賈明觀者素事魚朝恩朝恩誅當坐死宰相元載納其賂遣効力江西將行居民數萬懷瓦石候擊載諭市吏禁止乃得去魏少游畏載常回容之及嗣恭代少游卽日杖死大厯八年嶺南將哥舒晃殺節度使呂崇賁五嶺大擾詔嗣恭兼嶺南節度使封冀國公嗣恭募勇敢士八千人以流人孟搖敬冕爲才擢任之使瑤督大軍當其衝冕率輕兵由間道出不意遂斬光及支黨萬餘築尸爲京觀俚洞魁宿爲惡者皆族夷之還爲檢校兵部尚書復知省事嗣恭起州縣吏以課治進至顯官及冕事株戮舶商沒其財數百萬私有之代宗惡焉故賞不酬功德宗立陰賊宰相楊炎炎錄前効更拜兵部尚書東都留守俄加懷鄆汝陝河陽三城節度東都畿觀察使卒年七十一贈左僕射子應恕

應字從衆以蔭爲著作郎貞元初出爲處州刺史詔嗣父封鑿嶺石梗嶮以通舟道德宗時李泌爲相號得君帝嘗曰誰於卿有恩者朕能報之泌乃言曩爲元載所疾謫江西路嗣恭與載厚臣嘗畏之會與其子應並驅馬齧其脛臣惶恐不自安應闕不言勉起見臣臣常媿其長者思有以報帝曰善卽日加應檢校屯田郎中服金紫累遷宣歙池觀察使封襄陽郡王李錡反應發鄉兵救湖常二州以故錡不能拔元

和六年以疾授左散騎常侍卒諡曰靖恕字體仁從嗣恭討哥舒晃授檢校工部員外郎得從便宜擢降將伊慎用之賊平恕功多嗣恭節度河陽也恕爲懷州刺史年纔三十楊炎用并魏博爲時噴譏累遷廊坊宣歙觀察使坐事貶吉州刺史以右散騎常侍致仕卒贈洪州都督

唐書卷一百三十八

唐書卷一百三十八考證

馬璘傳擢兼御史大夫○舊書授兼御史中丞

李抱玉弟抱真進檢校司空實封六百戶○舊書作五百戶

路嗣恭傳永泰三年○舊書作大曆三年

出為江西觀察使以善治財賦稱○臣德潛按本文即蒙上永泰三年事也舊書在大曆六年七月而舊

書本紀則係七年正月

有賈明觀者素事魚朝恩誅當坐死○臣德潛按此為朝恩坐死也舊書云賈明觀者事北軍都虞

候劉希暹魚朝恩誅希暹從死此又為希暹坐死也

唐書卷一百三十八考證

唐書卷一百三十九

宋 端 明 殿 學 士 宋 祁 撰

列傳第六十四

房 瑄

房瑄字次律河南河南人父融武后時以正諫大夫同鳳閣鸞臺平章事神龍元年貶死高州瑄少好學風度沈整以蔭補弘文生與呂向偕隱陸渾山十年不諧際人事開元中作封禪書說宰相張說說奇之奏為校書郎舉任縣令科授盧氏令拜監察御史坐訊獄非是貶睦州司戶參軍復為縣所至上德化興長利以治最顯天寶五載試給事中封漳南縣男時玄宗有逸志數巡幸廣溫泉為華清宮環宮所置百司區署以瑄資機算詔總經度驪山疏巖剔藪為天子游觀未畢坐善李適之韋堅斥為宜春太守應琅邪鄴扶風三郡類遷憲部侍郎十五載帝狩蜀瑄馳至普安上謁帝喜甚即拜文部尚書同中書門下平章事從至成都賜一子官俄與韋見素崔渙奉冊靈武見肅宗具言上皇所以傳付意因道當時利病箝索虜情辭吐華暢帝為改容瑄既有重名帝傾意待之機務一二與瑄參決諸將相莫敢望於是第五琦言財利幸為江淮租庸使瑄諫曰往楊國忠聚斂產怨天下陛下即位人未見德今又寵琦是一國忠死

乾隆四年校刊

唐書卷一百三十九列傳

一國忠生無以示遠方帝曰大軍之命方急無財則散卿惡琦可也何所取財瑄不得對北海太守賀蘭進明自河南至詔攝御史大夫嶺南節度使入謝帝曰朕語瑄除正大夫何為攝邪進明銜之因曰陛下知晉亂乎惟以尙虛名任王衍為宰相基祖浮華不事天下事故至於敗方唐中興當用寶才而瑄性疏闊大言無當非宰相器陛下待之厚然孰肯為陛下用乎帝曰何哉對曰陛下頃為皇太子太子出曰撫軍入曰監國而瑄為聖皇建遺諸王為都統節度乃謂陛下為元子而付以朔方河東河北空虛之地承王豐王乃統四節度此於聖皇似忠於陛下非忠也瑄意諸子一得天下身不失恩又多樹私黨以副戎權推此而言豈肯盡誠於陛下乎帝入其語始惡瑄以進明為御史大夫河南節度使會瑄請自將平賊帝猶倚以成功乃詔瑄持節招討西京防禦蒲潼兩關兵馬節度等使得自擇參佐乃以兵部尙書王思禮御史中丞鄧景山為副戶部侍郎李揖為行軍司馬中丞宋若思起居郎知制誥賈至右司郎中魏少游為判官給事中劉秩為參謀瑄分三軍趨京師楊希文將南軍自宜壽入劉恚將中軍自武功入李光進將北軍自奉天入瑄身中軍先鋒十月庚子次便橋辛丑中軍北軍遇賊陳濤斜戰不利瑄欲持重有所伺中人邢延恩促戰故敗士死麻葦癸卯率南軍復戰遂大敗希文恚皆降賊初瑄用春秋時戰法以車二千乘練營騎步夾之既戰賊乘風譟牛悉髀栗賊投芻而火之人畜焚燒殺卒四萬血丹野殘眾才

數千不能軍瑄還走行在見帝肉袒請罪帝宥之使裒夷散復圖進取瑄雅自負以天下為己任然用兵本非所長其佐李揖劉秩等皆儒人未嘗更軍旅瑄每詬曰彼曳落河雖多能當我劉秩乎帝雖恨瑄喪師而眷任未衰崔圓自蜀來最後見帝瑄謂帝不見省易之圓以金畀李輔國不淹日被寵遂怨瑄瑄數稱疾不入會御史大夫顏真卿劾奏諫議大夫李何忌不孝瑄素善何忌不欲以惡名錮之託被酒入朝貶西平郡司馬琴工董廷蘭出入瑄所瑄昵之廷蘭藉瑄勢數招賅謝為有司劾治瑄訴于帝帝因震怒叱遣之瑄惶恐就第罷為太子少師從帝還都封清河郡公瑄之廢朝臣多言瑄謀包文武可復用雖瑄亦自謂當柄任為天子立功善瑄者暴其言于朝瑄方日引劉秩嚴武與宴語移病自如帝以瑄虛言浮誕內鞅挾黨背公非大臣體乾元元年出瑄為邠州刺史逐秩武等因下詔陳其比周狀喻敕中外始邠以武將領刺史故綱目廢弛即治府為營吏攘民居相淆謹瑄至一切革之入以便安政聲流聞召拜太子賓客遷禮部尙書為管漢二州刺史寶應二年召拜刑部尙書道病卒贈太尉瑄有遠器好談老子浮屠法喜賓客高談有餘而不切事時天下多故急於謀略攻取帝以吏事繩下而瑄為相遽欲從容鎮靜以輔治之又知人不明以取敗撓故名墜損云

贊曰唐名儒多言瑄德器有王佐材而史載行事亦少貶矣一舉喪師訖不復振原瑄以忠誼自矜片言

悟主而取宰相必有以過人者用違所長遂無成功然盛名之下為難居矣夫名盛則責望備實不副則
咎咎深使瑄遭時承平從容帷幄不失為名宰而倉卒濟難事敗隙生陷於浮虛比周之罪名之為累也
戒哉

子孺復幼頗能屬文然狂縱不法淮南節度使陳少游奏置幕府多招術家言已三十當得宰相以熏權
近希進取後辟浙西韓滉府兄宗偃喪自嶺外還孺復不出臨弔與妻鄭不相中慈姆為言乃具棺召家
人生斂之鄭方乳促上道鄭死于行又娶崔昭女崔悍媚殺二侍兒私瘞之觀察使以聞貶連州司馬聽
崔去既又與崔通請復合詔許未幾復離終容州刺史

瑄孫啟以蔭補鳳翔參軍事累調萬年令素贊附王叔文貞元末叔文用事除容管經略使陰許以荆南
帥節啟至荆湖宿留不肯進會叔文與韋執誼內忿爭不果拜俄而皇太子監國啟惶駭就鎮凡九年改
桂管觀察使州邸以賂請有司飛驛送詔既而憲宗自遣宦人持詔賜啟啟畏使者邀重餉即曰先五日
已得詔使者給請視因馳歸以聞貶太僕少卿啟自陳獻使者南口十五帝怒殺宦人貶啟虔州長史死
始詔五管福建黔中道不得以口饋遺博易罷臘口等使

瑄族孫式擢進士第累遷忠州刺史韋臯表為雲南安撫副使蜀州刺史臯率劉闢反式留不得行賊平

高崇文保貸之言諸朝除吏部郎中時河朔諸將劉濟張茂昭等更相劾奏帝欲和之拜式給事中使河
北還奏如旨遷陝虢觀察使改河南尹會計王承宗鎮州索餉車四千乘民不能具式建言歲凶人勞不
任調發又御史元稹亦言賊未禽而河南民先困詔可都鄙安之改宣歙觀察使卒贈左散騎常侍諡曰
傾吏部郎中韋乾度曰始式刺蜀州劉闢構難即謂闢曰向夢公為上相儀衛甚盛幸無相忘闢喜以為
祥後闢發兵署牒首曰闢副曰式參謀曰符載大節已虧不宜得諡博士李虞仲曰始闢反為其用者皆
救死其頸可盡被惡名乎如式不能去又不能死可謂求生害仁者也闢走西山召所疑畏者盡殺之式
在其間會救得免而曰大節已虧近於溢言諡乃定

張鎬字從周博州人儀狀瓌偉有大志視經史猶漁獵然好王霸大略少事吳兢器之游京師未知名
率嗜酒鼓琴自娛人或邀之杖策往醉即返不及世務天寶末楊國忠執政求天下士為己重聞鎬才薦
之釋褐衣拜左拾遺歷侍御史玄宗西狩鎬徒步扈從俄遣詣肅宗所數論事擢諫議大夫尋拜中書侍
郎同中書門下平章事時引內浮屠數百居禁中號內道場諷外聞鎬諫曰天子之福要在養人以一
爾寓美風化未聞區區佛法而致太平願陛下以無為為心不以小乘撓聖慮帝然之尋詔兼河南節度
使都統淮南諸軍事賊圍宋州張巡告急鎬倍道進檄濠州刺史閔巨曉趣救曉復撓逗留不肯進比鎬

至惟口而巡已陷鎬怒杖殺曉帝還京師封南陽郡公詔以本軍鎮汴州捕平殘寇史思明提范陽獻順
歎鎬揣其僞密奏曰思明勢窮而服包藏不測可以計取難以義招不宜以威權假之又言滑州防禦使
許叔冀狡獪臨難必變宜追還宿衛書入不省時宦官絡繹出鎬境未嘗降情給納自范陽滑州使還者
皆盛言思明叔冀忠而毀鎬無經略才帝以鎬不切事機遂罷宰相授荊州大都督府長史思明叔冀後
果叛如鎬言召拜太子賓客左散騎常侍坐市嗣岐王珍第貶辰州司戶參軍代宗初起爲撫州刺史遷
洪州觀察使更封平原郡公袁晁寇東境江介震駭鎬遣兵屯上饒斬首二千級又襲舒城賊楊昭臬之
沈千載者新安大豪連結椎剽州縣不能禽鎬遣別將盡殄其衆改江南西道觀察使卒鎬起布衣二拜
至宰相居身廉不殖貲產善待士性簡重論議有體在位雖淺而天下之人推爲舊德云

李泌字長源魏八柱國弼六世孫徙居京兆七歲知爲文立宗開元十六年悉召能言佛道孔子者相答
難禁中有員俶者九歲升堂詞辯注射坐人皆屈帝異之曰半千孫固當然因問童子豈有類若者俶跪
奏臣舅子李泌帝卽馳召之泌既至帝方與燕國公張說觀奕因使說試其能說請賦方圓動靜泌逡巡
曰願聞其略說因曰方若棋局圓若棋子動若棋生靜若棋死泌卽答曰方若行義圓若用智動若聘材
靜若得意說因賀帝得奇童帝大悅曰是子精神要大於身賜束帛救其家曰善視養之張九齡尤所獎

變常引至臥內九齡與嚴挺之蕭誠善挺之惡誠佞勸九齡謝絕之九齡忽獨念曰嚴太苦勤然蕭軟美
可喜方命左右召蕭泌在旁率爾曰公起布衣以直道至宰相而喜軟美者乎九齡驚改容謝之因呼小
友及長博學善治易常游嵩華終南間慕神仙不死術天寶中詣闕獻復明堂九鼎議帝憶其早惠召講
老子有法得待詔翰林仍供奉東宮皇太子遇之厚嘗賦詩譏謂楊國忠安祿山等國忠疾之詔斥置斬
春郡肅宗卽位靈武物色求訪會泌亦自至已謁見陳天下所以成敗事帝悅欲授以官固辭願以客從
入議國事出陪輦衆指曰著黃者聖人著白者山人帝聞因賜金紫拜元帥廣平王行軍司馬帝嘗曰
卿侍上皇中爲朕師今下判廣平行軍朕父子資卿道義云始軍中謀帥皆屬建寧王泌密白帝曰建寧
任誠賢然廣平冢嗣有君人量豈使爲吳太伯乎帝曰廣平爲太子何假元帥泌曰使元帥有功陛下不
以爲儲副得邪太子從曰撫軍守曰監國今元帥乃撫軍也帝從之初帝在東宮李林甫數構譖勢危甚
及卽位怨之欲掘冢焚骨泌以天子而念宿嫌示天下不廣使脅從之徒得釋言於賊帝不悅曰往事卿
忘之乎對曰臣念不在此上皇有天下五十年一旦失意南方氣候惡且春秋高聞陛下錄故怨將內慙
不憚萬有一感疾是陛下以天下之廣不能安親也帝感悟抱泌頸以泣曰朕不及此因從容問破賊期
對曰賊掠金帛子女悉送范陽有苟得心渠能定中國邪華人爲之用者獨周摯高尚等數人餘皆脅制

倫合至天下大計非所知也不出二年無寇矣陛下無欲速夫王者之師當務萬全圖久安使無後害今詔李光弼守太原出井陘郭子儀取馮翊入河東則史思明張忠志不敢離范陽常山安守忠田乾真不敢離長安是以三地禁其四將也隨祿山者獨阿史那承慶耳使子儀毋取華令賊得通關中則北守范陽西救長安奔命數千里其精卒勁騎不逾年而敝我常以逸待勞來避其鋒去翦其疲以所徵之兵會扶風與太原朔方軍互擊之徐命建寧王爲范陽節度大使北並塞與光弼相犄角以取范陽賊失巢窟當死河南諸將手帝然之會西方兵大集帝欲速得長安曰今戰必勝攻必取何暇千里先事范陽乎泌曰必得兩京則賊再疆我再困且我所恃者礮西突騎西北諸戎耳若先取京師期必在春關東早熟馬且病士皆思歸不可以戰賊得休士養徒必復來南此危道也帝不聽二京平帝奉迎上皇自請歸東宮以遂子道泌曰上皇不來矣人臣尚七十而傳況欲勞上皇以天下事乎帝曰奈何泌乃爲羣臣通奏具言天子思戀晨昏請促還以就孝養上皇得初奏答曰當與我劍南一道自奉不復東矣帝甚憂及再奏至喜曰吾方得爲天子父遂下詔戒行崔圓李輔國以泌親信疾之泌畏禍願隱衡山有詔給三品祿賜隱士服爲治室盧泌嘗取松樛枝以隱背名曰養和後得如龍形者因以獻帝四方爭効之代宗立召至舍蓬萊殿書閣初泌無妻不食肉帝乃賜光福里第疆詔食肉爲娶朔方故留後李暉甥昏日敕北軍供

帳元載惡不附己因江西觀察使魏少游請僚佐載稱泌才以試祕書少監充判官載誅帝召還復爲常表所忌出爲楚州刺史辭不行帝亦留之會澧州闕表盛言南方凋瘵請輟泌治之乃授澧朗峽團練使徙杭州刺史皆有風績德宗在奉天召赴行在授左散騎常侍時李懷光叛歲又蝗旱議者欲赦懷光帝博問羣臣泌破一桐葉附使以進曰陛下與懷光君臣之分不可復合如此葉矣由是不赦始朱泚亂帝約吐蕃赴援賂以安西北庭既而渾瑊與賊戰咸陽泚大敗吐蕃以師追北不甚力因大掠武功而歸京師平來請如約帝業許欲遂與之泌曰安西北庭控制西域五十七國及十姓突厥皆捍兵處以分吐蕃勢使不得併兵東侵今與其地則關中危矣且吐蕃向持兩端不戰又掠我武功乃賊也奈何與之遂止貞元元年拜陝虢觀察使泌始鑿山開車道至三門以便饗漕以勞進檢校禮部尚書准西兵防秋屯鄜州已而四千人亡歸或曰吳少誠密招之既入境泌邀險悉擊殺之三年拜中書侍中同中書門下平章事累封鄴縣侯初張延賞滅天下吏員人情愁怨至流離死道路者泌請復之帝未從因問今戶口減承平時幾何曰三之二帝曰人旣彫耗員何可復泌曰不然戶口雖耗而事多承平十倍陛下欲省州縣則可而吏員不可減今州或參軍署券縣佐史判案所謂省官者去其冗員非常員也帝曰若何爲冗員對曰州參軍無職事及兼試額內官者兼試自至德以來有之比正員三之一可悉罷帝乃許復吏員而罷

元官泌又條奏中朝官常侍賓客十員其六員可罷左右贊善三十員其二十員可罷如舊制諸王未出閣官屬皆不除而所收科奉乃多於減員矣帝悅是時州刺史月奉至千緡方鎮所取無藝而京官祿寡薄自方鎮入八座至謂罷權薛嵩由左丞貶歙州刺史家人恨降之晚崔祐甫任吏部員外求爲洪州別駕使府賓佐有所忤者薦爲郎官其當遷臺閣者皆以不赴取罪去泌以爲外太重內太輕乃請隨官闕劇普增其奉時以爲宜而竇參多沮亂其事不能悉如所請泌又白罷拾遺補闕帝雖不從然因是不除諫官唯用韓皐歸登泌因收其公廩錢令二人寓食中書舍人署凡三年始以韋綬梁肅爲左右補闕太子妃蕭母郇國公主也坐蠱媚幽禁中帝怒責太子太子不知所對泌入帝數稱舒王賢泌揣帝有廢立意因曰陛下有一子而疑之乃欲立弟之子臣不敢以古事爭且十宅諸叔陛下奉之若何帝赫然曰卿何知舒王非朕子對曰陛下昔爲臣言之陛下有嫡子以爲疑弟之子敢自信於陛下乎帝曰卿違朕意不顧家族邪對曰臣衰老位宰相以諫而誅分也使太子廢宅日陛下悔曰我惟一子殺之泌不吾諫吾亦殺爾子則臣絕祀矣雖有兄弟子非所欲也卽噫鳴流涕因稱昔太宗詔太子不道藩王窺伺者兩廢子陛下疑東宮而稱舒王賢得無窺伺乎若太子得罪請亦廢之而立皇孫千秋萬歲後天下猶陛下子孫有也且郇國爲其女妬忌而蠱惑東宮豈可以妻母累太子乎執爭數十意益堅帝寤太子乃得安初

興元後國用大屈封物皆三損二舊制堂封歲三千六百繼後纔千二百至是帝使還舊封於是李晟馬燧渾瑊各食寶封悉讓送泌泌不納時方鎮私獻於帝歲凡五十萬緡其後稍損至三十萬帝以用度乏問泌泌請天下供錢歲百萬給宮中勸不受私獻凡詔旨須索卽代兩稅則方鎮可以行法天下紓矣帝嘗從容言盧杞清介敢言然少學不能廣朕以古道入皆指其姦而朕不覺也對曰陛下能覺杞之惡安致建中禍邪李揆和蕃顏真卿使希烈其害舊德多矣又楊炎罪不至死杞擠陷之而相關播懷光立功逼使其叛此欺天也帝曰卿言誠有之然楊炎視朕如三尺童子有所論奏可則退不許則辭官非特杞惡之也且建中亂卿亦知桑道茂語乎乃命當然對曰夫命者已然之言主相造命不當言命言命則不復賞善罰惡矣桀曰我生不有命自天武王數紂曰謂已有天命君而言命則桀紂矣帝曰朕請不復言命俄加集賢殿崇文館大學士脩國史泌建言學士加大始中宗時及張說爲之固辭乃以學士知院事至崔圓復爲大學士亦引泌爲讓而止帝以前世上巳九日皆大宴集而寒食多與上巳同時欲以三月名節自我爲古若何而可泌請廢正月晦以二月朔爲中和節因賜大臣戚里尺謂之裁度民間以青囊盛百穀瓜果種相問遺號爲獻生子里閭釀宜春酒以祭句芒神祈豐年百官進農書以示務本帝悅乃著令與上巳九日爲三令節中外皆賜緡錢燕會四年八月月蝕東壁泌曰東壁圖書府大臣當有憂者

吾以宰相兼學士當之矣昔燕國公張說由是以亡又可免乎明年果卒年六十八贈太子太傅泌出入中禁事四君數為權倖所疾常以智免好縱橫大言時時讖議能寤移人主然常持黃老鬼神說故為人所譏切初肅宗重陰陽巫祝擢王珣執政大抵興造工役輒牽禁忌俗說而黎幹以左道位京兆尹嘗使禁工駢珠刺繡為乘輿服舉焚之以為禳禱德宗素不為然及嗣位罷內道場除巫祝代宗將葬帝號送承天門而輜車行不中道問其故有司曰陛下本命在午故避之帝泣曰安有枉靈駕以謀身利命直午而行又宣政廊壞太卜言孟冬魁岡不可營繕帝曰春秋啟塞從時何魁岡為亟詔葺之及桑道茂城奉天事驗始尚時日拘忌因進用泌泌亦自有所建明獨柳玼稱兩京復泌謀居多其功乃大於魯連范蠡云子繁

繁少才警無行泌始起陽城官諸朝故城重德泌而親厚於繁及疏裴延齡既具藁以繁可信夜使繁書已封盡能誦憶乃錄以示延齡明日延齡白帝曰城以疏示於朝即隨其條以自疏解城奏入帝怒遂不省泌與梁肅善故繁師事肅及卒烝其室士議譴醜由是擯棄積年後為太常博士權德輿為卿奏斥之改河南府士曹參軍累遷隋州刺史罷歸不得調敬宗誕日詔與兵部侍郎丁公著太常少卿陸巨入殿中抗老佛誦論改大理少卿弘文館學士諫官御史交章彈治乃出為亳州刺史州有劇賊剽室廬略財

貨為患它刺史不能禽繁有機略悉知賊巢所在一旦出兵捕斬之議者責繁不先啟觀察府為擅興詔御史舒元與按之元與繁素隙盡翻其獄以為濫殺不享有詔賜死京兆人皆寃之繁下獄知且死恐先人功業泯滅從吏求廢紙握筆著家傳十篇傳于世

贊曰泌之為人也異哉其謀事近忠其輕去近高其自全近智卒而建上宰近立功立名者觀肅宗披榛莽立朝廷單言暫謀有所寤合皆付以政當此時泌於獻納為不少又佐代宗收兩京獨不見錄蓋一主不以宰相器之邪德宗晚好鬼神事乃獲用蓋以怪自置而為之助也繁為家傳言泌本居鬼谷而史臣謬言好鬼道以自解釋既又著泌數與靈仙接言舉不經則知當時議者切而不與有為而然繁言多浮侈不可信撮其近實者著于傳至勸帝先事范陽明太子無罪亦不可誣也

唐書卷一百三十九

唐書卷一百三十九考證
房瑄族孫式○舊書式爲瑄姪

唐書卷一百三十九考證

唐書卷一百四十

宋 端 明 殿 學 士 宋 祁 撰

列傳第六十五

崔苗二裴呂

崔圓字有裕貝州武城人後魏尚書左僕射亮八世孫少孤貧志向卓邁喜學兵家開元中詔舉遺逸以
 鈐謀對策甲科歷京兆府參軍尹蕭冕薦之遷會昌丞楊國忠遙領劍南節度引圓為左司馬知留後玄
 宗西出次扶風遷御史中丞劍南節度副大使圓銳功名初聞難刺國忠意乃治城浚隍列館宇儲什具
 帝次河池圓疏具陳蜀土腴穀羨儲供易辦帝省書泣下曰世亂識忠臣即日拜中書侍郎同中書門下
 平章事仍兼劍南節度使天子至朝廷百司殿宇帷幔皆具益嗟賞之肅宗立命與房瑄韋見素赴行在
 所帝為制遺愛碑于蜀以寵之至德二載遷中書令封趙國公實封戶五百乾元元年罷為太子少師留
 守東都於是上皇所置宰相無在者王師之敗相州也軍所過皆縱剽圓懼委東都奔襄陽詔削階封尋
 詔拜濟王傅李光弼表為懷州刺史改汾州以治行稱徙淮南節度使在鎮六年請朝京師吏民乞留詔
 檢校尚書右僕射還之久乃檢校左僕射入知省事大厯中卒年六十四贈太子太師諡曰昭襄

苗晉卿字元輔潞州壺關人世以儒素稱擢進士第調爲修武尉累進吏部郎中中書舍人知吏部選事選人訴索好官厲言倨色紛于前晉卿與相對終日無愠顏久之進侍郎積寬縱而吏下因緣作姦方時承平選常萬人李林甫爲尙書專國政以銓事委晉卿及宋遙然歲命宅官同較書判駁才實天寶二載判入等者凡六十四人分甲乙丙三科以張奭爲第一奭御史中丞倚之子倚新得幸於帝晉卿欲附之奭本無學故議者巋然不平安祿山因間言之帝爲御花萼樓覆寶中裁十一二奭持紙終日筆不下人謂之曳白帝大怒貶倚淮陽太守遙武當太守晉卿安康太守明年徙魏郡卽克河北採訪使居三年政化大行嘗入計謁歸壺關望縣門輒步吏諫止晉卿以公門當下況父母邦乎郡太守迎犒使所屬令行酒酒至必立飲白醕侍老有獻降西階拜而飲時美其恭改河東郡兼河東採訪使徙扶風郡封高平縣男遷工部尙書東都留守召爲憲部兼左丞安祿山反寶廷芝棄陝郡不下楊國忠本忌其有望卽奏東道賊衝非大臣不可鎮過授陝郡太守陝虢防禦使晉卿見帝以老辭忤旨聽致仕于家車駕入蜀指紳多陷賊晉卿間道走金州肅宗至扶風召赴行在拜左相平京師封韓國公食五百戶改侍中旣而乞骸骨罷爲太子太傅未幾復拜侍中玄宗崩肅宗疾甚詔晉卿攝冢宰固讓曰大行遺詔皇帝三日聽政稽祖宗故事則無冢宰之文奉遺詔則宜聽朝惟陛下順變以幸萬國帝不聽後數日代宗立復詔攝冢宰

固辭乃免時年老蹇甚乞間日入政事堂帝優之聽入閣不趨爲御小延英召對宰相對小延英自晉卿始吐蕃犯京師晉卿以病臥家賊輿致脅之嚙不肯語賊不敢害帝還拜太保罷政事永泰初薨年八十一贈太師京兆少尹護喪諡曰懿獻元載未顯時爲晉卿所遇載方相故諷有司改諡文貞晉卿寬厚所至以惠化稱魏人爲營生祠立石頌美再秉政出入七年小心謹畏不甚斥是非得失故能安保寵名然練達事體百官簿最一省無遺議者比漢胡廣肅宗欲以李輔國爲常侍奏曰常侍近密非賢不可居豈宜任等輩罷之朝廷欲論陳希烈等死晉卿曰陛下得張通儒安守忠孫孝哲等何以加罪帝不從俄而史思明亂持是以誘衆嘗自爲父碑文有鵠巢碑上賊入上黨焚蕩略盡而苗氏松檟獨無傷大厯七年配享肅宗廟廷十子發丕堅粲垂向呂稷望咸粲德宗時官至郎中陸贄欲進粲官帝不許曰晉卿往攝政有不臣之言又名其子皆與帝王同粲等宜與外官贊奏王者爵人必於朝刑人必於市言與衆共之獎而不言其善斯謂曲貸罰而不書其惡斯謂中傷曲貸則授受不明而私幸之門啟中傷則枉直無辨而讒間之道行可不慎哉若陛下以晉卿姦邪粲等應坐則當公議其罪若知見誣亦宜擢粲等以示天下且晉卿起文儒致位台輔謙柔敦厚爲三朝所推安肯爲族滅計雖甚狂險猶不爲之況老臣乎帝然之而粲官終不顯

裴冕字章甫河中河東人本冠族仕家以蔭再調渭南尉王鉷爲京畿採訪使表署判官歷殿中侍御史冕少學術然明銳果於事衆號稱職銜雅任之及鉷得罪有詔廷辨冕位甚下而抗言其誣鉷死李林甫方用事僚屬懼皆引去獨冕爲斂葬由是寔知名河西節度使哥舒翰辟行軍司馬玄宗入蜀詔皇太子爲天下兵馬元帥拜冕御史中丞兼左庶子副之初冕在河西方召還而道遇太子平涼遂從至靈武與杜鴻漸崔漪同辭進曰主上厭于勤且南狩蜀宗社神器要須有歸今天意人事屬在殿下宜正位號有如逸巡失億兆心則大事去矣太子曰我平寇逆奉迎乘輿還京師退居儲貳以待膳左右豈不樂哉公等何言之過對曰殿下居東宮二十年今多難啟聖以安社稷而所從將士皆關輔人日夜思歸大眾一職不可復集不如因而撫之以就大功臣等昧死請太子固讓凡五請卒見聽太子即位進冕中書侍郎同中書門下平章事乃建言賣官度僧道士收贖濟軍興時取價既賤衆不爲宜肅宗至鳳翔罷冕政事拜尙書右僕射兩京平封冀國公實封五百戶出爲劍南西川節度使復爲右僕射待制集賢院俄充山陵使於是中書舍人劉烜爲李輔國所昵冕表爲判官烜抵法坐降施州刺史徙澧州大厯中郭子儀言於代宗曰冕首佐先帝馳驅靈武有社稷勳程元振忌其賢遂加誣構海內冤之陛下宜還冕於朝復俾輔相必能致治成化時元載秉政冕早所甄引載德之又貪其衰瘵且下已遂拜左僕射同中書門下平

章事入見拜不能興載自扶之代爲贊謝俄兼河南江淮副元帥東都留守不踰月卒有詔贈太尉冕以忠勤自將然不知宰相大體性豪侈既素貴輿服食飲皆光麗珍豐樞馬直數百金者常十數每廣會賓客不能名其饌自製巾子工甚人爭效之號僕射巾領使既衆吏白俸簿月二千緡冕顧視喜見顏問世嘗其嗜利云始肅宗廟惟苗晉卿配享冕卒後二十餘年有蘇正元者奏言肅宗爲元帥時師纔一旅冕於草創中甄大義以勸進收募驍勇幾十餘萬旣逾月房琯來又一年而晉卿至今晉卿從祀而冕乃不與有詔冕配享肅宗廟

裴遵慶字少良絳州聞喜人幼彊學該綜圖傳外晦內明不干當世年旣長始以仕家推蔭爲興寧陵丞調大理丞邊將蕭克濟督役苛暴役者有醜言有司以大逆論遵慶曰財不足聚人力不足加衆焉能反由是全救數十族頓擢吏部員外郎判南曹天寶時選者歲萬計遵慶性彊敏視簿牒詳而不苛世稱吏事第一肅宗時爲吏部侍郎蕭華輔政屢薦之拜黃門侍郎同中書門下平章事代宗初僕固懷恩反帝以遵慶忠厚大臣故奉詔宣慰懷恩聽命將入朝旣而爲其將范志誠沮止時帝在陝遵慶脫身赴行在帝還遷太子少傅罷爲集賢院待制改吏部尙書以尙書右僕射復知選事朝廷優其老聽就第注官時以爲榮嘗有族子病狂易告以謀反帝識其謬置不問性悼正老而彌謹每薦賢有來謝者以爲恥諫而

見從卽內益畏雖親近但記其削稿疏數而莫知所言大厯十年薨年九十餘初爲郎時著王政記述今古治體識者知其有公輔器云子向

向字倬仁以蔭得調建中初李紆爲同州刺史奏署判官李懷光叛河中使其將趙貴先築壘於同州紆奔奉天而向領州務貴先脅吏督役不及期將斬以徇民皆駭散向獨詣貴先壘開諭之貴先乃降同州不陷向力也累爲樞陽渭南令奏課皆第一擢戶部員外郎德宗末方鎮之副多自選於朝以待有變次授之故向以選爲太原少尹行軍司馬歷陝虢觀察使以吏部尙書致仕向能以學行持門戶內外親屬百餘口祿俸必均世稱其孝睦卒年八十贈太子少保子寅官累御史大夫寅子樞

樞字紀聖咸通中第進士杜審權鎮河中奏署幕府再遷藍田尉宰相王鐸知之遂直弘文館鐸罷樞久不調從僖宗入蜀擢殿中侍御史中和初鐸爲都統表署鄭滑掌書記龍紀初進給事中改京兆尹與孔緯厚善緯以罪貶故樞改右庶子出爲歙州刺史遷右散騎常侍爲汴州宣諭使樞素與朱全忠相結納故全忠聽命修貢獻不絕昭宗悅遷兵部侍郎時崔胤亦倚全忠專朝柄因與樞善俄以戶部侍郎同中書門下平章事帝在鳳翔貶胤官樞亦罷爲工部尙書已還宮拜檢校尙書左僕射同平章事出爲清海節度使全忠言樞有經世才不宜棄外復拜門下侍郎平章事監修國史累進右僕射諸道鹽鐵轉運使

哀帝嗣位柳璨方用事全忠以牙將張廷範爲太常卿樞以爲廷範勳臣自宜任方鎮何用爲卿恐非主意持不下全忠怒謂賓佐曰吾常器樞不浮薄今乃爾璨聞卽罷樞政事拜左僕射俄貶登州刺史又貶瀧州司戶參軍至滑州全忠遣人殺之白馬驛投尸于河年六十五初全忠佐吏李振曰此等自謂清流宜投諸河永爲濁流全忠笑而許之

呂誣河中河東人少力於學志行整飭孤貧不自業里人程氏財雄于鄉以女妻誣亦以誣才不久因厚分贖贖濟所欲故稱譽日廣開元末入京師第進士調靈陵尉採訪使韋陟署爲支使哥舒翰節度河西表支度判官歷太子通事舍人性靜慎勤總吏職諸僚或出游誣獨頽然據案鉤視簿最翰益親之累兼殿中侍御史翰敗潼關誣西趨靈武由中人尉薦肅宗才之拜御史中丞所陳事無不順納從至鳳翔遷武部侍郎帝復兩京詔盡繫羣臣之汙賊者以御史中丞崔器憲部侍郎韓擇木大理卿嚴向爲三司使處其罪又詔御史大夫李峴及誣領使誣於權宜知大體不及峴而援律傳經過之當時憚其持法然以峴故多所平反乾元二年九節度兵敗帝憂之擢誣同中書門下平章事知門下省事翌日復以李峴李揆第五琦爲宰相而苗晉卿王璵罷會母喪解三月復召知門下省事兼判度支還執政累封須昌縣伯遷黃門侍郎上元初加同中書門下三品當賜門戟或勸誣以凶服受吉賜不宜誣釋縉拜賜人譏其失禮

諛引妻之父楚賓爲衛尉少卿楚賓子震爲郎官中人馬尙言者素暱於諛爲人求官諛奏爲藍田尉事
覺帝怒命敬羽窮治殺尙言以其肉賜從官罷諛爲太子賓客數月拜荊州長史澧朗峽忠等五州節度
使諛始建請荊州置南都詔可於是更號江陵府以諛爲尹置永平軍萬人遏吳蜀之衝以湖南之岳潭
郴道邵連黔中之涪凡七州隸其道初荊州長史張惟一以衡州蠻酋陳希昂爲司馬督家兵千人自防
惟一親將卒遂金與相忤希昂率兵至惟一所捕之惟一懼斬其首以謝悉以遂金兵屬之乃退自是政
一出希昂後入朝遷常州刺史過江陵入謁諛伏甲擊殺之誅黨偶數十人積尸府門內外震服妖人申
泰芝用左道事李輔國擢諛議大夫置軍邵道二州間以泰芝總之納羣蠻金賞以緋紫出褚中詔書賜
衣示之羣蠻悅於賞而財不足更爲剽掠吏不敢制潭州刺史龐承鼎疾其姦因泰芝過潭縛付吏劾賊
鉅萬得左道讖記并奏之輔國矯追泰芝還京既召見反譖承鼎陷不辜詔諛按罪諛使判官嚴郢具獄
暴泰芝之惡帝不省賜承鼎死流郢建州後泰芝終以賊徙死承鼎追原其誣諛爲治不急細務決大事
剛果不撓始在河西悉知諸將能否及爲尹奏取材者數十人總牙兵故威惠兩行諛之相與李揆不平
既斥乃用善治聞揆恐帝復用卽妄奏置軍湖南非便又陰遣人刺諛過失諛上疏訟其事帝怒逐揆出
之顯條其罪諛苦羸疾卒年五十一贈吏部尙書諛在朝不稱任職相反爲荊州號令明賦斂均一其治

尙威信故軍士用命闔境無盜賊民歌詠之自至德以來處方面數十人諛最有名荆人生構房祠及歿
吏裒錢十萬徙祠府西始諛知杜鴻漸元載才薦於朝後皆爲宰相承泰中嚴郢以故吏請諛有司博士
獨孤及諛曰蕭郢以故事宰相諛皆二名請益曰忠肅及執奏謂諛在義美惡不在多名文王伐崇周公
殺三監淮夷重耳一戰而霸而諛曰文翼缺之洛甯俞之忠隨會不忘其君而諛曰武故知稱其大略其
細也且二名諛非古也漢興蕭何張良霍去病霍光以文武大略佐漢致太平一名不盡其善乃有文終
文成景桓宣成之諛唐興參用漢制魏徵以王道佐時近文愛君忘身近貞二者並優廢一莫可故曰文
貞蕭瑀端直近貞性多猜近編言編則失貞稱貞則遺編故曰貞編蓋有爲爲之也若跡無異稱則易以
一字故杜如晦曰成封德彝曰明王珪曰懿陳叔達曰忠溫彥博曰恭岑文本曰獻韋巨源曰昭皆當時
赫赫居宰相位者諛不過一名而言故事宰相必以二名固所未聞宜如前諛遂不改
贊曰孔子稱才難然人之才有限不得皆善觀圓之銳而失守出奔晉卿雅厚而少風采臧否冕明彊嗜
利不知大體諛輔政功名不及治郡然各以所長顯于時故聖人使人也器之不窮所不能而後爲治也
遵慶真純中人之賢與

唐書卷一百四十

唐書卷一百四十考證

苗晉卿傳天寶二載判入等者凡六十四人○舊書作天寶一年

呂諲傳置永平軍萬人○舊書永平軍團練三千人

以湖南之岳潭郴道邵連黔中之涪凡七州隸其道○沈炳震曰按方鎮表增領涪衡潭岳郴邵永道連凡九州此作七州誤

後泰芝終以賊徙死承鼎追原其誣○臣德潛按此是承鼎之昭雪在泰芝死後也而舊書則云承鼎竟得雪後泰芝竟以賊敗流死似雪罪以後泰芝始流死者然

